

am -

et veut être avec l'enfant - au de la porte  
et croit au baill, l'enfant est mort

ME

P

Presented  
to the  
University of Toronto Library  
in memory of  
Augustine Fitzgerald, Esqre.,  
and of his father  
William Fitzgerald, Esqre.,  
Head Boy  
of Upper Canada College,  
1835-6





Digitized by the Internet Archive  
in 2009 with funding from  
University of Ottawa

LF  
D861v

766952  
20. 4. 32

(George Carcy.)

L A

# ❧ Venerie de Iaques du

*Fouilloux , Gentil-homme , seigneur  
dudit lieu , pays de Castine,  
en Poitou.*

Dediée au Roy Treschrestien CHARLES,  
neufiesme de ce nom.

A V E C

*Plusieurs Receptes & Remedes pour guerir les  
Chiens de diuerses maladies.*

P L U S


L'Adolescence de l'Autheur.

## Avec Priuilege du Roy.

A P O I T I E R S ,

*Par les de Marnes, et Bouchetz , freres.*

1 5 6 2.



# AU TRESCHRESTIEN

ROY ET MONARQUE DE FRAN-

*ce, par son humble serf,  
du Foüilloux.*

**I**L EST certain, Sire, que les hommes de tout temps se sont addonnez a plusieurs sciences hautes & occultes: les vns a la Philosophie, pour contenter leurs espritz, les autres aux artz mechaniques, pour les richesses mondaines: les inuentions desquelz ont esté dispersées en tant de manieres, qu'il est presque impossible de les deduire par le menu: tellement qu'apres auoir le tout considere, ie me suys voulu arrester au dire de ce grand sage Salomon, qui ha escript que toutes choses qui sont soubz le Soleil ne sont que vanitez, d'autant qu'on ne veoyt science ni art qui puisse allonger la vie plus que le cours de Nature. Par ce il m'a semblé, Sire, que la meilleure science que pouuons apprendre (apres la crainte de Dieu) est se tenir ioyeux, vísant d'honestes exercices: entre lesquels ie n'en ay trouué aucun plus louable que l'art de Venerie. Et d'autant que des ma ieunesse ie me suys exercé en celuy art, selon mon petit pouuoir, ainsi que mes predecesseurs, ie n'ay voulu estre negligent a rediger par escript ce qu'en auroys apprins par experience. Et combien qu'il en y ha en vostre Court qui peuuent mieux le faire que moy, toutesfois i'ay heu tant de confiance en vostre humaine maiesté, que ie n'ay craint vous presenter ce mientel quel labour, esperant que le receuriez en gré, comme de celuy qui est vostre treshumble esclaue & serf.

Par Priuilege du Roy, donné a Ian et Enguilbert  
de Marneſz, et Iaques Bouchet, freres, eſt permis  
d'Imprimer et vendre ce preſent liure intitulé,  
LA VENERIE DE IAQVES DV  
FOVILLOVX. Et deſſeſſe a tous autres Li-  
braires et Imprimeurs, de non en vendre, ni impri-  
mer, autres que ceux imprimez par leſditz de Mar-  
neſz et Bouchet, iuſques au temps de dix ans enſui-  
uans : ſubz les peines contenues par les lettres ſur ce  
faites, données a Orléans, le vingt et troiſieſme iour  
de Decembre, mil cinq cens ſoixante. Signées par  
le Roy, en ſon conſeil, DE LOMENIE, et ſcel-  
lées du grand ſeél ſur ſimple queue.

# TABLE DES CHAPITRES.


|  |                          |
|--|--------------------------|
| <b>D</b> E la race & antiquité des Chiens courans, & qui premierement les amena en France.   | Chap. i. Feuil. j.       |
| Du naturel & complexion des Chiens blancs, ditz Baux, & furnomméz Greffiers.   | chap. ii. fueil. vi.     |
| Des Chiens fauves, & de leur naturel.  | chap. iii. fueil. x.     |
| De la complexion & nature des Chiens gris.   | cha. iiii. fu. xiiij.    |
| Des Chiens noirs anciens de l'abbaye S. Hubert, en Ardene.   | chap. v. fu. xvi.        |
| Les signes par lesquelz on peut cognoistre vn bon, & beau Chien.   | chap. vi. fueil. xvij.   |
| Comme lon doyt eslire vne belle Lyce pour porter Chiens, & le moyen de la faire entrer en chaleur. Aussi les signes soubz lesquelz elle doyt estre couuerte pour porter Chiens massés, qui ne soyent subiectz a maladie. | chap. vii. fueil. xix.   |
| Des saisons esquelles les petis Chiens doyuent naistre, & comme on les doyt gouverner.   | chap. viii. fueil. xxij. |
| Les signes qu'on doyt regarder si les petis Chiens seront bons ou non.   | chap. ix. fueil. xxvi.   |
| Que lon doyt nourrir les petis Chiens aux villages, & non aux boucheries.  | chap. x. fueil. xxvij.   |
| En quel temps on doyt retirer les petis Chiens des nourrices, & quel pain & carnages ilz doyuent manger.   | cha. xi. fu. xxix.       |
| Comme doyt estre situé & accommodé le chenin des Chiens.   | chap. xii. fueil. xxxi.  |
| Du valet de Chiens, & comme il doyt panser, gouverner, & dresser les Chiens.   | chap. xiii. fueil. xxxv. |
| Comme lon doyt dresser les ieunes Chiens pour courre le Cerf, & des curées qu'on leur doyt faire.  | cha. xiiii. fu. xliij.   |
| De la vertu & propriété du Cerf.   | chap. xv. fueil. xlix.   |
| Du naturel & subtilité des Cerfs.  | chap. xvi. fueil. l.     |



# T A B L E.

|  |                                |
|--|--------------------------------|
| Du rut & muse des Cerfz.   | chap. xviij. feuil. lv.        |
| En quelle faison les Cerfz muent, & prennent leur buysson.   | chap. xvij. feuil. lvij.       |
| Pour quelle raison les Cerfz se recelent quand ilz ont mué.  | chap. xix. feuil. lix.         |
| Du pelage des Cerfz.   | chap. xx. feuil. lxi.          |
| Des testes ou ramures des Cerfz, & de la diuerfité d'icelles.  | chap. xxi. feuil. lxiiij.      |
| Duiugement & cognoissance du pied ou foyz du Cerf.   | chap. xxii. feuil. lxxij.      |
| Duiugement & cognoissance des fumées des Cerfz de dix cors, & des vieux Cerfz                                | chap. xxiii. feuil. lxxviij.   |
| Duiugement des portées.  | chap. xxiiii. feuil. lxxix.    |
| Duiugement des alleures.   | chap. xxv. feuil. lxxx.        |
| Duiugement des abatures & fouleures.   | cha. xxvi. feuil. lxxxi.       |
| Duiugement du frayoüer.  | chap. xxvii. feuil. lxxxij.    |
| Comme le Veneur doyt chercher les Cerfz aux gaignages, selon les moys & saisons.                             | chap. xxviii. feuil. lxxxiiij. |
| Comme le Veneur doyt aller en queste aux tailles avec le Limier.   | chap. xxix. feuil. lxxxviij.   |
| Comme le Veneur doyt aller en queste aux tailles ou gaignages, pour veoir le Cerf a veüe.                    | chap. xxx. feuil. lxxxxiij.    |
| Côme le Veneur doyt aller en queste aux petites courônes de tailles desrobées, qui sont au milieu des fortz. | cha. xxxi. f. xcviij.          |
| Côme le Veneur doyt aller en queste.   | chap. xxxii. feuil. ci.        |
| Comme le Veneur doyt aller requester le Cerf, qui aura esté couru & failly le iour auant                     | chap. xxxiii. feuil. cij.      |
| Comme le Veneur doyt aller en queste aux haustes fustayes.   | chap. xxxiiii. feuil. cv.      |
| Du lieu ou se doyt faire l'assemblée, & côme elle se doyt faire.   | chap. xxxv. feuil. cviiij.     |

VENERIE PAR IAQVES  
DV FOVILLOVX.



De la race, & antiquité des Chiens courans, &  
qui premierement les amena en France.

Chappitre I.

J'AY VOULU diligemment regarder tant au dire  
des anciens que modernes, d'où est venue la pre-  
miere race des Chiens courans en France, et n'ay  
trouvé chronique ou histoire qui en parle de plus long  
temps, qu'une que j'ay veüe en Bretagne, faicte par

A

un nommé *Ioannes Monumetensis* : laquelle traicte qu'apres la piteuse et espouuantable destruction de *Troye* la grand, *Eneas* arrina en *Italie*, avec son filz *Ascanius*, lequel fut Roy des *Latins*, et engendra un filz nommé *Sylvius*, duquel descendit *Brutus*, qui ay-  
moit fort la chasse.

Or aduint que son pere et luy estans un iour en une *Forest*, courans un *Cerf*, furent surprins de la nuit : et voyans le *Cerf* deuant eux forcé des *Chiens*, allerent a luy pour le tuer. La fortune aduint telle a *Brutus* (comme Dieu le voulut) qu'ainsi qu'il pensoit aller tuer le *Cerf*, il tua son pere *Sylvius*, qui causa le peuple a s'esleuer et mutiner contre luy, pensant qu'il l'eust faict par une malice et cupidité de regner, et pour auoir le gouuernement du *Royaume*, tellement que pour euader leur grande fureur et indignation, *Brutus* fut contraint s'en aller du pays, et entreprint le voyage de *Grece*, pour aller deliurer quelque nombre de *Troyens*, ses compaignons et alliez, qui estoient encores detenez captifz du temps de la destruction de *Troye* : laquelle chose il fait a force d'armes. Or apres les auoir deliurez, il assemble grand nombre d'hommes d'icelle nation *Troyenne* : ausquelz il fait faire serment de ne retourner iamais en leurs pays, tant pour le deshonneur qu'ilz y auoyent receu, que pour la perte irrecuperable de leurs biens, et pour les regretz de

leurs parentz es amys qui estoient mortz es cruelles batailles. Alors il feit appareiller grand nombre de nauires, esquelles il s'embarqua luy et tous ses hommes, et amena avec luy grande quantité de Chiens courans et Leuriers. Puy naviga tant qu'il passa le destroit de Gilbathar, entrant en la mer Oceane, et vint descendre aux isles Armoriques, que pour le iourd'huy nous nommons Bretaigne, a cause de son nom Brutus: laquelle il conquist sans resistance, et en fut paisible l'espace de quatre ans. Onquel temps un de ses capitaines, nommé Corineus, edifia la ville de Cornouaille. Bien tost apres qu'ilz se furent accommodez et habitez ondit pays, Brutus et son filz Turnus, qui auoyent, comme dit est, amené grand nombre de Chiens courans, s'en allerent chasser en de grandes forestz, qui contenoient de longueur depuis Tiffauge iusques aupres de Poitiers, dont vne partie du pays se nomme pour le iourd'huy la Gastine.

Or en celuy temps regnoit en Poictou et Aquitaine un Roy nommé Groffarius Pictus, qui faisoit sa continuelle residence a Poitiers, lequel un iour entre les autres fut aduertiy que les Troyens faisoient grand exercice en l'estat de Venerie, et qu'ilz chassoyent ordinairement en ses Forestz, avec telle race de Chiens, que depuis qu'ilz auoyent trouué un Cerf, ilz ne l'abandonnoient iamais qu'il ne fust mort. Ce Roy Groffarius ayant oüy telles nouuelles, fut courroucé et


fasché, tellement, qu'il delibera de leur faire la guerre, et assembla toutes ses forces. Les Troyens aduertis de telle assemblée, marcherent le long de la riuie-  
re de Loyre, avec toute leur puissance, et se rencontrerent au lieu ou pour le iourd'huy est située la  
ville de Tours, ou ilz se donnerent la bataille, en la-  
quelle fut tué Turnus, filz aîné de Brutus, et en  
memoire de luy fut edifiée la ville, et du nom de Tur-  
nus fut nommée Tours.

J'ay bien voulu raconter ceste hystoire, pour don-  
ner a entendre qu'il y ha long temps que les Chiens cou-  
rans sont en usage en la Bretaigne, et croy certaine-  
ment qu'iceulx Troyens ont esté les premiers qui en  
ont amené la race en ces pays: car ie ne trouue point  
histoire qui en face mention de plus haute cognois-  
sance que celle la. Et est une chose asseurée que la  
plus grande part des races des Chiens courans qui  
sont en France, et autres pays circonuoyssins, est  
sortie du pays de Bretaigne, exceptez les Chiens blancs,  
la race desquelz ie pense estre venue de Barba-  
rie, pour m'en estre enquis, moy estant quelques-  
fois a la Rochelle, a plusieurs Pilotes de Mer,  
et entre autres a un vieil homme nommé Al-  
fonce, qui auoyt esté par plusieurs fois a la Court  
d'un Roy de Barbarie, nommé le Doncherib, lequel  
faisoit grand mestier de chasse, et principalement de

prendre le Rangier a force : et me comptoit que tous les Chiens de sa Venerie estoient blancs , et que tous les Chiens de ce pays la l'estoyent aussi. Et certes ie croy qu'a la verité les Chiens blancs sont venuz des regions chaudes , d'autant qu'ilz ne laissent a courir pour quelque chaleur qu'il face : ce que les autres Chiens ne font pas. Phebus s'accorde a ceste oppinion , disant qu'il ha esté en *Mauritanie* , autrement dicté *Barbarie* , ou il ha veu prendre le Rangier a force , a des Chiens qu'il nomme *Baux* : lesquelz ne laissent a courir pour chaleur qui puisse faire. Dont mon opinion est , que la race des Chiens blancs est sortie de ces Chiens *Baux* de *Barbarie* dont Phebus entend parler. Je ne mettray autre chose des antiquitez , mais ie vous escriray cy apres du naturel et complexion tant des Chiens blancs , fauves , gris , que noirs : lesquelz sont les plus commodes pour les Princes et Gentilz hommes.

A iij

*J'aiu La Noue & L'Antre X*



Du naturel & complexion des Chiens blancs,  
dictz Baulx, & surnommez Greffiers.

Chappitre I I.

**L**es Chiens blancs ont esté mis en auant en France  
par defunct monsieur le grand Seneschal de Nor-  
mandie : et au parauant estoient en peu d'estime, prin-  
cipalement entre les Gentilz-hommes , d'autant qu'ilz  
ne sont pas communs a courir toutes bestes , mais seu-




lement le Cerf. Le premier de la race auoit nom Souillard, lequel fut donné par un pauvre gentil-homme au feu Roy Loys : qui n'en feit pas grand compte, d'autant qu'il aymoit sur tout les Chiens gris, desquelz estoit toute sa miente, et ne faisoit cas d'autres Chiens, si ce n'estoit pour faire Limiers. Le Seneschal Gaston estant present avec le gentil-homme qui auoyt offert le Chien, cognoissant bien que le Roy n'aymoit point ce Chien, le supplia de luy donner, pour en faire present a la plus sage dame de son Royaume, et le Roy luy demanda qui elle estoit : c'est, dit il, Anne de Bourbon, vostre fille. Je vous reprens respond le Roy, sur ce point de l'auoir nommée la plus sage : mais dittes, moins folle que les autres, car de sage femme n'y ha point au monde. Lors le Roy donna ce Chien au Seneschal Gaston, qui ne le mena guerres loing qu'il ne luy fust demandé : car monsieur le grand Seneschal de Normandie l'importuna tant, qu'il fut contraint de luy donner. Puis monsieur le grand Seneschal le bailla en garde a un veneur, nommé Jaques de Bresse : et deslors on commença a luy faire courrir des Lyces, et en faire race. L'année apres madame Anne de Bourbon, laquelle aymoit fort la Venerie, ayant entendu de la bonté et beauté de ce Chien, enuoya une Lyce nommée Baude, qui fut couuerte et emplie de ce Chien, par deux ou troys fois, dont en sortit quinze ou seze Chiens, et entre autres six

d'excellence, ainsi nommez, Cleraut, Ioubard, Miraud, Meigret, Marteau, et Hoise la bonne Lyce. Depuys la race c'est tousiours augmentée, comme elle est a present : combien qu'au commencement les Chiens de ceste race n'estoyent pas si fortz comme ilz sont pour le iourd'huy : car le feu Roy François les ha renforcez par un Chien nommé Miraud, qui estoit fauve, lequel monsieur l'Admiral d'Annebaud luy auoyt donné. Et encores depuys la Roynie d'Escoffe donna au Roy un Chien blanc, nommé Barraud, duquel Marconnay, lieutenant de la Venerie, ha tiré de la race, dont les Chiens sont bons par excellence : et beaucoup plus fortz que n'ont esté tous les autres. Et a la verité telz Chiens sont dediez pour les Roys, desquelz ilz se doyuent servir, d'autant qu'ilz sont beaux chasseurs, requerans, forcenans, et de haut nez : qui ne laissent pour chaleurs qui puyssent estre, a chasser, sans se rompre a la foule des piqueurs, ni au bruyt et cry des hommes qui sont continuellement avec les Princes : et gardent mieux le change que nulle des autres especes de Chiens, et sont de meilleure creance : touteffois ilz veulent estre accompagnez de piqueurs, et craignent un peu l'eau, principalement en Hyuer, quand le temps se porte froid.

Je ne veux oublier a donner entendre lesquelz Chiens de ceste race se trouuent les meilleurs, parce

qu'en vne laiçtée il ne s'en trouue pas la moitié de bons. Il faut sçauoir que ceux qui sont naissans tous d'une piece, comme ceux qui sont tous blancs, sont les meilleurs: et pareillement ceux qui sont marquetez de rouge: les autres qui sont marquetez de noir, et de gris sale tirant sur le bureau, sont de peu de valeur: dont en y ha aucuns subiectz a auoir les piedz gras et tendres. Aucunefois Nature besongne de telle sorte qu'elle en fait sortir de tous noirs: ce qui ne se fait pas souuent, mais quand il aduient ilz se trouuent fort bons. Et faut noter que les Chiens de ceste race ne sont en leur bonté qu'ilz n'ayent environ troys ans, et sont subiectz a courir au bestail priné.

A v



Des Chiens fauves, & de leur naturel.

Chappitre III.


**I**E N'AY leu autre chose de l'antiquité des Chiens fauves, sinon que j'ay trouué dans un vieil liure escrit a la main, fait par un veneur : qui faisoit mention d'un seigneur Breton, nommé Huet de Nantes, que l'Auteur d'iceluy liure estimoit fort en l'estat de Venerie : lequel donnoit, entre autres, tel blason aux Chiens de la meute dudit seigneur.

- ,, Tes Chiens fauves, Huet, par les forestz
- ,, Prenent a force Cheureulx, Biches, & Cerfz:
- ,, Toy par fustayes emporte sur tous pris
- ,, De bien parler aux Chiens en plaifans cris.

*J* Aussi i'ay veu dans une Chronique, en la ville de Lembale, un chappitre, qui fait mention qu'un seigneur dudit lieu, avec une meute de Chiens fauves et rouges, lança un Cerf en une forest en la comté de Paimetieure, et le chassa et pourchassa l'espace de quatre iours: tellement que le dernier iour il l'alla prendre pres la ville de Paris. Et est a presumer que les Chiens fauves sont les anciens Chiens des Ducz et seigneurs de Bretagne: desquelz monsieur l'Admiral d'Annebaud, et ses predecesseurs ont tousiours gardé de la race: laquelle fut premierement commune au temps du feu Roy François, pere des veneurs. Ces Chiens fauves sont de grand cuer, d'entreprinse, et de haut nez, gardans bien le change: et sont presque de la complexion des blancs, excepté qu'ilz n'endurent pas si bien les chaleurs, ne la foule des piqueurs: mais ilz sont plus vistes, communs, et plus ardans. Et si d'avanture il advient qu'une beste se forpaise par les campagnes, ilz ne la cuydent pas abandonner. Leur complexion est forte, car ilz ne craignent ne les eaux, ne le froid, et courent seurement, et de grande hardiesse. Ilz sont beaux chasseurs, ayman communement le Cerf sur toutes autres bestes, et sont plus opiniastres et

mal aisez a dresser que les blancs, et de plus grand peine, et travail. Les meilleurs qui sortent de la race de ces Chiens fauves, sont ceux qui ont le poil plus vis, tirans sur le rouge, et qui ont une tache blanche au front, ou au col, pareillement ceux qui sont tous fauves: mais ceux qui tirent sur le iaune, estans marquez de gris ou de noir, ne valent gueres. Ceux qui sont retronssiez, et herigotez sont bons a faire des Limiers. Et en y ha quelques uns ayans la queue espiée qui se trouuent bons et vistes. Et parce qu'aujourd'huy les Princes ont fait mesler les races des Chiens fauves ensemble, ilz en sont beaucoup plus fortz, et meilleurs a courir le Cerf, qui est le vray moyen pour donner plaisir aux Roys, et aux Princes: mais pour les Gentilz hommes telz Chiens ne sont pas communs, parce qu'ilz ne veulent faire qu'un mestier, et qu'ilz ne font cas de Lieures, ne d'autres menues bestes: et aussi qu'ilz sont subiectz a courir au bestail privé.

De la complexion



## De la complexion & nature des Chiens gris.

### Chapitre IIII.

**L**ES CHIENS gris sont ceux desquelz se seruoient anciennement les Roys de France, et les Ducz d'Alençon. Ilz sont Chiens communs, parce qu'ilz sçauent faire plusieurs mestiers, a ceste cause ilz sont commodés pour Gentilz hommes: car leur naturel ou complexion est telle, qu'ilz courent toutes les bestes qu'on leur voudra faire chasser. Les



meilleurs de toute la race, sont ceux qui sont gris sur l'eschine, estans quatrouillez de rouge, et les iambes de mesme poil, comme de la couleur de la iambe d'un Lieure. Il en sort aucunes-fois quelques uns qui ont le poil au dessus de l'eschine d'un gris tirant sur le noir, et les iambes tanellées et ondées de rouge et de noir, lequel se trouuent bons par excellence. Et combien que des Chiens gris il n'en soit gueres de mauuais, si est-ce que les trop gris argentez, ayans les iambes fauves tirantes sur le blanc, ne sont pas si vistes ne si vigoureux que les autres. Les Princes n'en peuvent tirer du plaisir, pour beaucoup de raisons, d'ont l'une est, parce qu'ilz craignent grandement la foule des piqueurs, et le bruit, d'autant qu'ilz sont Chiens ardans, et de grand cueur, qui se mettent hors d'halene au cry et bruit des hommes, aussi qu'ilz craignent les chaleurs, et n'ayment pas une beste qui ruse et tournoye : mais si elle tire pays, il est impossible de veoir courir de plus vistes et meilleurs Chiens, combien qu'ilz soyent opiniaftres de mauuaise creance, et subietz a prendre le change, a cause de l'ardeur et folie qu'ilz ont, et des grans cernes qu'ilz prennent en leur defect. Et sur tout veulent cognoistre leur maistre, et principalement sa voix, et sa trompe, et feront pour luy quelque chose plus que pour tous les autres. Ilz ont une malice entr'eux, qu'ilz cognoissent bien a la voix de leurs compaignons s'ilz

sont seurs ou non, car s'ilz sont menteurs ilz n'iront pas volontiers a eux. Ilz sont (biens de grand' peine, ne craignans le froid, ne les eaux, et s'ilz sentent une beste mal menée, et qu'elle se laisse approcher une fois, ilz ne l'abandonneront iamaïs qu'elle ne soit morte. Ceux qui en veulent tirer du plaisir, il faut qu'ilz fassent en ceste sorte. Au partir du descouple, ilz les doivent piquer le plus froidement qu'ilz pourront, avec peu de bruit, a cause qu'ilz sont ardans, et outrepassent les routes ou voyes de la beste qu'ilz courent: a ceste cause les piqueurs ne doibuent approcher d'eux qu'ilz ne les voyent tirer pays, ni au defaut pareillement: et se faut donner garde de les croiser, de peur qu'ilz retournent sur eux, et ainsi s'en tirera du plaisir.



Des Chiens noirs anciens de l'abbaye saint  
Hubert en Ardene.

Chap. V.

**L**ES CHIENS que nous appellons de saint Hu-  
bert, doibuent estre communément tous noirs, toutes  
fois on ha tant meslé leur race, qu'il en vient au-  
jourd'huy de tous poilz. Ce sont les Chiens dont les  
AbbeZ de saint Hubert ont tousiours gardé de la  
race,

race, en l'honneur et memoire du saint, qui estoit veneur avec saint Eustache, dont est a coniecturer que les bons veneurs les ensuiuront en Paradis, avec la grace de Dieu. Pour reuenir au premier propos, ceste race de Chiens ha esté semée par les pays d'Haynaud, Lorraine, Flandre, et Bourgongne. Ilz sont puissans de corsage, toutesfois ilz ont les iambes basses et courtes: aussi ne sont ilz pas vistes, combien qu'ilz soient de haut nez, chassans de forlonge, ne craignans les eaux, ne les froidures, et desirent plus les bestes puantes, comme Sangliers, Regnardz, et leurs semblables, qu'autres, par ce qu'ilz ne se sentent pas le cuer ne la vistesse pour courir et prendre les bestes legieres. Les Limiers en sortent bons, principalement pour le noir, mais pour en faire race pour courir, ie n'en fais pas grand cas: toutesfois i'ay trouué vn liure, qu'un veneur adroissoit a vn Prince de Lorraine, qui aimoit fort la chasse, ou il y auoit vn blason qu'iceluy veneur donnoit a son Limier, nommé Souillart, qui estoit blanc.

, De sainct Hubert fortit mon premier nom,

, Filz de Souillard Chien de tresgrand renom.

Dont est a presumer qu'il en sort quelques uns blancs, mais ilz ne sont de la race des Greffiers, que nous auons pour le iourd'huy.


Les signes par lesquelz on peut cognoistre  
vn bon & beau Chien.

Chap. VI.

**L** faut qu'un Chien, pour estre beau et bon, ayt les signes qui s'ensuiuent. Premièrement ie commenceray a la teste, laquelle doit estre de moyenne grosseur, et est plus a estimer quand elle est longue que camuse. Les nazeaux doivent estre gros et ouuers les oreilles larges, et de moyenne espaisseur, les reins courbez, le rable gros, les hanches aussi grosses et larges, la cuisse troussée: et le iarret droit bien herpé, la queue grosse pres des reins, et le reste gresle iusques au bout, le poil de dessus le ventre rude, la iambe grosse, la patte au pied seche, et en forme de celle d'un Regnard, les ongles gros. Et deuez entendre qu'on ne voit gueres de Chiens retroussez, ayans le derriere plus haut que le devant, estre vistes. Le masle doit estre court et courbé, et la Lice longue. Or pour vous declarer la signification des signes, il est a sçauoir, que les nazeaux ouuerts signifient le Chien de haut nez. Les reins courbez, et le iarret droit, signifient la vistesse. La queue grosse pres des reins, l'ogee et deliée au bout, signifie bonne force aux reins, et que le Chien est de longue haleine. Le poil rude au dessous du ventre, denote qu'il est penible, ne craignant point les eaux ne le froid. La iambe grosse, le pied de Regnard, et les ongles gros, demonstrent qu'il n'a point le pied gras, et qu'il est fort sur ses membres, pour courir longuement sans s'agruer.

Comme on doit eslire vne belle Lyce pour porter Chiens, & le moyen de la faire entrer en chaleur. Aussi les signes soubz lesquels elle doit estre couuerte pour porter Chiens masles, qui ne soient subietz a maladie.

Chap. VII.



*SI vous voulez avoir de beaux Chiens, il faut avoir une belle Lyce, qui soit de bonne race, forte et bien proportionnée de ses membres, ayans les costez et les*

flans grans et larges, laquelle pourrez faire venir en chaleur en ceste maniere: Prenez deux testes d'aulx, et un demy couillon d'une beste qui se nomme Castor, avec du ius de cresson alenois, et une douzaine de mouches Cantharides, et faictes bouillir le tout ensemble en un pot tenant une pinte, avec de la chair de Mouton, et en faictes boire par deux ou trois fois en potage a la Lyce, elle ne faudra iamais de venir en chaleur. Et autant en peut on faire au Chien pour le rechauffer. Puis quand vous verrez que la Lyce sera chaude, attendez le plein discours de la Lune a passer, pour la faire courir: et la faictes emplir soubz les signes de Gemini et Aquarius, car les Chiens qui naistront en ce temps, ne seront si subietz a la rage, et en viendra plus de masles que de femelles. Aussi on dit qu'il y ha une estoile nommée Arcture, et que si les Chiens naissent soubz le regne d'icelle, qu'ilz seront fort subietz a la rage. Pareillement faut entendre plusieurs secretz, dont le premier est: Que de quelque Chien qu'une Lyce sera couverte, la premiere fois qu'elle sera en chaleur, et de sa premiere portée, soit de Mastin, Leurier, ou Chien courant, en toutes les autres portées qu'elle aura apres, il s'en trouvera tousiours quelqu'un qui ressemblera le premier Chien qui l'aura couverte: qui est la cause qu'on doit bien regarder a la premiere fois qu'elle viendra en chaleur, de la faire courir a quelque beau Chien de bonne race, car



en toutes les autres laictées qu'elle portera , il en y aura tousiours quelques uns qui tiendront de la premiere.

Et par ce qu'aujourdhuy on ne fait cas des premieres laictées des Chiennes , veu qu'on pense que les Chiens qui en sortent sont subietz a la rage , et viennent volontiers foibles et menuz , si est-ce qu'il ne faut pas laisser a faire courir la Lyce a quelque beau Chien courant , et de bonne race , car si elle estoit mastinée les autres laictées en tiendroient : autrement si la laissez refroidir sans la faire courir, elle deviendra ethique , et a grand' peine se pourra remettre, ni engresser. L'autre secret est : Que si voulez auoir des Chiens legiers et ardans , il faut faire courir la Lyce a un ieune Chien, par ce que si c'estoit d'un vieil Chien, ilz deviendroient plus pesans, et moins rebaudiz. Et deuez entendre qu'il ne faut iamais faire refroidir une Lice en l'eau, car elle luy glace le sang dedans les venes et arteres, qui est cause qu'elle devient goutteuse , ou bien qu'elle ha des trenchées dedans le ventre , et autres infinies maladies qui s'en ensuiuent.

Quand les Lyces sont pleines , et qu'elles commencent a aualler leur ventre , on ne les doit pas mener a la chasse , pour beaucoup de raisons, dont l'une est parce que les efforts qu'elles font corrompent et gardent de profiter les petis Chiens qui sont dedans leur ventre: aussi qu'en sautant les hayes , et passant par les bois, il ne faut qu'un heurt pour les faire aduorter, dont s'en

*ensuiuroient plusieurs autres fortunes, qui me seroient prolixes a reciter. Donques on les doit seulement laisser aller par la court et maison, sans estre renfermées dedans le chenin, d'autant qu'elles sont ennuyeuses et desgoustées, et leur faut faire du potage une fois le iour pour le moins.*

*Plus si voulez faire chastrer ou sener une lice, ce doit estre au parauant qu'elle ayt iamais porté Chiens: et en la senant, il ne luy faut oster toutes les racines, car il est bien difficile qu'en les arrachant on ne luy face tort aux reins, et qu'on ne luy accourcisse sa vifesse: mais quand les racines demeurent elle en est plus vigoureuse et hardie, et en endure mieux la peine. Aussi on se doit bien donner garde de la faire sener quand elle est en chaleur, car alors elle seroit en grand danger d'en mourir: mais quinze iours apres qu'elle sera hors de chaleur, et lors que les petis Chiens se commanceront a former dans son corps, elle est bonne a sener.*

Des saisons esquelles les petis Chiens doiuent naistre,  
& comme on les doit gouuerner.

#### Chap. VIII.

**I**L y ha certaines saisons esquelles les petis Chiens sont mal aiseZ a sauuer et eschapper, principalement quand ilZ naissent sur la fin d'Octobre, a cause de l'hyuer, et froidures qui commencent a re-

gner, et que les laictages, et autres choses pour les nourrir, sont diffailliz: et par ce il est bien difficile quand ilz naissent en telle saison de les pouuoir eschapper, d'autant que l'huyter les ha surprins avant qu'ilz ayent force de resister au froid, et encores qu'ilz eschappent, ilz demeureront petis et foibles. L'autre saison fascheuse pour les eschapper et auier, est en Juillet, et Aoust, a cause des vehementes chaleurs, et des mousches, puces, et autres vermetz qui les tourmentent. Et parce, la droicte saison en laquelle ilz doiuent naistre, est en Mars, Avril et May, que le temps est temperé, et que les chaleurs ne sont trop vehementes: aussi que c'est la droicte naissance que nature ha donnée a tous animaux, comme a Vaches, Coieures, Brebis, et leurs semblables: parce qu'on trouue en ce temps leur nourriture. Et veu que les Chiens naissent en toutes saisons, et que plusieurs se delectent a en tirer de la race, et les nourrir en quelque saison qu'ilz viennent, i'ay bien voulu selon ma fantasie donner l'intelligence et moyen de les pouuoir eschapper. Premièrement, s'ilz naissent en hyuer, il faut prendre un muy ou une pippe bien seche, et la deffoncer par un bout, puis mettre de la paille dedans, et coucher le muy ou pippe en quelque lieu ou lon face ordinairement bon feu, puis mettre le bout deffoncé deuers la cheminée, afin q' ilz ayent la chaleur du feu.

Et faut bien nourrir la mere de bons potages fantz de

chair de Beuf ou Mouton. Or quand les petis Chiens commenceront un peu a manger, il leur faudra accoustumer le potage, sans le saller, a cause que le sel les deseché et fait venir galleux, a quoy ilz sont subiectz quand ilz naissent l'hyuer. Il faut mettre en leur potage force sauge, et autres herbes chaudes. Et si d'avanture on veoyoit que le poil leur tombast, il les faudroit frotter d'huyle de noix, et de miel, meslez ensemble : en les tenant dedans leur pippe ou muy le plus nettement qu'on pourra, en changeant leur paille tous les iours. Et quand on verra qu'ilz commenceront a aller, faut auoir un ret, fait de gros filet, laissé a maille de presse, et enfoncer avec un cercle le bout de la pippe ou muy, ainsi qu'on force un tabourin de Suisse, afin de les garder de sortir, par ce que les autres Chiens les mordroyent, ou seroyent marchez ou rompus des hommes : et faut faire la pippe ou muy en sorte qu'on l'ouure quand on vouldra. Quant aux autres Chiens qui naissent l'esté, ilz doyuent estre mis en quelque lieu frais ou les autres Chiens n'aillent point, et doit on mettre deffoubz eux quelques clies ou ais avec de la paille par dessus, qu'il faut changer souvent, de peur que la fraischeur ou humidité de la terre leur face nuysance. Ilz doiuent estre en lieu obscur, pour euitier que les mousches ne le tormentent : et faut aussi qu'ilz soient frottez deux fois la sepmaine, pour le moins, d'huyle de noix, meslé et batue avec du

saffran en poudre , car cest oingt faict mourir toute espee de vertz , et reconforte le cuyr et les nerfz des Chiens, et garde que les Mousches et Punaises ne les tormentent. Aucunesfois il en faut frotter la Lyce, et mesler parmy du ius de Berne, ou Cresson sauvage, de peur qu'elle porte des Pucés a ses petis , sans oublier a la faire nourrir de bons potages, comme dit est. Quand les petis Chiens auront quinze iours, il les faut esuerer, et huyt iours apres leur couper un neud de la queue, en la forme et maniere que ie declaireray cy apres au Traité des Receptes. Puis quand ilz commenceront a voir, et a manger, il leur faut donner de bon lait pur , tout chaud, soit de Vache, de Chieure, ou de Brebis. Et notez qu'il ne les faut mettre au village qu'ilz n'ayent deux mois, pour beaucoup de raisons, dont l'une est, qu'ilz ont tousiours la tetine de la mere, et que d'autant qu'ilz la tetent longuement, ilz tiennent plus de sa complexion et nature: ce qu'on peut veoir par experience, car quand une Lyce ha de petis Chiens, faictes en nourrir la moytié a une mastine, vous trouuerrez qu'ilz ne seront iamais si bons que ceux que la mere aura nourris. L'autre raison est, que si vous les separerez d'ensemble plus tost que deux mois, ilz seront froidureux, et leur sera estrange de la mere qui les eschauffoit.



Les signes qu'on doyt regarder , si les petis Chiens  
feront bons , ou non.

Chap. IX.

**L**ES ANCIENS ont voulu dire qu'on cognoist les  
meilleurs Chiens aux tetines des meres, et que ceux  
qui tetent le plus pres du creur sont les meilleurs , et  
plus vigoureux , a cause du sang qui en cest endroit est  
plus vis et delicat. Les autres ont dit le congnoistre  
dessous la gorge , a un sing qu'ilz ont , ou il y ha des

poilz qui sont comme de Porceaux: et que s'il y ha non-per, c'est signe de bonté, et que s'il y ha per, c'est mauvais signe. D'autres ont voulu regarder aux iambes de derriere, aux erigotures, que s'il n'en y ha point, c'est bon signe, et s'il y en ha une, que c'est aussi bon signe: mais s'il y en auoit deux, seroit mauvais signe. Il en y ha aussi qui ont voulu regarder dedans la gueule, pensans que ceux qui ont le palais noir fussent bons, mais ceux qui l'auroient rouge ne valussent gueres, et s'ilz ont les naizeaux ouuertz, c'est signe qu'ilz seront de haut nez. Si l'on considere la reste du corps, il n'y ha pas grand iugement qu'ilz n'ayent trois ou quatre mois. Toutesfois ie prens ceux qui ont les oreilles longues, larges, et espesses, et le poil de dessous le ventre gros et rude, pour les meilleurs: lesquels signes i'ay esprouué et trouué veritables. Or par ce que i'ay parlé cy dessus de ceste matiere, ie n'en diray autre chose.

Que lon doyt nourrir les petis Chiens aux villages,  
& non aux Boucheries.

Chap. X.

**Q**VAND les petis Chiens auront esté nourris deux mois sous la mere, et qu'on verra qu'ilz mangeront bien, il les faut enuoyer aux villages, en quelque beau lieu qui soyt pres des eaux, et loing de garennes, parce que s'ilz auoyent souffrette d'eaux, quand



ilz viendront en leur force, ilz pourroyent estre subietz a la rage, a cause de leur sang qui seroit sec et ardent, ou l'eau les nourrist et humectifie. Aussi s'ilz estoient pres de garennes, ilz se pourroyent rompre et effiler apres les Connilz. On les doyt nourrir aux champs, de laitages, de pain, et de toutes sortes de potages. Et faut entendre que la nourriture des villages leur est beaucoup meilleure que celle des boucheries, d'autant, qu'ilz ne sont point enfermez, et qu'ilz sortent quand ilz veulent pour aller paistre, et apprendre le train de la chasse: aussi qu'ilz accoustument le froid, la pluye, et tout mauvais temps, n'estans subiectz a courir au bestiaill priné, car ilz sont nourriz parmy eux ordinairement. Au contraire s'ilz sont nourriz aux boucheries, le sang et la chair qu'ilz mangent leur eschauffe le corps, tellement que quand ilz seroyent grans, et qu'on les feroyt courir deux ou troys fois par temps de pluye, s'ilz se morfondent, ilz ne faudront iamais a deuenir galleux, et seront subietz a la rage, et a courir au bestiaill priné, a cause qu'ilz en mangent le sang ordinairement aux boucheries, et n'apprennent a quester n'a chasser en sorte quelconque. Brief, ie ne vy iamais Chien faire bonne fin, estant nourry aux boucheries, et principalement pour chasser le Lievre.


En

En quel temps on doyt retirer les Chiens des nourriffes,  
& quel pain & carnages ilz doyuent manger.

## Chappitre XI.

**L**ON doyt retirer les Chiens des nourriffes a dix moys, et les faire nourrir au chenin tous ensemble, a fin qu'ilz se cognoiffent, et entendent, et y ha bien difference de voir une meute de Chiens nourris ensemblement, et d'un aage, et de Chiens amassez: par ce que ceux qui sont nourris ensemble s'entendent et ameurent mieux que ne sont pas les Chiens amassez. Apres qu'aurez retirez les Chiens au chenin, il leur faut pendre des billotz de bois au col, pour leur apprendre a aller en couple. Le pain qu'on leur doyt donner, doyt estre tiers froment, tiers orge ou baillarge, et tiers seigle: d'autant qu'ainsi mixtionné, ilz les entretiennent frais et gras, et les garentist de plusieurs maladies. Que s'il n'y auoit que de la seigle, elle les feroit trop vuyder, s'il n'y auoit que du froment, il leur retiendroit trop le ventre, qui leur causeroit des maladies: et par ainsi faut mesler et mixtionner l'un avec l'autre. On leur doyt donner des charnages au temps d'hyuer, principalement a ceux qui sont meigres et courent le Cerf: mais a ceux qui courent le Lieure, on ne leur en doyt point donner pour beaucoup de raisons, pour ce que si on leur en donne, ilz s'acharneront aux grosses bestes, et ne feront cas des Lieures, qui se mettent

communement parmy le bestiaill priué, pour se deffaire des Chiens, et lors pourroyent laisser aller le Lieure pour courir apres le bestiaill priué: mais Chiens qui courent le Cerf ne le feroient, a cause que le Cerf est de plus grand vent et sentiment que le Lieure, aussi que sa chair leur est plus friande et delicate que nulle autre. Les meilleurs carnages qu'on leur pourroit donner, et qui les remettroyent le plus, sont de Cheuaux, Asnes, et Muletz: quant aux Beufz, Vaches, et leurs semblables, la chair leur est de plus aigre substance. Vous ne devez iamais donner carnage aux Chiens qu'il ne soit escorché, a fin qu'ilz n'ayent pas la cognoissance de la beste ne de son poil. Je louë grandement les potages faictz de chair de Brebis, de Chieures, et de teste de Beuf, pour les Chiens meigres qui courent le Lieure: et faut mesler aucunes fois parmy ces potages quelque peu de souffre pour les eschauffer. I'en declareray plus amplement au Traicté des Receptes.



Comme doyt estre situé & accommodé le  
chenin des Chiens.

Chap. XII.

**L**E CHENIN doyt estre situé en quelque lieu bien orienté, ou il y ayt une grande court bien aplanie, ayant quatre vingtz pas en quarré, selon la commodité et puissance du Seigneur : mais d'autant qu'elle est spacieuse et grande, elle en est meilleure pour les Chiens; par ce qu'ilz veulent auoir du plaisir pour s'esbatre et

vuyder. Par le milieu du chenin y doit auoir un ruisseau d'eau viue, ou une fontaine, pres laquelle faut mettre un beau grand tymbre de pierre pour receuoir le cours de la source, qui aura un pied et demy de haut, a fin que les Chiens y boyuent plus a leur ayse : et faut qu'iceluy tymbre soit percé par un bout, a fin de faire euacuer l'eau, et qu'on le nettoye quand on voudra.

Sur le haut de la court doyt estre basty le logis des Chiens, auquel faut qu'il y ayt deux chambres, dont l'une sera plus spacieuse que l'autre, en laquelle doyt auoir une cheminée grande et large, pour y faire du feu quand mestier sera. Les portes et fenestres d'icelle chambre doyuent estre situées entre le Soleil leuant, et le Midy. La chambre doyt estre enleuée de trois piedz plus haut que le plan de la terre, et y faire deux cois, a fin que l'urine et immondicité des Chiens se puissent vuyder. Les murailles doyuent estre bien blanchies, et les planchers bien collez, de peur que les araignées, puces, punaises, et leurs semblables sy engendrent et nourrissent. Les fenestres doyuent estre bien vitrées, de peur que les mousches y entrent. Il leur faut tousiours laisser quelque petite porte ou huisset, a fin qu'ilz s'aillent vuyder et esbatre quand ilz voudront. Puis faut auoir en la chambre de petis chaslitz, qui soyent enleuez de terre d'un bon pied, et que soubz chascun des piedz du chaslit y ayt un petit rouleau ou boule, pour les mener la part ou lon voudra, a fin de  
pouoir

pouuoir nettoyer deffoubz : et aufsi quand ilz viendront de la chaffe , et qu'il est question de les faire chauffer et fecher , on les puiſſe rouler et approcher du feu. Et ſi faut qu'iceux chaſlitz ſoyent foncez de clies, ou bien d'ais percez , a fin que ſ'ilz piſſoyent, l'urine ſ'eſcoulaſt a terre. Il faut vne autre chambre pour retirer le valet de Chiens , a fin de reſerrer ſes trompes, couples, et autres choſes requiſes a ſon art.

Je n'ay voulu parler des chambres ſumptueuſes que les Princes font faire pour les Chiens , eſquelles y ha des poiles et eſtaues et autres magnificences : par ce que cela m'ha ſemblé leur eſtre plus nuifible que profitable : car ſ'ilz ont accouſtumé telles chaleurs, eſtans traitez ſi delicatement , et qu'on les mene en quelque lieu ou ilz ſoyent mal logez , ou bien ſ'ilz courent par temps de pluye , ilz ſeront ſubietz a ſe morfondre , et a deuenir galleux. Parquoy i'ay bien voulu dire , qu'alors qu'ilz viennent de la chaffe , et qu'ilz ſont mouillez , il ſuffiſt ſeulement qu'ilz ſoyent bien chauffez , et couchez ſechement , ſans leur accouſtumer tant de magnificence. Et par ce qu'aucunes fois on n'ha pas la commodité d'auoir fontaines ou ruiſſeaux , il eſt requis faire de petis baillotz de boys, ou bien quelque tymbre pour mettre leur eau. Il ſe faut bien donner garde de leur donner a boire en aucun vaiſſeau d'arain ou de cuyure : par ce que ces deux eſpeces de metaux

*sont veneneuses de leur nature, et font tourner et empunaisir soudainement l'eau, qui leur seroit grandement contraire. Il est aussi necessaire d'avoir de petis baquetz de boys pour mettre leur pain, qui doyt estre rompu et decoupé par petis loppins dedans, par ce que les Chiens sont aucunes fois desgouté et malades: aussi qu'il y ha certaines heures qu'ilz ne veulent manger, qui est la cause que les baquetz ne doyvent estre sans pain, comme nous avons mis au pourtrait cy dessus.*





Du valet de Chiens, & comme il doyt panfer, gouverner, & dresser les Chiens.

Chappitre XIII.

**V**N BON valet de Chiens doyt estre gracieux, fort courtois, et doux, aymant les Chiens de nature : et faut qu'il ayt bon pied, et bon vent, tant pour entonner sa trompe que sa bouteille. La premiere chose qu'il doyt faire, apres estre leué, c'est d'aller veoir ses Chiens, et les nettoyer et accoustrer, com-

me l'estat le requiert. Apres les auoir nettoyez, il doyt prendre sa trompe et sonner quatre ou cinq motz le gresle, a fin de les resiouyr, et appeller a luy: et quand il les verra tous autour de luy: faut qu'il les couple, et en les couplant qu'il se prene bien garde de ne coupler les Chiens masles ensemble, de peur qu'ilz ne se batent. Et s'il y ha de ieunes Chiens, il les faut coupler avec de vieilles Lyces, pour les apprendre a suyuir. Quand ilz seront tous bien couplez, il faut que le valet de Chiens, emplisse deux grandes gibbecieres ou pochettes, toutes pleines d'osseletz, et autres friandises, comme Sardines, ralles de pied de Cheual fricassez, rosties a la gresse, et autres semblables. Puis il doyt mettre tout par petis lopins dedans les gibbecieres, et en pendre vne a son col, et bailler l'autre a vn de ses compaignons. Cela faiet, doyt prendre deux bouchons de paille nette, et les mettre a sa ceinture, avec vne espouffette, pour bouchonner et espouffeter ses Chiens quand ilz seront aux champs. Les autres valetz de Chiens ou aides qui seront avec luy, en doyuent faire autant. Apres il faut qu'ilz prennent chascun vne belle housine en la main, et que l'un d'eux se mette deuant, qui appellera les Chiens apres luy, l'autre se mette derriere, qui les touchera: et s'il en y ha deux autres, ilz se mettront aux deux costez, et ainsi s'en doyuent aller tous quatre pourmener les Chiens par les bledz verdz, et par les

prairies, tant pour les faire paistre, que pour leur apprendre a croire, les faisant passer a travers les troupeaux de brebis, et autre bestiaill priné, a fin de les y accoustumer, et faire cognoistre: que s'il y auoit quelque Chien mal complexionné, qui leur voulust courre sus, il le faudroit coupler avec un Mouton ou Belier, et avec la boussine le fesser et battre longuement, en criant et menaçant, a fin qu'une autre-fois il entende la voix de ceux qui le menaceront. Aussi faut passer les Chiens par les garennes, et s'ilz branlent aux Connilz, les menacer et chastier, par ce que les ieunes Chiens, de leur nature, les aiment voluntiers. Apres les auoir ainsi pourmenez, et que le Soleil commencera a haulser, ilz s'en doyent aller en quelque beau pré, et appeller tous leurs Chiens autour d'eux, et prendre leurs bouchons et espouffettes pour les bouchonner et espouffeter le plus doucement qu'ilz pourront, car aucunesfois les Chiens qui courent par les fortz se piquent, et prennent des espines, ou bien ont quelques dartres ou galles: la ou les valetz de Chiens ayans la main rude, en les bouchonnant, les pourroyent escorcher, et faire plus tost mal que bien: et aussi que le Chien courant ne veut pas perdre son poil et bourre, d'autant qu'il est incessamment par les boys, là ou l'esgail, l'eau, et autres froidures tombent sur luy, a ceste cause doyt suffire de bouchonner les Chiens courans troys fois la sepmaine: mais quand aux Leurriers, ie ne dy

*pas qu'il ne les faille bouchonner tous les iours. Apres toutes ces choses faiçtes, il faut que les valetz de Chiens leur apprenent a entendre les forbuiz, tant de la trompe que de la bouche, en ceste maniere.*

*Premierement, il faut que l'un d'eux prene vne des gibbecieres pleine de friandises, et qu'il s'en aille a un iect d'arbaleste, ou plus loing, selon que les Chiens seront ieunes et dressez, car s'ilz estoient ieunes, n'ayans iamais esté dressez, il faudroit faire le forbu plus pres, et ne les descoupler point, a fin que les vieux les emmenassent et traynassent, au forbu. Mais s'ilz sont commencez a estre dressez, on doyt aller plus loing, et les descoupler, et alors que le valet des Chiens sera a deux bons iectz d'arbaleste loing de ses Chiens, lesquelz faut que ses compaignons tiennent hardez, il doit commencer a forbuer, et a sonner de la trompe, criant, Tya Hillant, pour le Cerf, et Valecy aller, pour le Lieure. Et ne doyt cesser de sonner et forbuer que ses Chiens ne soyent arrivez a luy. Quand ses compaignons l'entendront forbuer, il faut qu'ilz descouplent leurs chiens, en criant: Escoute a luy, tirez, tirez. Puis quand ilz seront arrivez au forbu, le valet de Chiens doyt prendre sa gibbeciere, et leur ietter toutes les friandises par-my eux, en leur criant et les resiouysant, comme l'art le requiert. Alors qu'il verra qu'ilz auront presque achené de manger, il doyt faire signe*

à ses compagnons qu'ilz forbient, lesquelz n'auront bougé du lieu ou ilz ont descouplé leurs Chiens qui auront l'autre gibbeciere pleine de friandises, lesquelz commanceront de leur couté a forbuer, et sonner de la trompe, pour faire venir les Chiens a eux. Celuy qui aura faict le premier forbu, les doyt menacer, et frapper avec une houssine, en criant, Escoute a luy, ou Tirez a luy. Et quand les Chiens seront arrivez a eux, ilz leurs doyvent donner les friandises, comme ha faict l'autre. Puis apres les coupler bien doucement, par ce que si on rudoyoit une fois un ieune Chien au couple, une autresfois on ne le cuyderoit pas reprendre. Quand ilz seront couplez, il les faut emmener au chemin, et leur donner a manger, et si faut laisser du pain couppé dedans leur baquet, pour ceux qui seront degoutez. On doyt changer leur paille deux ou troys fois la sepmaine, pour le moins: et entortiller des bouchons en de petis bastons, et les ficher en terre, pour les faire pisser. C'est une chose certaine que si vous frottez un bouchon ou autre chose de Galbanum, tous les Chiens ne faudront iamais a venir pisser de contre. Et si d'auanture il n'y auoit dedans le chemin ruyssau, ou fontaine, il faut mettre leur eau dedans de la pierre, ou dedans du boys, comme i'ay dit cy deuant, laquelle faut changer et rafraichir tous les iours deux fois. Aussi par les grandes chaleurs, les Chiens se chargent souuentesfois de poulz, pices, et d'autres

vermines et salletez : et pour y remedier , il les faut laver une fois la sepmaine en un bain faict avec des herbes , comme s'ensuyt.

Premierement faut avoir une grande poisle tenant dix seaux d'eau , puis prendre dix bonnes ioinctées d'une herbe nommée Berne ou Cresson sauvage, et autant de feuilles de Lapace , et de Mariolaine sauvage , de Sauge , Romarin , et Ruë , et faire fort bouillir le tout ensemble , iettant parmy deux mesures de sel : puis quand tout aura bouilly ensemble , et que les herbes seront bien consommées , il les faut oster de dessus le feu , et les laisser refroidir iusques a ce que l'eau soit tiede , puis laver les Chiens et bouchonner avec le bouchon , ou bien les baigner les uns apres les autres. Et doyvent estre faictes toutes ces choses au temps des grandes chaleurs , troys fois le moys pour le moins . Et aussi aucunes-fois quand on ramene les Chiens des villages , ilz craignent les eaux , et n'ont pas la hardiesse de se mettre dedans , a ceste cause le valet de Chiens doyt regarder et eslire les iours qu'il fera chaud , esquelz environ l'heure de Midy , doyt coupler tous ses Chiens , et les mener sur le bord de quelque riniere , ou estang , et se despouiller tout nu , en les prenant l'un apres l'autre , puis les porter bien avant , pour leur apprendre a nager , et accoustumer l'eau. Ayant fait cela deux ou troys fois , il cognoistra

que ses Chiens ne craindront plus les eaux, et qu'ilz ne feront plus de difficulté de passer et nager les riuieres et estangs. Voila comme les bons valetz de Chiens les doivent traiter et gouverner, car en faisant toutes ces choses susdites, il est impossible que leurs Chiens ne soient bien panssez et dressez. Aussi bien souuent les Chiens courent par temps de pluyes, de verglatz, et autre mauuais temps, ou bien font des effortz a courre, et a nager les riuieres: quand telles choses arriuent, le valet de Chiens leur doit faire un beau grand feu, pour les chauffer et secher et quand ilz seront secz, il leur doit frotter et bouchonner le ventre pour faire tomber la terre et fange qu'ilz pourroient auoir: car s'ilz couchoient mouillez, ilz seroient en danger de leur morfondre et deuenir galleux. Souuentesfois en courant par les campagnes et rochers, ilz s'agrauent et escorchent les piedz, et pour les panser et guerir, il faut premierement leur lauer les piedz avec de l'eau et du sel, apres faut auoir des œufz, et en prendre seulement les moyeux, et les battre fort avec du vin-aigre, et avec du ius d'une herbe qui croist sur les rochers, qu'on nomme PiloZelle: puis faut prendre de la gеме, ou poix, et la mettre en poudre, et la mesler avec deux fois autant de suye, en apres mettre vostredite poudre parmy les œufz et le ius des herbes susdites, faisant le tout chauffer en-



*semble, en le mouuant souvent: et se faut bien donner garde qu'il ne chauffe trop, parce que l'humidité se consommeroit, et les œufz se cuyroient, qui gasteroit le tout: mais suffira seulement de le chauffer iusques a ce qu'il soit un peu plus que tiede, et de ce leur en frotterez au soir les piedz, et les enuelperez avec du linge. Je n'en mettray autre chose pour ceste heure, esperant en parler plus amplement sur la fin, au Traicté des Receptes.*



Comme lon doit dresser les ieunes Chiens pour courre  
le Cerf, & des curées qu'on leur  
doit faire.

### Chappitre XIII.

**A**PRES que les valetz auront appris a leurs  
Chiens a croire, a entendre le forbu, et le son  
de la trompe: les piqueurs voyans leurs Chiens  
en assez bonne force de reins, et aagez de  
seze ou dixhuit moys, ilz doibuent commencer

a les dresser , et ne les mener qu'une fois la semaine , pour le plus , aux champs , de peur de les faire effiler , par ce que Chiens courans ne sont du tout renforcez , n'assureZ sur leurs membres , qu'ilz n'ayent deux ans pour le moins. Et faut avant toute chose , quiconque voudra prendre le Cerf a force , entendre trois secretZ. Le premier est , qu'on ne doit iamaiz faire courir une Biche aux Chiens , ne leur en donner curée , par ce qu'il y ha difference du sentiment de la Biche a celui du Cerf : comme pouuez veoir par experience , que les Chiens courans desmellent souuentefois l'un d'avec l'autre : et sont de telle nature que la premiere beste , qu'on leur fait courir , et qu'ilz y prennent plaisir , si on leur en fait curée , il leur en souuient tousiours : et par la pouuez cognoistre que si vous leur faiçtes curée des Biches , ilz les desireront plus tost que les Cerfz. Le second secret est , qu'on ne doibt point dresser les ieunes Chiens dedans les toiles , parce qu'un Cerf ne fait que tournoyer , ne se pouuant esloigner d'eux , qui le voyent a toutes heures : et si on les fait courir apres hors de la toile , et qu'un cerf dressast , se forloignant un peu d'eux , ils l'abandonneroient incontinent : et qui plus est , ilz se gastent encores a la toile en autre maniere , car si un cerf y tournoye deux ou trois tours , ilz prennent aussi tost le contrepied que le droit , se rompans et mettant hors d'halene , sans apprendre a quester ni a chasser , ne faisans que lever la teste pour veoir le Cerf. Le

tiers

tiers secret est, de ne dresser les Chiens ne faire courir au matin, s'il est possible: par ce que si on leur accoustume l'esgail, et qu'ilz viennent a courir sur le haut du iour, ayant senty la chaleur du Soleil, ilz ne voudront plus chasser. Mais autrement vous les pourrez dresser, et donner curée en ceste maniere.

Premierement vous deuez regarder quand les Cerfs seront en leur grande venaison, parce qu'ilz ne ruzent, et ne s'esloignent pas tant qu'ilz feroient en Avril et May, qu'ilz n'en sont point chargez, et ne courent pas si longuement. Alors pourrez choisir une forest, là ou les relays seront bien iustes, et a propos, puis mettre tous voz ieunes Chiens ensemble, avec quatre ou cinq des vieux, pour les dresser. En apres les faut mener au plus loingtain et dernier relays, et faire chasser le Cerf iusques là ou ilz seront, a quelque bonne mente de Chiens, qui le gardent bien de reposer par les chemins, afin qu'alors qu'il sera arrinué a eux, qu'il soit las et mal mené. A l'heure faudra descoupler les vieux Chiens les premiers, et quand ilz auront dressé les routes ou voyes du Cerf, estans bien amentez, faut descoupler tous les ieunes Chiens, et les amener a eux, là ou faut qu'il y ayt trois bons piqueurs pour le moins, a fin que s'il y auoit quelque Chien qui voulust demeurer derriere, s'opiniastrer et amuser, de le bien batre, et faire aller aux autres. Et deuez entendre qu'en quelque lieu ou lon tue le Cerf, en luy doit desfourer le col, et leur en


faire la curée sur le champ, tout chaudement, parce qu'elle leur est beaucoup meilleure, plus friande et profitable, chaude que froide.

Vous leur pouvez donner curée en autre maniere.

Prenez un Cerf aux retz ou pieces, et luy fandez un des piedz de devant depuis l'entre-deux des ongles iusques a la ioincture des os, ou bien luy coupez un des ongles tout entier, puis le demestrez de la piece ou retz, et le laisserez aller: un quart d'heure apres ferez amener tous voz ieunes Chiens lesquels ferez harder, puis ferez mettre les Limiers sur les routes du Cerf, lesquelles ferez suyure avec les ieunes Chiens. Apres l'auoir suiuy la longueur d'un iect d'arbaleste, vous pourrez forhuer et sonner pour chiens. Cela fait, pourrez descoupler les ieunes Chiens des vieux, afin que les vieux les conduisent: et faut qu'il y ayt de bons piqueurs: a la quenë pour les faire chasser et requester. Vous leur pourrez encores donner curée en autre maniere, Faut auoir quatre ou six valetz, lesquels soient gracieux, et allans bien a pied, car autrement ilz leurs feroient plus de tort que de profit: et leur pourrez donner amener a chascun quatre ieunes Chiens en une leste. Et apres que le Cerf sera donné aux Chiens, s'en doyuent aller tousiours le petit pas, sans les tourmenter, au deuant de la mente. Puis quand ilz verront que le Cerf aura couru deux bonnes heures, et qu'il sera mal mené, ilz pourront lascher les ieunes

*Chiens, mais se doivent bien garder de les descoupler quand ilz verront le Cerf aux abboiſ, et principalement quand il ha la teſte dure: car en ceſte fureur il les pourroit tuer. Ma fantaſie eſt telle, qu'on doit premierement drefſer les Chiens pour le Lieure, car c'eſt leur droit commencement, par ce qu'ilz aprenent toutes ruzes et houruariz, pareillement a croire, a venir a tous forbuſ, et ſi ſ'affinent le neſ en accouſtument les chemins et campagnes. En apres quand on les veut drefſer pour le Cerf, ilz abandonnent aiſement le Lieure, par autant que la chair du Cerf eſt plus friande, et auſſi qu'il ha plus grand vent et ſentiment que n'ha pas le Lieure. Il faut icy entendre, que tous Chiens veulent cognoiſtre les piqueurs qui les ſuyuent, et pour ce il eſt requis quand les valetz de Chiens leur donneront a manger, et qu'on leur fera la curée, que les piqueurs ſ'y trouuent, pour leur faire chere, et parler a eux, afin qu'ilz les cognoiſſent et entendent.*

# La chasse du Cerf.



Je suis le Cerf, a cause de ma teste  
 Par les Grecz fuz Ceratum furnommé,  
 Car en beauté j'excede toute beste,  
 Dont a bon droict ilz m'ont ainsi nommé.  
 Pour le plaisir des Rois ie suis donné,  
 De iour en iour les Veneurs me pourchassent  
 Par les Forestz : Je suis abandonné  
 A tous les Chiens, qui sans cesse me chassent.

*Si du*



Si du doct: Phebus auez commencement  
De Venerie, icy traduiſte groſſement:  
Ie me ſuys voulu mettre en toute diligence  
Vous en pouoir donner parfaicte intelligence.

De la vertu & proprieté du Cerf.

Chap. XV.

**L**ON trouue vn os dedans le cuer du Cerf, lequel eſt grandement profitable contre le tremblement de cuer, principalement aux femmes groſſes.

Autre vertu.

Prenez le vit d'un Cerf, puis le faiſtes tremper en du vin-aigre l'eſpace de vingt et quatre heures, et le faiſtes ſecher, apres le mettez en poudre: et en ferez boire le poix d'un eſcu, avec de l'eau de Plantain, a quelque homme ou femme ayant le flux de ſang, et incontinent ſeront guaris.

Autre vertu.

Prenez la teſte d'un Cerf, a l'heure qu'elle eſt demie reuenue, et en ſang, et la decoupez par petis loppins, et les mettez dedans une grand' fiole ou matraz de verre. Apres prendre le iuſt d'une herbe nommée Croiſette, et le iuſt d'une autre herbe, nommée poyure d'Eſpagne, autrement appellée Caſſis. Puis vous mettez le iuſt de toutes ces herbes la ou ſera la teſte du Cerf decouppée en

D

*petis loppins , et lutrez et fermerez bien vostre fiole ou matraz par dessus , laissant reposer toutes voz drogues ensemble l'espace de deux iours. Cela fait, les ferez toutes distiler en un alambic de verre. L'eau qui en sortira sera merueilleusement bonne contre tous venins, tant de morsures de serpens , que contre les poisons.*

*Autre vertu.*

*La corne du Cerf bruslée et mise en poudre fait mourir les vers dedans le corps, et dehors , et chasse les serpens de leurs fosses et cauernes. La presure ou caillon d'un ieune Cerf tué dedans le ventre de la Biche , remédie a la morsure des serpens.*

*Autre vertu.*

*La moelle et le suif du Cerf sont fort bons contre les gouttes venues de froides causes , en le faisant fondre, et de se frotter les lieux ou sont les douleurs.*

*Plus le Cerf nous ha fait cognoistre l'herbe du Dictame , lequel se sentant bleßé de quelque fer ou sagette , il s'en va manger de ladite herbe, qui luy fait sortir le fer du corps, et tout incontinent reçoit guarison.*

*Du naturel & subtilité des Cerfz.*

*Chap. XVI.*

**I***SIDORE dit, le Cerf estre le vray contraire du Serpent, et quand il est vieux , decrepit et malade , il s'en va aux fosses et cauernes des serpens , puis avec*

les narines soufflé et pouſſe ſon aleine dedans, en ſorte que par la vertu et force d'icelle il contraint le ſerpent, de ſortir dehors: lequel eſtant ſorry, il le tue avec le pied, puis le mange et deuore, apres ſ'en va boire, alors le venin ſ'eſpand par tous les conduitz de ſon corps: quand il ſent le venin, il ſe met a courir pour ſ'eſchauffer: bien toſt apres il commence a ſe vuyder et purger, tellement qu'il ne luy demeure rien dedans le corps, qui ne ſorte par tous les conduitz que nature luy ha donnez: et par ce moyen ſe renouuelle et guarift, faiſant mutation de poil.

Quand les Cerfz paſſent la Mer ou les grandes riuieres, pour aller en quelques iſles ou foreſtz au rut, ilz ſe mettent en grand nombre et cognoiſſent entr'eux le plus fort, et meilleur nageur, lequel il font, aller deuant, puis celuy qui va apres appuye ſa teſte ſur le doz du premier, et le tiers ſur le doz du ſecond, et conſequemment font tous ainſi, iuſques au dernier, afin de ſe ſoulager l'un l'autre: et quand le premier eſt las, un autre ſe met en ſa place.

Pline dit qu'ilz peuvent nager trente lieues de Mer, et qu'il l'a veu par experience en l'iſle de Cypre, de laquelle ilz vont communement en un autre iſle nommée Cilice, entre leſquelles y ha diſtance trente lieues de Mer, et qu'ilz ont le vent et ſentiment du rut et des foreſtz, d'une iſle a l'autre. Et a la verité, i'en ay veu en des foreſtz ſur la coſte de la Mer, eſtans

chassez et forcez des Chiens, qui se iettoient dedans la Mer, ou les pefcheurs les tuoyent a dix lieues de la terre.

Le Cerf s'esmerueille et estouuante quand il oyt siffler en paume et bucher : et par experience le pourrez cognoistre : Si vous voyez un Cerf courir de iour deuant vous, et qu'il soyt en pays descouuert, huchez apres luy, disant, Guare a bas, soudain le verrez reuenir droit a vous, par la doute de la voix qu'il aura ouye. Il ayme a ouyr les instrumentz, et s'esseure quand il oyt sonner quelque fluste ou autre doux chant. Le Cerf oyt fort cler quand il ha la teste et les oreilles leuees, mais quand il les ha baissées il n'oyt point. Quand il est debout, et qu'il n'ha point d'effroy, il s'esmerueille de tout ce qu'il voit, et prend plaisir a regarder, comme un chartier et sa charrette, ou une beste chargée de quelque chose.

Plin dit qu'on cognoist la vieillesse des Cerfs aux dentz, aux piedz, et a la teste, comme ie le declareray cy apres au iugement du Cerf. Plus dit que le cors et cheuilleures du Cerf multiplient tous les ans depuis sa premiere teste iusques a ce qu'il ayt sept ans, apres ilz ne multiplient plus, sinon en gressueur, et ce selon l'ennuy qu'ilz auront, ou la nourriture. Ilz portent aucunesfois plus, aucunesfois moins : qui est la raison pourquoy on les iuge Cerfs de dix cors, et autresfois les ont portez.

Plus dit Pline, que la premiere teste que porte un ieune Cerf, qu'elle est donnée a Nature: et que les quatre elementz prennent chacun leur portion.

Isidore est d'une autre opinion, disant que le Cerf la fiche et cache en la terre, de telle sorte qu'on ne la peut trouver: a la verité ie n'en sceu iamais veoir ne trouver qui fussent cheutes et muées d'elles-mesmes: toutesfois i'ay veu un homme qui disoit en avoir veu, ie m'en raporte a ce qui en est.

Le Cerf ha une malice, que s'il releue en une ieune taille, il va chercher et prendre le vent, pour sentir s'il y ha personne dedans qui luy nuysse: et si quelque homme prend une petite branche ou rameau, et qu'il pisse ou crache dessus, puis le planter en la taille, ou il yra faire son viandy, il ne faudra iamais l'aller sentir, et ne cuydera plus releuer en cest endroit.


Pline dit, que quand le Cerf est forcé des Chiens, son dernier refuge est aupres des maisons, a l'homme, auquel il ayme mieux se rendre que non pas aux Chiens, ayant cognoissance de ses plus contraires, ce que i'ay veu par experience: qu'il ne soit vray, quand la Biche veut faire son faon, elle s'oste plus tost de la voye des Chiens, que de la voye des hommes. Quand la Biche veut concevoir de son petit faon, elle attend a leuer une estoile, appelée Arcture, et porte huyt ou neuf mois ses faons: lesquelz naissent communement en May, combien qu'il en y ha qui naissent plus tard, selon la

nourriture et aage de la Biche. Il y ha des Biches qui peuuent auoir deux Faons d'une ventrée. Auant que la Biche ayt son Faon, elle se purge avec une herbe nommée Tragoncée, puis apres qu'elle ha faonné, elle mange la peau ou estoit enueloppé son Faon.

Pline dit d'auantage, que si on prenoit la Biche incontinent qu'elle ha Faonné, on trouueroit une pierre, dedans son corps, qu'elle ha mangée pour deliurer plus aysément de ses petis faons, laquelle seroit beaucoup requise et profitable pour femmes grosses. Apres que son Faon est grand, elle luy apprend a courir, a saillir, et le pais qu'il faut qu'il tienne pour se sauuer des Chiens. Les Cerfz et Biches peuuent viure cent ans, selon le dire de Phebus. Combien qu'on trouue par les anciens hystoriographes, qu'il fut prins un Cerf, ayant un collier au col, bien trois centz ans apres la mort de Cesar, ou ses armes estoient engraüées, et y auoit en escript dedans, CESARVS ME FECIT. Dont est venue le prouerbe Latin, Ceruinos annos viure.

## Du Rut &amp; Muse des Cerfz.

## Chap. XVII.



**L**ES Cerfz commencent a aller au Rut enui-on la-  
my Septembre, et dure le Rut pres de deux  
moys, et tant plus ilz sont vieux, et plus sont  
chaux de la Biche et mieux aimez, qui est au  
contraire des femmes, car elles ayment voluntiers les  
ieunes. Les vieux Cerfz vont plus tost au rut que les  
ieunes, et sont si fiers et orgueilleux, que iusques a ce

D iij

qu'ilz ayent accompli leurs amours, les ieunes n'en osent approcher, pour ce qu'ilz les battent et chassent. Mais les ieunes ont une grande finesse et malice, qu'alors qu'ils voyent que les vieux sont las du rut, et affiblis de leur force, ils leur courent sus, et les tuent ou blessent, leurs faisans abandonner le rut, et a l'heure sont maistres en leur rang. Les Cerfs se tuent beaucoup plus tost quand il y ha faute de Biches qu'autrement, car s'il en y ha grand nombre, ils se separent et escartent d'un costé et d'autre. C'est un plaisir de les veoir rere et faire leur muse, par ce que quand ilz sentent la nature de la Biche, ilz leuent le nez en l'air, regardans en haut, pour remercier Nature de leur auoir donné tel plaisir. Et s'il y ha quelque grand Cerf, il tournera la teste, et regardera s'il y en ha un autre qui luy vueille faire ennuy: lors les ieunes n'estans de son qualibre, luy voyans faire telle mine, se reculeront de luy, et fuyront. Mais s'il en y ha quelqu'un aussi grand que luy, ils commanceront tous deux a rere, et a gratter des piedz en terre, se choquans l'un contre l'autre, de telle sorte que vous ouyriez les coups de leurs testes de demye grand' lieüe: celui qui demeurera maistre chassera l'autre, la Biche regardera ce plaisir sans bouger de son lieu. Puis celui qui sera demeuré maistre commencera a rere ou crier, en se iettant tout de course sur la Biche, pour la courir, et ne luy donnera que trois ou quatre coups



de cul, pour le plus, et bien soudainement. Les Cerfsz sont fort aysez a tuer en telle saison : parce qu'ilz suyuent les voyes et routes par ou les Biches auront passé, mettans le nez en terre pour en assentir, sans regarder ne esuenter s'il y ha point quelqu'un caché pour leur nuire. Et vont aussi tost le iour que la nuict, estans si enragez du rut, qu'ilz pensent qu'il n'y ayt rien qui leur puisse nuire. Ilz viuent de peu de chose, car ilz viandent seulement de ce qu'ilz trouuent deuant eux, en suyuant les routes par ou va la Biche, et principalement de gros potirons rouges, qui leurs aydent a faire pisser le suif. Ilz sont en si vehemente chaleur que par tout là où ilz trouuent des eaux, ilz se veautrent et couchent dedans, et aucunesfois donnent par despit des andoilliers en terre. Lon cognoist les vieux Cerfsz a les ouyr rere ou crier, car tant plus ilz ont la voix grosse et tremblante, et plus doyuent ilz estre vieux : et aussi par la cognoist on s'ilz ont esté chassez, car s'ilz ont esté courus, et qu'ilz ayent crainte de quelque chose, ilz mettent la gueule contre terre, et réent bas et gros, ce que les Cerfsz de repos ne font pas, car ilz leuent la teste en haut, reans ou braimans hautement sans crainte.

D v

En quelle saison les Cerfs muent, &  
prenent leur buisson.

Chap. XVIII.

**L**es Cerfs muent et iettent leurs testes en Feurier et Mars, et communement les vieux Cerfs beaucoup plus tost que les ieunes : mais s'il en y ha quelqu'un qui ayt esté blessé au rut, ou par autre moyen, il ne la cuyde pas ietter si tost que les autres, a la raison que Nature ne luy peut ayder, car toute sa substance et nourriture ne peut suffire a le guarir, et a pousser sa teste, a cause du mal qu'il aura. Il y ha d'autres Cerfs lesquelz ont perdu leurs dintiers ou couillons au rut, ou autrement, qui ne muent iamais : car faut entendre que si vous chastré un Cerf auant qu'il porte sa teste, il n'en portera iamais : et au contraire, si vous le chastré ayant sa teste ou rameure, iamais elle ne luy tombera. Ne plus ne moins sera il si vous le chastré ayant sa teste molle et en sang, car elle demeurera tousiours ainsi, sans secher ne brunir. Cela nous donne a cognoistre que les couillons ont grande vertu, car bien souuent sont causes qu'il y ha beaucoup d'hommes qui portent belle rameure sur leur teste, laquelle ne mué et ne tombe iamais, ainsi soit il de vous amateurs de mes escriptz.

Quand les Cerfs ont mué et ietté leur teste, ilz commencent a leur retirer, et prendre leur buisson, se recelans et cachans en quelque beau lieu, pres des gai-

gnages, et de l'eau, sur le bord des champs, a fin d'aller aux legumes, bledz, et autres viandes. Et deuez entendre que les ieunes Cerfz ne prennent iamais de buys-son, qu'ilz n'ayent porté la troisieme teste, qui est au quatriesme an, et alors se peuvent inger Cerfz de dix corps bien ieunement, comme aussi les Sangliers ne laissent semblablement les compaignées qu'ilz ne viennent en leur tiers an, pour ce qu'ilz n'ont pas la hardiesse, ioint que leurs armes et deffenses ne sont encores en leur force.

Après que les Cerfz ont mué ilz commencent des le mois de Mars et Avril a pousser les bosses, et comme le Soleil haussera, et que le viandy croistra et durcira, ne plus ne moins leur teste et venaison croistront et augmenteront, et des la moitié de Iuin leurs testes seront semées de ce qu'elles doyuent porter toute l'année, pourueu qu'ilz soyent en bon pays de gaignages, n'ayans point d'ennuy: et selon que la saison auancera les gaignages et viandis, leur teste s'auancera ne plus ne moins.

Pour quelle raison les Cerfz se recelent  
quand ilz ont mué.


Chap. XIX.

**L**ES Cerfz se recelent pour beaucoup de raisons, dont la premiere est, pource qu'ilz sont maigres et foibles, a cause de l'hyuer, n'ayans la force de leur pouuoir deffendre: et aussi qu'ilz commencent a trouuer dequoy viure, a l'heure prennent

leur repos pour refaire leur chair. L'autre raison est, qu'ilz ont perdu leurs armes et deffenses, qui sont leurs testes, et ne s'osent monstrier, tant pour la crainte des bestes, que pour la honte qu'ilz ont d'auoir perdu leur force et beauté. Et verrez par experience que si il y ha quelques Cerfs en un gaignage ayans mué, si les Pies ou Grolles les agacent et decelent, ilz retourneront incontinent en leur fort pour se cacher, de la honte et crainte qu'ilz auront. Et notez qu'ilz ne laisseront leur buisson, si on ne leur fait de grans ennuyt, qu'il ne soyt a la fin du moys d'Aoust, qu'ilz commenceront a leur eschauffer, et se soucier des Biches.

Quand ilz voyent que leurs testes commencent a secher, qui est enuiron le vingt et deuxiesme de Juillet, ilz se decelent, allans aux arbres frayer, et faire tomber leurs lambeaux : apres auoir frayé, ilz se brunissent leurs testes, les vns aux charbonnieres, les autres en l'ardille, terre rouge, et autres lieux commodes a eux pour ce faire. Les vns portent, les testes rouges, les autres noires, les autres blanches. Toutes ces peintures procedent de nature, et non d'autre chose, car il seroit fort difficile que la poudre des charbonnieres, n'autre chose, leur puisse donner peinture. Les testes rouges viennent volontiers plus grosses et plus belles que les autres, car elles sont communement plus pleines de moelle, et plus legieres : les testes noires sont plus pesantes,

santes, et n'y ha pas tant de moelle: les blanches sont, les pires, et plus mal nourries. J'ay sceu tout cecy par l'experience des arbalestiers, et haquebutiers, qui en mettent souuent en euvre: lesquelz m'ont dit que les plus petites testes noires qui viennent de l'Escoffe sauvage, qu'on apporte en grand nombre vendre a la Rochelle, sont beaucoup plus pesantes et massives que celles que nous auons en ce pays de France, car elles n'ont pas tant de moelle. Combien qu'il y ha une forest en Poictou, appellée la forest de Mierenant, en laquelle les Cerfz portent de petites testes basses et noires, n'ayans que bien peu de moelle, et sont presque semblables a celles d'Irlande. Il y ha une autre forest a quatre lieues de là, nommée Chisay, en laquelle les Cerfz portent leurs testes au contraire, car ilz les portent grandes, rouges, et pleines de moelle, et sont fort legieres quand elles sont seches. J'ay bien voulu alleguer toutes ces choses icy, pour donner a entendre que les Cerfz portent leurs testes selon les pays et gaignages là ou ilz sont nourris, car la forest de Mierenant est toute en montaignes, vallées, et baricaues, là ou leurs viandes sont arres, et aigres, et de peu de substance: au contraire la forest de Chisay est en pays de pleine, enuironnée de tous bons gaignages, comme bledz, et legumes, dequoy ilz prennent bonne nourriture, qui est la cause pourquoy leurs testes viennent si belles et bien nées.



### Du pelage des Cerfz

#### Chap. XX.

**N**ous avons aucuns trois sortes de pelages de Cerfz, sçavoir est, Bruns, Fauves, et Rouges, et de chascun pelage viennent deux especes de Cerfz, dont les uns sont grans, les autres petis.

Premierement des Cerfz bruns, il en y ha qui sont grans, longs et esclames, lesquelz portent leurs testes fort hautes, de couleur rouge, belles et bien nées, qui

courent volontiers longuement, car tous Cerfz longs ont meilleur corps, et plus longue haleine que les courtz.

L'autre espece de bruns, sont petis Cerfz trappes et courtz, lesquelz portent communement du poil noir sur le col, comme crin, et se chargent de meilleure venaison et plus friande que ne font pas les autres, a cause qu'ilz hantent plus communement les tailles que les fustayes. Ce sont Cerfz malicieux, qui se reccellent sur eux, par ce que quand ilz sont en leur venaison, ilz ont crainte qu'on les trouue, d'autant qu'ilz n'ont pas corps pour courir longuement. Aussi ont ilz leurs allures fort courtes, et portent leurs testes basses et ouuertes. Et s'ilz sont vieux Cerfz nourri en bon pays de gaignages, ilz ont leurs testes noires, belles et bien semées, et portent communement la paumure a mont. Les autres Cerfz de pelage fauve portent leurs testes hautes, et de couleur blanche, desquelles les perches en sont deliées, et les andoilliers longs, gresles et mal nourris, principalement ceux qui sont du pelage fauve tirant sur le blanc pale, aussi n'ont ilz point de cueur ne de force: mais ceux qui sont de pelage fauve vif, ausquelz on trouue le plus souuent une petite raye brune sur l'eschine, et les iambes de mesme pelage, estans longs et esclames, telle espece de Cerfz sont fort vigoureux, portans belles testes, hautes, bien nourries, bien perlées, et tous autres signes que ie declareray cy apres. Les



*Cerfz portans le pelage rouge et vif, sont communement, ieunes Cerfz : telle sorte de pelage ne doit point resiouyr les piqueurs, par ce qu'ilz courent longuement et de grand' haleine.*

Des testes ou rameures des Cerfz, & de la diuersité d'icelles.

Chap. XXI.

**L***ES Cerfz portent leurs testes en diuerses maniere. Les uns bien nées, les autres mal ordonnées, et mal nourries, d'autres contrefaites, selon l'aage, le pays, ennuy et nourriture qu'ilz ont. Et faut noter qu'ilz ne portent leurs premieres testes, que nous appellons les dagues, sinon a leur deuxiesme an. A leur tiers an, ilz doyuent porter quatre, six, ou huit cornettes. A leur quart an, ilz en portent huit ou dix. A leur cinquiesme an, ilz en portent dix ou douze. A leur sixiesme an, ilz en portent douze, quatorze, ou seize. Et au septiesme an, leurs testes sont marquées et semées de tout ce qu'elles porteront iamais, et ne multiplieront plus sinon en grosseur, et selon les viandes, et ennuy qu'ilz auront apres les sept ans accomplis, ilz marqueront leurs testes, tantost plus, tantost moins: combien qu'on cognoistra tousiours les vieux Cerfz aux signes qui s'ensuyuent.*


*Premierement, quand ilz ont le tour de la meule large, et gros, bien pierré, et pres du suc de la teste.*



*Secondement*, quand ilz ont la perche grosse, bien brunie, et bien perlée, estant droicte, sans estre tirée des andoilliers.

*Tiercement*, quand ilz ont les goutieres grandes et larges. En apres si le premier andoiller (que Phebus nomme antoiller) est gros, long, et pres de la meule, le surandoiller assez pres du premier, lequel se doyt eslargir un peu plus au dehors de la perche, que non pas le premier, toutesfois qu'il ne doyt pas estre si long, et faut qu'ilz soyent bien perlez, tout cela signifie la vieillesse d'un Cerf. Aussi les autres cheuilleures ou cors qui sont au dessus, bien rangez et bien nez, selon la forme de la teste, et la trocheure, paumure, ou couronneure grosse et large selon la grandeur et grosseur de la perche, font iugement d'un vieux Cerf. Si les espois qui sont sommez dessus doublent ensemble en la couronneure ou paumure, c'est signe d'un grand vieux Cerf. Aussi quand les Cerfs ont les testes larges et ouvertes, cela les signifie plus communement vieux, que non pas quand ilz les ont rouées. Et pource que plusieurs ne pourroyent entendre les noms et diuersitez des testes, selon les termes de Venerie, j'ay bien voulu les depeindre et pourtraire icy, avec de petis escriteaux, pour specifier les noms de chascun article cy dessus mentionné.

Ce qui porte les andoillers, cheuilleures & espois, se doyt nōmer perche : & les petites fentes qui sont du long de la perche, se nomment goutières. Ce qui est sur la crouste de la perche, se nōme perlure, mais ce qui est autour de la meule en forme de petites pierres, pierreure, plus grosses que les autres.



A. Cccy se doyt appeller meule, & ce qui est autour de la meule, pierreure.


B. Ce premier cors se nomme andoiller.

C. Le second, surandoiller.


D. Tous ceux qui viennent apres iusques a la couronneure, paumure, ou torcheure, se doyuent nommer cors ou cheuilleures.

E. Ces cors qui sont a la sommité de la perche, se doyuent nommer Espois.


Ceste teste se doyt appeller teste couronnée, parce que les espois qui sont plantez en la sommité de la perche, sont rangez en forme de couronne: combien qu'on n'en veoyt que bien peu en France, si elles ne viennent d'Alemagne, ou du pays des Mosconites.



*Ceste teste se doyt nommer paumée, parce que les espois, qui sont plantez en la sommité de la perche, sont rangez en la forme d'une main d'homme, a ceste cause on l'appelle paumure.*




*Toutes testes ne portans que quatre et troys, les espois estans plantés en la sommité, tous d'une hauteur, en la forme d'une trochée de poires ou de nouzilles, se doyvent nommer teste portant trocheures.*



Toutes testes portans deux amons, ou que les espois doublent en la maniere qu'ilz sont icy pourtraictz, elles se doyuent nommer teste en fourchie, d'autant que les espois sont plantez en la sommité de la perche en forme d'une fourche.

E iij



Toutes testes qui doublent meules, ou qui ont les andoilliers, chevilleures, ou espois renuerse<sup>z</sup> au contraire des autres testes, comme pourrez veoir par ceste presente pourtraicture, ou en autre façon, se doyent nommer testes.

# ❧ Le Blason du Veneur ❧



**I**E fuy Veneur, qui me leue matin,  
 Prens ma bouteille, & l'emplis de bon vin,  
 Beuant deux coups en toute diligence,  
 Pour cheminer en plus grande assurance;  
 Mettant le traict au col de mon Limier,  
 Pour aux forestz le Cerf aller cercher:  
 En questant aux cernes des gaignages  
 Souuent entens des oyseaux les ramages.

Tenant mon Chien ie prens fort grand plaisir,  
 Quand ie cognois que du Cerf ha desir.  
 Et puis trouuant la fillette en l'enceinte  
 Mon art permet la besoigner sans feinte:  
 Apres qu'auray troys coups fait le deuoir,  
 Et destourné le Cerf a mon pouuoir,  
 A l'assemblée alors faut retourner  
 Pour mon rapport froidement raconter,  
 Donnant salut au Princes & Seigneurs,  
 Et les fumées monsttrans aux cognoisseurs.  
 Lors de bon vin soudain on me presente,  
 Car c'est le droit de l'art qui le commande.  
 Apres disner m'enuoys incontinent  
 A ma brisée, mon maistre entretenant.  
 Puis sur les voyes mon Chien se fait entendre  
 Allant lancer le Cerf hors de sa chambre.  
 Dont ne desplaïse aux Fauconniers vereurs  
 Leur estat n'est approchant des Veneurs.

Des cognoissances & iugementz que le Veneur doyt entendre & sçauoir pour cognoistre les vieux Cerfs.

*Le iugement du pied.      Le iugement des fumées.  
 Le iugement des portées.      Le iugement des allures.  
 Le iugement des abaturs et fouseurs.  
 Le iugement des frayouers.*

*Lesquelz ie specifiray cy apres par chappitres, commençant au iugement du pied.*



Du iugement & cognoissance du pied, ou  
foys du Cerf.

Chappitre XXII.



**L**ES vieux Cerfz ont communement, les cognoissances qui s'ensuyuent. Premièrement, il faut regarder a la sole du pied, laquelle doit estre grande et large. Et notez que s'il y ha deux Cerfz ensemble, dont l'un ayt le pied long, et l'autre rond, et que les signes et iugementz de tous deux soyent de mesme

E v

grosſeur et grandeur , ſi eſt-ce que le pied long ſe doit toujours iuger plus Cerf que le pied rond , car il n'y ha point de faute que le corſage n'en ſoit plus grand que de l'autre. Plus faut regarder au talon, lequel doit eſtre gros et large , et la petite comblette ou fente , qui eſt par le meilleu d'iceluy , qui fait la ſeparation des deux coſtez , doit eſtre large et ouuerte, la iambe large , les os gros , courtz et point tranchantz , la pince ronde et groſſe. Communement les grandz vieux Cerfz ſont bas ioinctez , et ne ſe faux-marchent iamais , par ce que les nerfz qui tiennent les ioinctures des ongles ſont renforcez , et tiennent coup a la peſanteur du corps : ce que ne font pas aux ieunes Cerfz , car les ioinctures et nerfz qui tiennent leurs ongles ſont foibles , n'eſtans encores en leur force , leſquelz ne peuvent ſupporter la peſanteur du corps , tellement qu'il faut que l'ongle varie et faux-marche , a ceſte cauſe ilz ſe doiuent iuger ieunes Cerfz . Plus les vieux Cerfz en leurs allures ne paſſent iamais le pied de derriere outre celuy de deuant , mais demeure apres de quatre doigtz pour le moins : ce que ne font pas les ieunes Cerfz , car en leurs allures le pied de derriere outrepaſſe celuy de deuant , comme fait une Mule qui va l'amble.

Cerfz ayans le pied creux , pourueu que tous autres bons ſignes y ſoyent , ſe peuvent iuger vieux Cerfz . Ceux qui ont haſt et mol pas , en lieu ou il n'y ayt gueres de pierres , ſe iugent par la eſtre vigoureux , n'ayans gueres eſté


*chassez ne courus. Il faut icy entendre qu'il y ha grand difference entre les cognoissances du pied des Biches, et du pied des Cerfs: toutesfois quand les Biches sont pleines, un ieune Veneur s'y pourroit bien tromper. parce qu'elles ouurent les ongles, a cause de leur pesanteur, comme fait un Cerf, mais si est-ce que les cognoissances en sont bien apparentes. car si vous regardez le talon d'une Biche, vous trouuerez qu'il n'est si ieune Cerf, portant sa seconde teste, qui ne l'ayt plus gros et plus large qu'elle n'ha pas, et les os plus gros: aussi elles ont communement le pied long, estroit, et creux, avec des petis os tranchant. Autrement vous pourrez iuger les Biches aux viandis, parce qu'elles viandent gourmandement, coupant le boys rond comme fait un Beuf: et au contraire, le Cerf de dix cors le prend delicatement en l'erucant pour en auoir la liqueur la plus douce et tendre qu'il peut.*

*Et si faut que le veneur entende un secret, c'est que quand il sera aux boys, et qu'il vient a rencontrer d'un Cerf, premierement doit regarder quel pied c'est, si il est use ou tranchant, apres qu'il regarde le pays, et la forest la ou il sera, car il pourra presumer en luy mesmes, si c'est a l'occasion du pays ou autrement: par ce que communement les Cerfs nourris aux montaignes et pays pierreux ont les pinces et les tranchans ou ceste du pied fort use: la raison est, qu'en montant sur les*

montaignes et rochers, ilz n'appuyent que de la pince ou des costez du pied, et non du talon, lesquelles pinces les rochers et pierres usent incessamment, et par ainsi se pourroyent parauanture iuger plus vieux Cerfs qu'ilz ne seroyent. Les Cerfs sont au contraire en pays sablonneux, car ilz appuyent plus du talon que des pinces: la raison est, qu'en appuyant du pied sur le sable, il fuyt et coule de dessoubz la pince, a cause de la pesanteur, car l'ongle qui est dur le fait glisser, et alors est contraint le Cerf de se supporter et appuyer sur le talon, qui est aucunes fois l'occasion de le faire croistre et eslargir. Tous ces signes sont les vrais iugemens et cognoissances que le Veneur doit sçauoir et entendre du pied du Cerf. I'eusse bien declairé aux apprentifz que c'est que de la pince, des os, et autres choses, mais ie voy qu'aujourd'huy il en y ha tant qui l'entendent, que ie m'en tais a cause de breueté.

Du iugement & cognoissance des fumées des Cerfz  
de dix cors, & des vieux Cerfz.

Chap. XXIII.



- A. Fumées formées.  
B. Fumées en torches.  
C. Fumées en plateaux.

C **A**U mois d'Auril et May on commence a  
iuger les vieux Cerfz par les fumées, les-  
quelles ilz iettent en plateaux, et s'ilz sont

*larges , gros , et espois , c'est signe qu'ilz sont Cerfz de dix cors.*

*B Aux mois de Juing et Juillet , ilz doivent ietter leurs fumées en grosses torches bien molles : toutesfois il y en ha quelques uns qui les iettent encores en plateaux iusques a la my Iuing.*

*A. Et depuis la mi-Iuillet iusques a la fin d'Aoust , ilz doivent ietter leurs fumées toutes formées , grosses , longues et nouées , bien martelées , ointes ou dorées , n'en laissant tomber que bien peu : lesquelles ilz doivent semer sans estre entées , et auoir des piquons au bout , et faut regarder si elles sont bien mouluës , et si le Cerf ha esté au grain.*

*Voyla les cognoissances par les fumées , des Cerfz de dix cors , et vieux Cerfz : combien qu'ilz se peuvent mes-inger bien souuent , car si les Cerfz ont heu quelques ennuy , ou qu'ilz soyent blessez ou boyez , alors ilz iettent volontiers leurs fumées arses et aguillonées par l'un des boutz , principalement au frayoier : mais apres qu'ilz auront esté frayez et bruni , leurs fumées reuiennent en leur naturel. En tel cas le Veneur y doit bien regarder , parce que le iugement en est douteux. En Septembre et Oëtobre , il n'y ha plus de iugement a cause du rut.*

*Et faut entendre qu'il y ha difference entre les fumées du releué du soir, et celles du matin : par ce que les fumées du releué du soir sont mieux moulües et digerées que celles du matin, a cause que le Cerf ha fait son repos tout le iour, et heu temps et repos de faire son runge, et digerer son viandis : au contraire est des fumées du matin, car elles ne sont si bien digerées ou moulües, a cause de l'exercice sans repos qu'ilz font la nuit en viandant.*

Du iugement des portées.

Chap. XXIIII.

**L**E Veneur peut auoir iugement et cognoissance de la teste des Cerfz, toute l'année par les portées, excepteZ quatre moys, qui sont Mars, Aupil, May, et Iuing, auquel temps ilz muent, et ont leur teste molle et en sang, et n'y ha en icelle saison grand iugement. Mais lors que leurs testes commencent a durcir, il y ha iugement par les portées, iusques a ce qu'ilz ayent mué. Par ce qu'en entrant dedans les fortz ilz leuent leurs testes sans craindre de heurter, et tourner les branches, et par là le Veneur en peut auoir cognoissance. Mais quand les Cerfz ont leurs testes molles, et en sang, ilz sont de peu de iugement, d'autant qu'ilz les couchent sur leur eschine, de peur de les heurter aux branches, et les

blesser. Quand le Veneur verra que les Cerfs auront la teste enduree, et qu'ilz se pourront iuger par les portées, il faut qu'il regarde aux entrées des forêts, par où ilz se rembuschent, et principalement dedans les grandes tailles, qui n'auront esté coupées de huit ou dix ans, ausquelles il verra, par les routes ou les Cerfs passent, les branches tournées et heurtées des deux costez, et en regardant la largeur de la teste, il pourra iuger si elle est bien ouverte. Et s'il y ha quelque endroit de bois cler, où le Cerf auroit leué la teste en son entier, ou bien qu'il se fust arresté pour escouter (car volontiers quand les Cerfs veulent ouyr, ilz leuent la teste et les oreilles) alors il pourroit heurter du bout des espois a quelques petites branches seches, qu'il auroit rompues, par lesquelles, et autres marques, le Veneur pourra iuger la longueur et hauteur de la perche et teste des Cerfs.

Du iugement des alleures.

Chap. XXV.

**P**AR les alleures, le Veneur pourra cognoistre si le Cerf est grand et long, et s'il courra longuement devant les Chiens. Car tous Cerfs ayans les alleures longues, courent plus longuement que ceux qui ont les alleures courtes, et sont plus vistes, plus legiers, et de meilleure haleine. Aussi les Cerfs ayans de grandes  
cognoissances



*cognoissances aux piedz de devant, ne courent pas volontiers longuement devant les Chiens: le Veneur peut cognoistre par ces signes la force des Cerfz et garder l'avantage des Chiens. Aussi les Cerfz ayans le pied long, ont le corsage plus grand que ceux qui l'ont rond.*

Du iugement des abateures & fouteures.

Chap. XXVI.

*Si voulez cognoistre si un Cerf est haut sur iambes, semblablement la grosseur et espesseur de son corps, il faut regarder l'endroit par ou il entre au fort, es fougeres, et menuz boys, lesquels il aura laissez entre ses iambes: sçavoir de quelle hauteur il les aura abatus avec le ventre, alors cognoistrez s'il est haut sur iambes. La grosseur se cognoist aux deux costez, là ou son corps aura touché, car il y aura brisé et rompu les branches seches des deux costez, et par là pourrez mesurer sa grosseur.*

F

VENERIE PAR  
Le iugement du frayouër.  
Chap. XXVII.



COMMUNEMENT les vieux Cerfs font leur frayouër aux ieunes arbres qu'on laisse dedans les tailles, et tant plus les Cerfs sont vieux et plus tost vont frayer, et a plus gros arbres, lesquels il ne pourront plier avec leurs testes. Et quand le Veneur trouuera le frayouër, il doit regarder la hauteur ou les bouts de la tracheure ou paumure auront touché, et là ou les

branches seront heurtées et rompues, alors cognoistra la hauteur de sa teste. Et s'il veoit qu'il y ayt au plus haut du frayonier quatre branches heurtées au coup, et d'une hauteur, c'est signe que le Cerf peut porter sa teste en trocheure ou couronneure. Pareillement si le Veneur veoit que trois andoillers ayent touché a trois branches d'une hauteur, et qu'il y en ayt deux qui ayent touché plus bas, c'est signe qu'il porte paumure. Combien que ces signes soyent fort obscurs, et qu'ilz requierent auoir l'œil bon, pour en auoir cognoissance par les petites branches et fuesilles: toutesfois vous apprendrez que les vieux Cerfs font bien des hardouiers aux petis arbres, comme aux saules noirs, et autres semblables, aussi bien que les ieunes Cerfs: mais les ieunes ne vont iamais frayer aux grosses arbres, s'ilz ne sont Cerfs de dix cors. Je n'en declareray autre chose, par autant qu'il y ha d'autres plus certains signes et iugemens cy dessus mentionnez.

Comme le Veneur doit chercher les Cerfz aux gaignages selon les moys & faisons.

Chap. XXVIII.



**I**E donneray icy intelligence a tous Veneurs, menans le Limier au boys, comme ilz se doivent gouverner selon les moys et saisons, car les Cerfz changent de viandis tous les moys: et tout ainsi que le Soleil hausse, et que les viandis croissent, ilz font mutation de gaignage.

*Premierement ie commenceray a la sortie du rut, qui est a la fin du mois d'Octobre, poursuyuant de mois en mois iusques au mois de Septembre.*

*A ceste cause au mois de N ouembre faut chercher les Cerfz aux brandes et bruyeres, desquelles ilz vont viander les poinctes et fleurs, par ce qu'elles sont chaudes, et de grande substance, qui les remet en nature, et reconforte leurs membres, qui sont travailleZ du rut, et font leur demeure aucunesfois en ces brandes, et bruyeres, principalement quand le Soleil rend chaleur.*

*En Decembre ilz se mettent en hardes, et se retirent au profond des forestz, pour auoir l'abry des ventz, froidz, neges, et verglaz, et vont faire leurs viandis aux houbieres, aux fueilles de la ronce, et du suz, et autres choses qu'ilz peuvent trouuer. et si il nege, ilz viandent la poincte de la mousse, et pelent le boys tout ainsi que fait une Chieure.*

*En Ianuier ilz laissent les hardes des meschantes bestes, et s'accompagnent troys ou quatre Cerfz ensemble, en se retirans aux ailes des forestz, et vont aux gaignages aux bledz vers, comme seigles, et leurs semblables.*

*En Feburier et Mars ilz vont aux viandis aux chatons des saules et coudres, aux bledz vers, et dedans les prez au cochet, et aux boutons du mort boys, comme cheurefneil, bouleaux, et leurs semblables. En ces mois la, ilz muent et iettent leurs testes, commençans*

a regarder le pays le plus commode pour prendre leurs buyssons , et refaire leurs testes , et lors se departent d'ensemble.

En Avril et May ilz sont a repos en leurs buyssons , ausquelz ilz demeurent pour toute la saison , et n'en bougeront iusques au commencement du rut , si on ne leur fait de grans ennuys , se recelans pres de quelques petites tailles desrobbées , esquelles y aura force boys de bourdaine, ou ilz iront faire leurs viandis, semblablement aux pois , febues, iarouffes , vesce , et autres legumes qu'ilz pourront trouuer aupres d'eux, et feront bien peu de pays. Aucuns Cerfz y ha qui viandent sur eux , ne sortans que de deux iours en deux iours hors de leur buyson , pour aller aux gaignages. Et notez qu'il y ha des Cerfz si malicieux, qu'ilz font deux buyssons , et quand ilz ont esté trois iours en un costé de la forest, ilz s'en vont trois iours en un autre buyson, d'un autre costé: ce sont Cerfz qui ont heu ennuy en leurs viandis, lesquelz changent de buyson quand le vent tourne, pour auoir sentiment a la sortie de leur fort, de ce qui est en leurs gaignages. Et faut entendre qu'en ces moys d'Avril et May , ilz ne vont point a l'eau , a cause de l'humidité de la taille, et de l'esgail, qui leur en donne suffsance.

En Juin , Iuillet , et Aoust , ilz vont aux tailles, comme dessus, et aux grains , comme frommens , auoy-  
nes, seigles, orges, et autres choses qu'ils peuvent trouuer,

*et a l'heure sont en leur grande venaison. Et quelque chose qu'on vueille dire, ilz vont a l'eau, et les ay ven boire, mais c'est plus communement en ceste saison qu'en autre, a cause des grains secz qui les alterent : et aussi de la vehemente chaleur et secheresse qui oste l'esgail et humidité du boys, lequel commence a durcir.*

*En Septembre et Octobre ilz laissent leurs buyffons, et vont au rut, a ceste heure la ilz n'ont point de repos ne de viandis certain, comme i'ay declairé cy dessus au chappitre du rut.*

*F iij*

Comme le veneur doit aller en queste aux  
tailles avec le Limier.

Chap. XXIX.



**I**NCONTINANT apres soupper le Veneur doit aller  
a la chambre de son maistre, et s'il est au Roy,  
faut qu'il aille a la chambre du lieutenant de la  
Venerie, pour sçauoir en quel lieu on depart les questes,  
afin de demander la sienne. Ce fait, s'en doit aller  
coucher, pour se leuer matin, selon la saison et



temps qu'il fera, et le lieu ou il voudra aller au boys. Puis quand il sera prest, faut qu'il boyue le coup, et aille querir son Chien pour le faire desjuner, et n'oublier a emplir sa bouteille de bon vin. Cela fait, il prendra du vin aigre dedans le creux de sa main, et le mettra aux nazeaux de son Chien pour les luy destoupper, a fin qu'il ayt meilleur sentiment. Alors s'en ira aux boys, et si d'avanture il trouuoit en allant quelque Lieure, Perdrix, ou autre oyseau ou beste couarde, vivant du grat et pasture, c'est mauuais presage pour luy: mais s'il rencontre quelque beste ou oyseau magiques, vivans de chair, comme Loups, Regnards, Corbeaux, et leurs semblables, c'est fort bon augure pour luy. Faut bien qu'il se garde d'arriuer trop matin aux tailles, et gettes, là ou il pensera que les Cerfs releuent et facent leur viandy, car les Cerfs de repos sont volontiers leur ressuy dedans la taille: et encores qu'ilz soyent retirez en leur fort, s'ilz sont Cerfs malicieux, ilz retournent aucunesfois au bort de la taille, pour veoir s'ilz orront ou verront rien qui leur puisse nuire. Et si de fortune ilz auoyent le vent du Veneur, et de son Limier, ilz se pourroyent desbucher de leurs demeures, et aller en d'autres, principalement a la haute saison. Lors que le Veneur verra qu'il sera heure de se mettre en queste, il faut qu'il mette son Chien deuant luy, et prene le deuant des tailles ou des fortz. Et s'il vient a rencontrer d'un Cerf qui luy plaise, il doyt bien regarder

s'il va de bon temps ou non : et le pourra cognoistre, tant  
 a la façon de faire de son Chien, qu'a son oeil. Car en  
 regardant les routes ou voyes par ou le Cerf passe, il  
 verra souuentefois l'esgail abbatu, ou les foulées frai-  
 chës, ou bien la terre en la forme du pied enleuée de frais,  
 et autres iugementz par lesquelz pourra cognoistre que  
 le Cerf va de bon temps. Et ne faut pas qu'il s'arreste  
 a un tas de resueurs, qui disent que quand on trouue  
 des arentelles dedans la forme du pied du Cerf, que c'est  
 signe qu'il va de hautes erres. Telle maniere de gens y  
 seroit souuentefois trompée: car incessamment les arentel-  
 les tombent du Ciel, et ne sont point filées des areignées. Ce  
 que i'ay veu par experience d'un Cerf qui passoit a cent  
 pas pres de moy, là ou i'allay soudainement veoir, ie n'y  
 sceu iamais estre a temps que les filandres ou arantelles  
 ne fussent tombées dedans la forme du pied. Il y ha en-  
 cores une autre chose là ou ilz s'amusement, qui me sem-  
 ble estre de peu de valeur. C'est que quand ilz veoyent  
 l'eau clere dedans le pied, es lieux molz là ou le Cerf au-  
 ra passé, ilz disent estre signe qu'il va aussi de hautes er-  
 res, sans auoir regard si les terres sont abbreuées d'eau  
 ou non : si est ce qu'ilz peuvent bien penser que si  
 elles sont abbreuées, les petites sources qui passent par  
 les venes et conduitz d'icelle terre, remplissent d'eau la  
 forme du pied, et l'esclercissent soudainement. Qui sont  
 les causes pourquoy le Veneur y doyt bien regarder, et  
 ne s'amuser du tout a son Chien, car il y en ha qui trom-

pent souuent leurs maistres, et principalement les Chiens de haut nez: lesquelz ne valent gueres pour le matin: a cause de l'esgail, et a telle heure tirent fort laschement, faisant peu de compte des voyes, comme si un Cerf alloit deuant eux de hautes erres. Mais quand le Soleil ha donné dessus, et qu'il ha attiré le sentiment de la terre, l'esgail estant tombé, a l'heure ilz ont bon nez, et font bien leur deuoir.

Pour reuenir donc a nostre premier propos, Si le Veneur rencontre d'un Cerf qui luy plaise, allant de bon temps deuant luy, et que son Chien le desire bien, il le doyt tenir de court, de peur qu'il caquette, et aussi qu'un Chien suyt mieux au matin, estant tenu de court qu'autrement: combien qu'il y ha des Veneurs qui leur donnent la longueur du traict, ce qu'ilz ne doyuent faire. Apres qu'il aura reueu quel Cerf c'est, et qu'elles cognoissances il ha, faut qu'il le rende au couuert, et le rembusche s'il peut, en renoyant toutes les cognoissances, tant du pied que des portées, et foulées. Ce fait, faut qu'il iette ses brisées, l'une haute et l'autre basse, comme l'art le requiert. Et tout soudain, tandis que son Chien est eschauffé, il doyt prendre ses deuant, et faire ses enceintes deux ou troys fois: l'une par les grandz chemins et voyes, a fin de s'ayder de son ail: l'autre par le couuert, de peur que son Chien le suraille, car il aura tousiours


meilleur sentiment, par le couuert que par les voyes et chemins. Et s'il ne trouuoit le Cerf sorty de son enceinte, et qu'il mescrée auoir bien destourné, il s'en doyt aller a sa brisée, et prendre le contrepied pour leuer les fumées, tant du releué du soir que du matin, en regardant le lieu ou il ha fait son viandy, et dequoy: aussi pour veoir ses ruzes et malices, car par ses ruzes le Veneur pourra cognoistre ce qu'il fera estant deuant les Chiens: par ce que si au matin il fait ses ruzes en l'eau, ou bien dedans les chemins, quand il sera laissé courre deuant les Chiens, toutes les ruzes qu'il fera seront en mesmes lieux, et semblables a celles qu'il aura faiçtes au matin. Et par la le Veneur pourra garder l'auantage des Chiens, et des piqueurs. Que si d'auanture le Veneur trouuoit deux ou troys entrées, et autant de sorties, il doyt bien regarder laquelle entrée l'emporte allant de meilleur temps, et si les sorties ne sont point de la nuit: par ce qu'un Cerf sort et entre plusieurs-fois la nuit dedans son fort: ou bien si c'est un Cerf malicieux, il pourra faire de grandes ruzes, allant et reuenant sur luy plusieurs-fois: lors si le Veneur ne pouuoit venir a bout de toutes ces sorties, et entrées, ne sachant laquelle de toutes le pourroit emporter, il faut qu'à l'heure il prene ses cernes et enceintes plus grandes, et enfermer dedans toutes ses ruzes, entrées, et sorties. Puis quand il verra que le tout demeure en son enceinte, excepté seulement une

entrée

entrée par laquelle il pourroit estre venu des tailles ou gaignages, a l'heure faut qu'il mette son Chien dessus, et le face. s'il est possible, faulcer iusques au fort, car il faut presumer que ces voyes l'emportent. Et en ceste maniere se doyuent destourner les Cerfs, non pas comme font les Veneurs du iourd'huy, car depuis qu'ilz voyent qu'ilz ne peuvent venir a bout d'un Cerf, ilz se mettent a fouler les foriz pour le lancer, qui est souuentefois cause qu'ilz ne trouuent rien en leurs enceintes. Il y en ba quelques uns qui se fient en leurs Chiens, et quand ilz rencontrent d'un Cerf, ilz le brisent seulement a l'entrée du fort, et s'en vont au dessoubz du vent, et si leurs Chiens en veulent au vent ilz ne font point d'enceinte, mais se contentent de cela: telle sorte de gens se fient plus en leurs Chiens qu'en leur oeil. Et me semble qu'un bon Veneur ne doyt iamaiz faire cas d'un Chien qui en desire au vent, parce qu'il ne met iamaiz le nez a terre, qui est cause qu'il trompe bien souuent son maistre.

Comme le Veneur doyt aller en queste aux tail-  
les ou gaignages, pour veoir le  
Cerf a veuë.

Chappitre XXX.



**L**E VENEUR doyt regarder le soir auant, , en  
quel pays les Cerfz releuent : et si c'est dedans les tail-  
les, il faut qu'il regarde par quel lieu il pourra venir  
le lendemain a bon vent : et aussi qu'il choisisse quelque  
bel arbre sur le bort de la taille, de laquelle il pourra

Veoir a son aise toutes les bestes qui seront dedans.

Le lendemain se doyt leuer deux heures avant iour, et aller au boys : puis quand il sera arriué pres des demeures, faut qu'il laisse son Chien en une maison, ou bien s'il ha un garçon avec luy, il luy pourra donner a garder, le faisant demeurer en quelque lieu, ou il le pourra trouver s'il en ha affaire. Alors s'en doyt aller a son arbre qu'il aura remarqué le soir avant, et monter dedans, regardant en la taille : et s'il veoit quelque Cerf qui luy plaise, faut qu'il regarde quelle teste il porte, et ne doyt bouger de là insques a ce qu'il le voye rembuscher au fort. Puis quand il verra qu'il sera au couuert, faut bien qu'il regarde l'endroit, et le lieu par ou il entre, et le remarquer a quelque petit arbre, ou autre chose qu'il pourra veoir. Ce fait, il descendra secrettement de son arbre, et s'en ira querir son Chien. Mais faut qu'il note un secret, c'est qu'il ne doyt aller destourner le Cerf d'une bonne heure apres qu'il l'aura veu, par ce qu'aucunes-fois les Cerfs font leur ressuay au bord du fort, ou bien resortent dedans la taille, pour escouter s'ilz orront ou verront rien qui leur nuysse, comme i'ay dit cy deuant : qui est la raison pourquoy le Veneur n'y doyt aller si soudain. Et si d'avanture en faisant son enceinte, il oyoit les Pies ou Geays caquetter, il faut qu'il se retire, car ce seroit signe que le Cerf seroit encores debout. Il pourra retourner environ demye

heure apres faire son enceinte. Estant bien destourné, s'en ira a l'assemblée faire son rapport, et déchiffrer la teste du Cerf qu'il aura veu, et tous autres bons signes qui y pourront estre, et si de fortune il leve les fumées, les doyt mettre en sa trompe, et les y porter.



Comme le Veneur doyt aller en queſte aux petites  
couronnes de tailles defrobées, qui ſont par  
le milieu des fortz.

Chap. xxxi.



**B**IEN ſouvent les Cerfz malicieux, qui ont autre-  
fois eſté couruX et chaffeZ, ſe recellent longue-  
ment ſur eux, ſans ſortir de leur fort, et ſont leur vi-  
andy en quelques petites tailles et coupes defrobées, qui  
ſont par le milieu des fortz: et le ſont plus commu-

G

nement en May et Juing qu'en autre saison, par ce qu'en ces moys ilz ne vont gueres a l'eau, et se contentent de l'humidité et substance de la gette, et de l'esgail qui est dessus, lesquelz leur donnent suffisance. Mais en Juillet et Aoust que le boys durcist, et que les chaleurs sont vehementes, il faut qu'a l'heure ilz se decelent de leur fort pour aller a l'eau. Toutesfois en quelque saison que ce soit, ils ne se peuuent receler plus haut de quatre iours, sans sortir hors du buisson, pour beaucoup de raisons, dont l'une est, qu'ils veulent aller veoir là ou demeurent les autres bestes, ausquelles ilz esperent leur sauuegarde, a fin que s'ilz se voyoient couru des Chiens, de les donner en change, ou bien sortent pour aller aux gaignages: toutesfois quand ilz sortent, ilz se retirent en leur fort deux ou troys heures avant iour.

A telz Cerfz malicieux il faut que le Veneur en use en ceste sorte. Premièrement quand il sera aux boys en quelque beau buisson ou fort au bout d'une forest, et qu'il vient a rencontrer d'un Cerf de vieux temps, comme d'un ou deux iours, et que le pays fust fort rompu de ses vieilles erres, lors doyt prendre ses deuantz de tous costez, et si d'avanture il ne le trouvoit point en allé ne sorty de bon ne de vieux temps, il doyt presumer en luy-mesmes qu'il ne s'en va point, et qu'il se recelle sur luy dedans le fort. Alors doyt aller prendre le dessoubz du vent, et entrer dedans le

fort, tenant son Chien de court, en brossant le plus secrettement qu'il pourra. Et s'il veoyt que son Chien ayt le vent de quelque chose, et qu'a veoir sa contenance il fust pres du Cerf, il se doyt retirer arriere de peur de le lancer, et aller entrer par quelque autre endroit là ou le boys seroit plus cler. Puis s'il arrive a trouver quelques petites couronnes ou tailles desrobbées, là ou le Cerf auroit fait sa nuit, il en pourra reueoir a son aysé, et leuer les fumées. Mais faut icy noter une chose, c'est qu'il ne doyt pas aller en telz lieux qu'il ne soyt pour le moins neuf heures du matin, pour ce que telz Cerfs font aucunes-fois leur ressuuy dedans ces petites tailles, pour auoir la chaleur du Soleil: puis quand il vient sur les neuf heures, ilz se retirent a l'ombre, pour deux raisons principales, dont l'une est, pour la crainte des mousches et tabons, qui les tormenteroyent, s'ilz estoient au descouuert, l'autre pour la vehemente chaleur du Soleil qui seroit sur le Midy.

Et faut bien que le Veneur se prene garde d'entrer guere auant dedans le fort, par ce que telz Cerfs demeurent aucunesfois a la longueur du traiet de ces petites tailles desrobbées, d'autant qu'ilz n'y ont point de crainte ne d'ennuy: mais leur suffit seulement d'estre au couuert, et aussi qu'ilz se releuent en telles tailles des cinq heures du soir. A ceste cause doyt suffire au Veneur d'auoir reueu par pied, et leué les fumées du

Cerf, puis se retirer le plus secrettement qu'il pourra, sans s'amuser a regarder les portées, tenant son Chien entre ses bras. Et quand il sera assez loing de là, doyt contre-faire le bergier, ou bien sonner de quelque flageau, de peur que le Cerf ayt heu le vent de luy, et qu'il se soit lancé : car en ioüant, des instrumens ou chantant, il se pourroit rassseurer. Apres pourra arrester demye heure ou plus en quelque lieu, pour le laisser assseurer, puis referra son enceinte. Et si d'auanture il ne pouuoit leuer les fumées, et que le pays fust si feutré d'herbe qu'il n'en peüst reuoir par pied a son ayse, lors doyt mettre le genoil en terre, ayant son Chien derriere luy, regardant aux foulées des feuilles, et de l'herbe, si elles sont bien estraintes, mettant sa main dedans la forme du pied : et s'il ueoit qu'elle ayt quatre doigts de largeur, il le peut iuger Cerf de dix cors par les foulées, mais s'elle n'auoit que trois doigtz de largeur, il le doyt iuger ieune Cerf.

Comme le Veneur doyt aller en queſte  
aux gaignages.

Chappitre. XXXII.



**I**L faut icy entendre qu'il y ha difference entre gaignages et tailles, car ce que nous appellons gaignages sont champs et iardins ou croissent toutes especes de bledz, et potages : et quand les Cerfs vont là viander, nous disons qu'ilz ont esté aux gaignages. Il faut que le Veneur se leue matin pour aller en queſte en telz lieux, par ce que les bonnes gens des vil-

lages, qui sont es enuironz, se leuent des l'aube du iour, pour mettre leur bestail aux champs, qui est cause que les Cerfz se retirent de bonne heure en leur fort. Et aussi que les Vaches, Cheures, Brchis, et plusieurs autres bestes, romperoyent les voyes ou routes, par ou le Cerf auroit passé, qui seroit cause que le Veneur n'en pourroit reuoir, ne son Chien auoir sentiment. Et par ainsi faut qu'il aille en queste au plus matin.

Comme le Veneur doyt aller requester le Cerf, qui aura esté couru & failly le iour auant.

### Chappitre XXXIII.

**I**L ARRIVE bien souuent qu'on faut a prendre le Cerf a force, en beaucoup de sortes. Aucunes-fois a l'occasion des grandes chaleurs, ou bien qu'on est surprins de la nuit, et en plusieurs autres manieres, qui me seroyent prolixes a narrer. Quand telles choses arriuent, il faut se gouuerner en ceste façon.

Premierement, ceux qui accompaignent les Chiens doyuent ietter vne brisée aux dernieres voyes ou erres, là ou ilz laisseront le Cerf, a fin de le retourner quester le lendemain des le point du iour, avec le Limier, et les Chiens de la meute apres eux. Car quand il est question de requester vn Cerf, il ne faut faire rapport, n'assemblée, par ce qu'on ne sçait si la suyte sera longue, n'en quel pays il sera allé: par ce que communement Cerfz couruz vont tant qu'ilz ont force, puis s'ilz

trouuent quelque eau ilz s'arrestent longuement dedans et se roidissent en telle sorte les membres, qu'au sortir d'icelle ilz ne peuvent pas aller gueres loing, et a l'heure sont contrainctz de demeurer en quelque lieu que ce soit, mais qu'ilz soyent au couuert, faisant leur viandy de couché, de ce qu'ilz peuvent trouuer autour d'eux.

Quand les Veneurs seront arrivez aux dernieres voyes ou aura esté mise la brisée, ilz se doyuent departir: et celui qui aura le meilleur Chien, et de plus haut nez, doyt prendre le droit, et faire suyure son Chien sur les routes, en le tenant de court, n'ayant crainte de le faire sonner et appeller. Les autres doyuent prendre les deuans au loing, par les fraischeurs, et lieux commodes, pour en reuoir a leur ayse, et pour le sentiment de leur Chien. Et si de fortune l'un d'eux le trouuoit passé, il se doyt mettre apres, et faire suyure son Chien, en huchant ou sonnans deux motz de la trompe, pour appeller ses compaignons, et pour faire approcher la meute. Les autres l'ayant ouy, incontinent doyuent aller a luy, et regarder tous ensemble si c'est leur droit: et s'ilz cognoissent que ce soit luy, faut qu'ilz laissent suyure le Chien qui desirera le mieux les voyes: et les autres se doyuent departir et reprendre encores les deuantz au loing. Et si d'auanture ilz le trouuoient entré en quelques belles demeures, faut qu'ilz facent approcher les Chiens d'eux, et faulcer au trauers du fort. Et s'ilz arrivent a renoueller les voyes dedans le fort,

doyuent bien regarder si c'est point du change. Mais si celuy qui fait la suytte cognoist que ce soit son droit, doyt sonner deux motz pour appeller ses compaignons, et pour aduertir les piqueurs qu'ilz se donnent de garde, par ce que son Chien renouuelle les voyes. Et si de fortune il vient a le lancer, et qu'il trouue cinq ou six reposées l'une aupres de l'autre, il ne s'en doyt pas estonner, car volontiers les Cersz trauailleZ, et mal menéz, font plusieurs reposées, les vnes pres des autres, par ce qu'ilz ne se peuuent tenir debout, mais faut qu'ilz viandent de couché. Les ieunes Veneurs qui n'entendent ce secret, y sont souuentes fois trompez, car quand ilz voyent tant de reposées, ilz pensent que ce soit une harde de bestes, et faut bien qu'ilz y regardent.



Comme le Veneur doit aller en queste  
aux hautes fustayes.

Chappitre XXXIIII.



**Q**UAND le Veneur ira en queste aux hautes fustayes, il faut premierement qu'il regarde deux choses : sçavoir est, la saison ou il sera, et les demeures de la forest. Car si c'est en la haute saison, les takons, mousches, et autres vermines chassent les Cerfz des fustayes, et aussi qu'ilz s'escartent

G v


aux petis fortz pres des gaignages.

Il y ha des forestz de diuerses sortes : les vnes sont fortes de boussieres , les autres ont par le milieu des couronnes de brandes , il y en ha d'autres qui sont enuironnées de tailles. Et par ainsi faut que le Veneur se gouuerne selon le pays qu'il verra. Car aucunes fois les Cerfz demeurent dedans les petites couronnes de brandes , soubz quelque petit arbre au descouuert , ou bien deffoubz les fustayes , ou au bort d'icelles , en quelques petites broffes. Et faut qu'en telz lieux le Veneur face ses enceinctes grandes ou petites selon les demeures , par ce que si on lance un Cerf dedans les fustayes on ne le cuydera plus destourner, n'approcher : et si le Veneur est sage , il n'en fera point de rapport.

I'en parleroy plus au long , mais ie voy que les Veneurs qui viendront apres nous , n'auront pas grand' peine a chercher les Cerfz aux fustayes.



Du lieu ou se doit faire l'assemblée, & comme elle se  
doit faire. Chap. XXXV.




**L'**ASSEMBLEE se doit faire en quelque beau lieu, sous des arbres, auprès d'une fontaine ou ruisseau, là ou les Veneurs se doivent tous rendre, pour faire leur rapport. Ce pendant le Sommelier doit venir avec trois bons cheuaux, chargez d'instrumentz pour arroser le gouzier: comme couretz, barraux, barilz, flacons et bouteilles, lesquelles doivent estre pleines de bon vin d'Arbois, de Beaulne, de Chalocce, et de Graue. Luy estant descendu de Cheual les mettra rafraischir en l'eau, ou bien les pourra faire refroidir avec du Canfre: apres il estendra la nappe sur la verdure. Ce fait, le cuysinier s'en viendra chargé de plusieurs bons har-nois de gueule, comme iambons, langues de Beuf fumées, groings et oreilles de Pourceau, ceruelat, eschineés, pieces de Beuf de saison, carbonnades, iam-bons de Mageance, pastez, longues de veau froides, couuertes de poudre blanche, et autres menuz suffra-ges pour remplir le boudin: lesquelz il mettra sur la nappe. Lors le Roy ou le Seigneur, avec ceux de sa table, estendront leurs manteaux sur l'herbe, et se coucheront de costé dessus, beuuans, mangeans, rians, et faisans grand chere. Et s'il y ha quelque femme de reputation en pays, qui face plaisir aux compai-gnons, elle doit estre alleguée, et ses passages et re-muement de fesses, attendans le rapport a venir. Puis quand tous les Veneurs seront arrinez, ilz

feront leur rapport, et presenteront leurs fumées au Roy, ou au Seigneur a qui ilz seront, les uns apres les autres, en racòmptant chascun de ce qu'il aura veu. Les ayant escouteZ, et veu les fumées, il pourra choisir le Cerf qu'il voudra courir, et qui sera en la plus belle meute. Et dira a celuy qui l'aura destourné, qu'il veut aller a sa brisée, puis s'en iront tous boire.

**I**'A Y mis cy deuant comme il faut faire le rapport, n'ayant veu du Cerf que par pied, ou par les portées, et autres cognoissances, et comme il faut parler entre les maistres. Mais d'autant qu'il se trouuent aucunesfois quelques Veneurs favorisez de leurs maistres, lesquelz vont chercher les grandz vieux Cerfz, se leuans matin pour les veoir a la taille, ie leur ay bien voulu icy descripre le rapport tel que le voudrois faire deuant le Roy, suppliant les maistres d'excuser les fautes.

Comme il faut faire son rapport, ayant veu le Cerfa veuë, en  
la haute saison. - Chap. xxxvi.





**D**E V A N T le Roy viens pour mon rapport faire,  
Le saluânt, vn chascun se doit taire:  
Lors de matrompe ie tire mes fumées,  
Sur vertes fueilles les luy ay presentées:

**S**Ire, voyla d'un beau Cerf de dix cors,  
Que ie mescroy destourné en telz fortz:  
Quand les aurez par tout bien regardées  
Les trouuerez longues, oinctes, formées,  
Grosses, nouées, n'ayans aucun piquon,  
Mais bien mouluës, monstrans sa venaison.

Et s'il s'enquiert lors quelle teste il porte,  
Tout froidement respons luy en la sorte.

Sire, ainsi comme alloys faisant ma queste,  
Mon Chien au vent se rabat d'une beste:  
L'ay tins decourt, & de pres l'ay suiuy:  
L'ay apperceu le Cerf au viandy,  
Ayant la teste haute, ouuerte & paumée,  
Et en tous pairs me semble bien sommée.  
Il est Cerf brun, portant dix & huyt cors,  
Fort haut sur iambe, & assez long de corps,  
Le mesrain gros, par bon ordre obseruée,  
Grand tour de meule, & pres du test perlée,  
D'un beau teint noir me semble estre brunie:  
Et pour tout signe, ell' est fort bien nourrie.  
Après l'auoir de mon œil bien choisy  
Me retiray, attendant son resfluy.

**H**

Puis quand i'ay veu qu'il estoit pres de l'heure  
 Qu'il fust aulieu ou il fait sa demeure,  
 Prens les deuantz pour l'aller rembuscher:  
 Mon Chien au vent cuyde son traict casser.  
 Entrant au fort ha ietté ses fumées,  
 Que i'ay leué, y mettant mes brisées,  
 Par les chemins prens encceincte es deuantz,  
 Ou i'ay trouué maintz autres Cerfz passantz,  
 Ieunes & vieux reuoy de toute sorte.  
 Mais quant au mien ne trouue point qu'il sorte.  
 Puis s'il s'enquiert quel pied de Cerf c'estoit:  
 C'est vn pied long, si l'œil ne me decoit,  
 La pince grosse, & les os gros & courtz,  
 La iambe large, ongle fermé tousiours,  
 Fort bas ioincté, & le pied gros & creux,  
 Cerf bien courable, & deuant tous Veneurs.

Des motz & termes de Venerie que doit entendre le

Veneur pour faire ses rapportz, & pour par-  
 ler deuant les bons maistres.

Chap. XXXVII.

*J'AY bien voulu declairer icy les motz et termes  
 de Venerie, et comme vn ieune Veneur doyt  
 parler entre les bons maistres. Premièrement, faut  
 qu'il soit posé, et moderé en parolles, car tous Veneurs  
 estans curieux du plaisir de leur estat, sont volontiers*

sobres de la bouche. Mais aujourd'huy ilz prennent plus de plaisir aux bouteilles qu'à leur mestier. Si d'avanture il aduenoit qu'un ieune Veneur se trouuast avec les maistres, et qu'ilz luy demandassent comme se doyuent appeller les fiantes des Cerfz, Rangiers, Cheureulx, et Dains, lors doyt respondre, qu'elles se doyuent nommer fumées, et que de toutes bestes viuentes de broust, elles se doyuent ainsi nommer. Mais celles des bestes mordantes, comme Sangliers, Ours, et leurs semblables, se doyuent nommer lesses. Et celles des Lieures et Connilz, se nomment crottes. Celles des autres bestes puantes, comme Taissons, Regnardz, fiante. Celles de la Loutre se doyuent nommer espraintes. Apres si on luy demande comme se doyt nommer le manger du Cerf, en termes de Venerie, et des autres bestes a luy semblables, doit dire qu'il se nomme viandis, comme disant : Voicy ou le Cerf ou Cheureul ha fait son viandis. Et des Sangliers et autres bestes mordantes, il faut dire mangeures, comme disant : Voicy ou le Sanglier ha fait ses mangeures.

Il y ha aussi difference entre les piedz des bestes mordantes, et ceux des Cerfz : car ceux des Ours et Sangliers se doiuent nommer traces, mais ceux des Cerfz, Cheureulx, Dains, et Rangiers, se doyuent nommer piedz ou foyes, tous les deux sont bien ditz. Aussi faut sçauoir qu'il y ha difference entre gaignages et tailles.

*Les gaignages se prennent pour champs et iardins , là ou sont semez les bledz , et potages. Et si un Cerf faisoit sa nuit dedans les champs , le Veneur doit dire qu'il ha fait son viandis dedans les gaignages : et s'il fait sa nuit dedans les tailles , il pourra dire qu'il ha fait son viandis dedans la taille.*

*Le ieune Veneur doit aussi entendre qu'il y ha difference entre routes , et voyes , car les voyes s'entendent pour les grans chemins , et les routes se prennent pour les petis sentiers , qui trauesent les fortz : Et quand le Veneur verra aller un Cerf le long d'un grand chemin , il doyt dire , que le Cerf va la voye : et s'il le vecit aller le long des petis sentiers , doyt dire que le Cerf va la route.*

*Il y ha aussi difference entre routes et erres , car (comme i'ay dit) routes sont petis sentiers , et erres sont les alleures par ou une beste va , soit de bon , ou de vieux temps. Quant aux brisées elles se peuuent nommer bacées ou brisées , lequel qu'on voudra. Il y ha maniere de les mettre , car il faut que le bout rompu soit mis par ou entre une beste.*

*Quand le Veneur va lancer un Cerf , Dain , ou Cheureul , et autres semblables , il doyt parler a son Chien en criant , Voylecy , Vayauant , comme parlant en singulier , et a un seul : mais aux Sangliers , Ours , et leurs semblables , doit parler en plurier , comme a plusieurs , disant , Veles-cy , allez. Quand un Cerf vient*

de viander es gaignages , il est volontiers mouillé de l'esgail , et ne se veut pas mettre en son liét qu'il ne se soit seché a la chaleur du Soleil , et se couche communement sur le ventre, en quelque beau lieu au descouvert , ce lieu là se doit nommer ressuÿ , comme disant : Voicy ou le Cerf ha fait son ressuÿ.

Semblablement les lieux ou les Cerfsz , Dairs , Sures , et leurs semblables se couchent pour dormir le iour , se doyuent nommer liétz , reposées , ou dambres : mais ceux des Sangliers et leurs semblables se nomment bauges.

Après , si un Veneur vient a faire son rapport , il doyt dire entierement ce qu'il ha veu. Et si il n'auoit reueu du Cerf que par pied , et qu'on luy demande quel pied c'est , doyt confronter le pied tel qu'il est , comme disant , C'est un pied long ou rond , ayant telles cognoissances , avec tous autres bons signes qu'il y pourra auoir veu : ainsi pourra-il faire des alleures et portées. Mais si d'auanture il voyoit le Cerf a veüe , ayant heu le loysir de le choisir , si on luy demande quel Cerf c'est , et quelle teste il porte , pourra respondre , qu'il est de tel pelage , brun ou fauve , et tel de corsage ainsi qu'il aura veu , portant la teste haute , ou basse , ou contrefaïcte , comme elle sera. Et si d'auanture elle estoit faux-marquée , comme si il n'y auoit que six cors d'un costé , et sept de l'autre , il doit dire , qu'il porte quatorze faux-marque , car le plus emporte le moins.


*Et s'il voyoit une belle teste haute, et grosse de mesrain, les andoillers pres du test, et bien cheuillée selon sa hauteur, il pourra dire qu'il porte une belle teste pour tous signes, bien née, et bien marquée en tous pairs: et selon qu'elle sera en la sommité, pourra dire qu'il porte paumeure, trocheure, ou couronneure, et combien d'espois il portera a ment: et par ainsi le Veneur fera son rapport selon qu'il verra la forme ou la façon de la teste. Et si on luy demande s'il se montre vieux Cerf par la teste, et a quoy il le cognoist, pourra respondre, qu'il le cognoist aux meules, lesquelles sont larges, et fort pierreuses, pres du suc et test de la teste: et aussi aux andoillers qui sont gros, longs, et pres de la meule: et tous autres signes que j'ay declairez cy deuant. Les ergotz qui sont derriere le pied du Cerf, ou Cheureul, et leurs semblables, se nomment os, comme disant: Voicy ou le Cerf ou Cheureul ha donné des os en terre, les ergotz des Sangliers se doivent nommer gardes.*

*Je donneray icy intelligence au Veneur comme il doit haut louer les Cerfz, selon les signes et iugementz qu'il pourra auoir veu. Premièrement, s'il veoit un Cerf n'ayant gueres le pied ne les alleures bonnes, et qu'a le veoir il n'eust porté que sa troisieme ou quatrieme teste, il le doit iuger Cerf de dix cors ieunement. Mais s'il en voyoit un autre qui eust les signes plus grans, comme ayant porté sa cinquiesme, sixiesme, ou septiesme*

teste, il le pourra iuger Cerf de dix cors, sans plus, mais passé la septiesme, il le pourra iuger Cerf de dix cors, et autresfois les ha portez : et au plus haist qu'il puisse louer le Cerf, c'est de le nommer grand vieux Cerf. Et par ainsi le Veneur fera ses rapportz selon les signes et iugementz qu'il verra. Il en pourra autant faire des Sangliers, car quand ilz laissent les compaignées, et qu'ilz demeurent tous seulz, ilz se doyuent nommer Sangliers venans en leur tiers an. L'année apres ilz se doivent nommer Sangliers en leur tiers an. L'autre année apres, ilz se pourront nommer Sangliers en leur quart an chassables. Et au plus haut qu'on le puisse louer, c'est, grand vieux Sanglier n'ayant point de refus. Si le Veneur voyoit une troupe de bestes fauves, il doit dire, i'ay veu une harde de bestes : mais s'il voyoit une troupe de bestes noires, doit dire qu'il ha veu une compaignée de bestes noires.

Comme il faut mettre les relays, & la maniere de relayer

Chappitre XXXVIII.



**I**L FAUT mettre les relays selon les saisons, et couppes des tailles : car au temps d'Hyuer que les Cerfs ont la teste dure, ilz suyuent les grans fortz : et au Printemps qu'ilz ont la teste molle et en sang, ilz suyuent les petites tailles, et les lieux les plus foibles qu'ilz peuvent trouver, de peur



de la heurter et bleſſer aux branches. Et pour ce il eſt requis y mettre des hommes qui ſoyent nourris ala Venerie, entendant bien leur meſtier, et avec eux un bon piqueur, monté ſur un bon courtaut, lequel piqueur doyt eſtre habillé legierement, ayant de bonnes bottes et bien hautes, ſa trompe au col. Phebus dit qu'il doit eſtre veſtu de vert pour le Cerf, et de gris pour le Sanglier: cela ne ſert pas de gueres, i'en remetz la couleur aux fantasies des hommes. Les piqueurs ſ'en doyuent aller au ſoir a la chambre de leur maiſtre, et ſ'ilz ſont au Roy, faut qu'ilz aillent a la chambre du grand Veneur, ou de ſon Lieutenant, pour ſçauoir leſquelz ſeront de la meutte ou du relays, et auquel relays ilz doyuent aller, et les Chiens qu'ilz doyuent mener, quelles aydes et valetz de Chiens iront avec eux. Ceux du relays doyuent prendre un petit bulletin, pour leur ſouuenir du nom de leur relays: puis ſ'en retourneront a leur logis pour chercher une guyde, qui les y mene le lendemain. Apres faut qu'ilz regardent ſi leurs cheuaux ſont bien ferrez, et bien en conche, en leur donnant de l'auoine a ſuffire. Ce fait, ſ'en iront coucher pour ſe leuer le lendemain deux heures auant iour. Si c'eſt en Eſté, faut qu'ilz facent abbreuer leurs cheuaux, et en Hyuer non: puis les faire bien repaiſtre, ce pendant que le valet de Chiens amenera le relays. La guide eſtant venue, ilz deſieuneront et diſneront tout enſemble, et au lieu de piſtoletauront la bouteille

pleine de bon vin, a l'arçon de la selle. Et quand le iour commencem a paroistre, faut qu'ilz montent a Cheual, ayans avec eux leur guyde, relays, et tout leur equipage. S'ilz veulent enuoyer un courtant a un autre relays, pourront dire a leur valet qu'il s'en aille avec un de leurs compaignons a un tel relays. Eux estans arrivez au lieu ou est assigné leur relays, ilz mettront les Chiens en quelque beau lieu, au pied d'un arbre, deffendant au valet de Chiens de ne les descoupler qu'ilz ne luy commandent, et qu'il ne bouge de là, et qu'il ne face point de bruyt. Alors s'en doyuent aller a trois ou quatre cens pas de là, du costé ou sera la chasse, et escouter s'ilz orront rien, et pour veoir le Cerf, car le voyant là, ilz le iugeront plus tost mal mené, qu'ilz ne feront pas de le veoir avec le bruyt: par ce qu'un Cerf mal mené, baisse volontiers la teste quand il ne veoyt personne, en demonstrant son trauail, mais quand il veoyt l'homme, il la hausse, et fait de grands bondz, pour donner a cognoistre qu'il c'est fort et vigoureux. Le piqueur se doyt esloigner pour une autre raison, c'est que les pages et valetz, qui tiennent les cheuaux, menent bruyt, en sorte qu'il ne pourroit pas ouyr la meute: aussi que les Cerfz oyent aucunes-fois le bruyt, ou bien ont le vent des Chiens, qui les feroit retourner, ou costoyer le relays. Qui est la cause pourquoy le piqueur se doyt tenir a l'escart, pour veoir et choisir le Cerf a son aise: et s'il pass a son relays,

doyt bien regarder s'il est balé, et mal mené, et aussi s'il orra la chasse venir apres luy.

Il me semble pour bien prendre le Cerf a force, qu'on ne le deueroit point relayer qu'on ne vist les Chiens de la meute, alors lon verroit bien chasser, et avec ce, la force et vîstesse des Chiens. Mais ie voy qu'aujourdhuy on ne prend point, le Cerf comme il merite, par ce qu'on ne donne pas le loisir aux Chiens de chasser, et n'y en ha que deux ou troys qui courent, d'autant qu'ilz se trouuent tant d'hommes a cheual, qui ne sçauent sonner, forbuer, ne piquer, lesquelz se meslent par-my les Chiens, les croisans, et rompans, tellement qu'il est impossible qu'ilz puissent courir ne chasser: a ceste cause ie dy que sont les cheuaux qui chassent, et non pas les Chiens. Je donneray icy le moyen au valet de Chiens de lascher le relays, quand le Cerf aura passé.


Le valet doyt mener ses Chiens bardez sur les voyes, et leur faire suyure troys ou quatre pas le droit, puis en doyt laisser aller un, et s'il veoit qu'il dresse, pourra descoupler les autres, et sonner pour Chiens. Car s'il laissoit aller son relays de loing, il pourroit prendre le contrepied, qui seroit une grande faute. Autrement, si le Cerf estoit accompagné de quelques bestes, le piqueur qui sera au relays doyt piquer en teste, pour essayer a departir le Cerf, et s'il se depart, faut

descoupler les Chiens sur les voyes. Et si le piqueur estoit au relays sur le bort d'un estang, et que le Cerf y vint, il le doyt laisser baigner a son ayse, sans sonner mot : puis quand il sera sorty, faut que le valet s'en aille avec les Chiens là ou il sera sorty, et descoupler ses Chiens sur les voyes, comme dessus, là ou faut qu'il ne les abandonne iamais, sonnans apres eux, pour appeller de l'ayde, en brisant par tout ou il en verra : a fin que si ses Chiens prenoient le change, et qu'ilz s'escartassent de leurs droictes voyes, de retourner a sa derniere brisée pour requester le Cerf. Phebus dit qu'il faut reprendre les Chiens qui vont de forlonge derriere, quand le Cerf aura passé le relays. Mais quant a moy ie ferois du contraire, pour autant que les Chiens le la meute, qui ont desia couru longuement, maintiennent mieux leurs voyes, et ne prennent pas si tost le change, que feroient des Chiens fraichement relayez. Il est bien vray que s'il y auoit quelques vieux Chiens qui vinssent derriere, balançans apres la meute, les piqueurs ou valetz de Chiens, qui seront demourez derriere, les pourront appeller apres eux, et les mener au deuant de la meute : ou bien s'il y auoit faute de relays, et qu'on vist que le Cerf s'en allast en quelque lieu, ou il n'y auroit gueres de change, et qu'il fust contraint de retourner sur ses pas, aussi qu'il y eust de bons Chiens deuant, qui le maintinsent, alors pourroit on prendre les derniers Chiens, et les garder pour son retour.

Si d'avanture il aduenoit que le piqueur, estant a son relays, vist passer vn Cerf de dix cors, et qu'il y eust apres le Cerf quatre ou cinq Chiens, et qu'il n'oüist les autres piqueurs, ne leur trompe, faut bien qu'il regarde si le Cerf est halé; et quelz Chiens sont qui le chassent: s'il voyoit que se fassent des bons Chiens de la meute, gardans mieux le change, le piqueur doyt sonner pour Chiens, tant qu'il pourra, pour appeller des aydes. Et si de fortune il ne venoit personne, il se doyt mettre apres les Chiens de la meute, et descoupler son relays, sonnans et buchans tousiours, en iettant des brisées par ou il passera, et sur les voyes du Cerf. Il faut bien que le piqueur soyt sage a telles choses, par ce qu'aucunes-fois il se peut lancer quelques autres Cerfz, d'effroy, au bruyt de la meute, et des piqueurs, qui pourroyent estre grans Cerfz, se montrans halez, et principalement quand ilz ont de la venaison. Mais s'il voyoit que les bons Chiens de la meute n'y fussent pas, et qu'il n'oüy point la chasse, il ne doyt pas relayer, mais seulement regarder le pays qu'ilz prennent, et les briser au bout de sa veüe, a fin que s'il oyoit la meute en deffaut, de si en aller, et leur dire qu'il ha veu le Cerf qui ha passé a son relays, lequel est fauve, ou brun, ainsi qu'il voudra nommer, portant vne telle teste. Alors pourront iuger si c'est leur Cerf ou non, et le pourront aller requester, et reprendre leurs voyes a la brisée du piqueur.

Comme le Veneur doyt lancer le Cerf, & le  
donner aux Chiens.

Chappitre XXXIX.



**A**PRES que le Roy ou Seigneur aura ouy tous les  
rapportz, et que les relays seront bien asis, les  
Veneurs et Chiens ayans repen, celuy qui aura destour-  
né le plus vieux Cerf, et en la plus belle mente,  
soubz le rapport duquel le Roy ou Seigneur vouldra  
aller courir, doyt prendre son Limier, et s'en aller de-

uant a sa brisée, avec ses compagnons, et tous les piqueurs de la meute: lesquelz doyuent auoir chascun une bonne houssine en la main, que Phebus nomme tortoïere, pour tourner les branches en piquant, par les fortz: laquelle ne doyt point estre pelée, que le Cerf n'ayt touché au boys, mais apres qu'il ha frayé, elle doyt estre pelée. Eux estans arriuez a la brisée, faut qu'ilz mettent pied a terre, pour veoir quel pied de Cerf c'est, qu'elles cognoissances, et autres iugementz qu'ilz pourront auoir par le pied, a fin de le recognoistre par-myle change. Puis quand le Roy sera arriué, et les Chiens de la meute, tous les piqueurs se doyuent vistement escarter au tour du buysson, pour veoir le Cerf, s'il est possible, au partir du lancer, a fin de recognoistre le pelage, et la façon de la teste. Alors que le Veneur, qui l'aura destourné, verra tous ses compaignons apres de luy, avec les Chiens de la meute, se doyt mettre devant tous les autres, et frapper a route, car l'honneur luy appartient, et puis tous les autres apres luy, criant, Voylecy aller, Voylecy aller, Voylecy aller, par les portées, Rotte, rotte, et autres termes requis a la chasse du Cerf. Ex faut entendre deux secretz, dont l'un est, que les veneurs ne doyuent pas trop faire eschauffer leurs Chiens a la brisée, par ce que leur chaleur les transporteroit hors des erres, et ne suyroient pas le droit. L'autre secret est, que les Chiens de la meute doyuent suyre les routes par ou va le



*Cerf, et les Limiers : mais ilz ne doyuent point appro-*  
*cher plus pres des Limiers ne des Veneurs, que de soi-*  
*xante pas, de peur que si le Cerf auoyt fait quelques ru-*  
*zes et houruariz dedans le fort, qu'ilz ne rompissent les*  
*erres, que les Limiers n'eussent l'espace de retourner pour*  
*les desmesler et redresser : par ce que bien souuent Cerfz*  
*malicieux, quand ilz se veulent mettre a la reposée,*  
*font volontiers des ruzes. Et si les Chiens de la meu-*  
*te estoyent si pres des Limiers, ilz romproyent les erres*  
*et voyes, qui seroit cause que le Veneur ne les pour-*  
*roit redresser. Et s'il aduenoit que le Limier, en fai-*  
*sant sa suyte, fouruoyast les droictes erres, il faut que*  
*le Veneur le retire, en disant, Hourua, hourua, et*  
*qu'il retourne chercher son droit. Puis s'il ueoit que*  
*son Chien redresse ses erres, doyt incontinent le Veneur*  
*mettre le genouil en terre, pour en reueoir par pied,*  
*par les portées, ou autres cognoissances. Et s'il en re-*  
*ueoit, et qu'il cognoisse que ce soit son droit, doyt*  
*crier et hucher fort haut, Voylecy aller, Il dit vray,*  
*Voylecy aller le Cerf, Rotte valet, rotte, rotte : et ietter*  
*une brisée en ce lieu là, tant pour les Veneurs, qui*  
*viennent apres luy, que pour monstrier a ceux qui a-*  
*menent les Chiens de la meute, que le Cerf va là.*  
*Et si les Chiens de la meute estoyent trop loing de*  
*luy, il doyt crier : Approche les Chiens, ou bien sonner*  
*deux motz de la trompe, en faisant des brisées hautes*  
*et basses, par tout ou il en verra : a fin que s'il perdoit les*  
*voies*



voyes ou erres, qu'il vint rechercher sa dernière brisée. Puis s'il veoit que son Chien renouvelle les voyes, et qu'il commence a approcher pres du Cerf, il le doyt tenir plus de court qu'au parauant, de peur que s'il le lançoit d'effroy, que son Chien ne le transportast au vent sur les erres, de sorte qu'il n'en peust veoir la reposée, pour en auoir certain iugement par icelle, ou par les foulées. Mais si d'auanture il oyoit lancer le Cerf, ou qu'il trouuast le liēt ou reposée, il ne doyt pas sonner si tost pour Chiens, mais crier seulement, troys fois, Gare gare, Gare gare, Gare gare, et faire suyure son Chien iusques a ce qu'il en puisse reueoir a son aise, pour en auoir iugement certain par les fuytes, premier que de forbuer. Et si en suyuant il trouuoit ses fumées, doyt bien regarder si elles sont semblables a celles qu'il aura apportées au matin a l'assemblée: combien qu'aucunes-fois elles se peuvent mes-iuger en deux manieres, ce qui n'aduiert pas souuent, si ce n'est au changement des viandis. Il est bien vray que les fumées du releué du soir ne sont semblables a celles du matin, que le Cerf se retire au fort pour se mettre a la reposée, par ce que celles du releué sont plus pressées, plus moulues et mieux digerées que celles du matin: la raison est qu'il ha reposé et dormi tout le iour, qui est cause de la digestion. Et au contraire, celles du matin ne sont si bien digerées ne moulues, par ce que toute la nuict il ha faict que courir et traualier pour chercher a vian-

der, et n'ha pas beu le repos, ne le loisir de digerer ne moudre son viandy : toutes-fois qu'elles se doyuent ressembler de forme, si le viandy ne les fait mes-ingier, comme i'ay dit. Autrement si le veneur trouuoit la reposée du Cerf, il doyt mettre sa face dedans, ou le doulx de sa main, pour sentir si elle est chaude. Aussi le pourra cognoistre a son Chien qui s'efforcera et doublera sa voix : tous ces signes donneront a entendre qu'il est lancé, et debout.

Il y ha des Cerfs qui sont si malicieux, qu'au partir de leur liêt ne font que tournoyer, pour chercher le change, ou bien ont quelque Brocquard avec eux, qui est la cause que le Veneur ne doyt pas sonner pour Chiens au partir de la reposée, mais seulement crier, Gare, gare, approche les Chiens, et faire suyure son Limier sur les erres, enuiron de cinquante pas. Mais quand il verra que le Cerf commencera a dresser par les fuytes, lors qu'il en aura cognoissance certaine, pourra sonner pour Chiens, en criant, Tya billaud, faisant suyure son Limier tousiours sur les erres et fuytes, criant et sonnant iusques a ce que les Chiens de la meute soyent arrivez a luy, et qu'il verra qu'ilz commenceront a dresser. Et se doyt incontinent mesler parmy eux avecques son Limier, pour les resioiyr et eschauffer. Puis quand il verra qu'ilz seront bien amenteux, courans bien le droit, pourra sortir du fort,

donnant son Chien à son valet, et monter a Cheual, s'en allant tousiours au dessoubz du vent, coustoyant la meute, pour leuer les deffaux. Mais s'il aduenoit que le Cerf, en tournoyant sur sa meute par my son fort, eust donné le change, ilz doyuent tous menacer et rompre les Chiens, puis les recoupler, en retournant prendre les dernieres erres, ou bien chercher la reposée, et frapper a route, iusques a ce qu'ilz ayent relancé leur Cerf: car Cerfz malicieux volontiers se iettent sur le ventre, et attendent que les Limiers soyent sur eux premier que de partir.

f ij

Les ruzes & secretz que doyuent scauoir les piqueurs  
pour reprendre le Cerf a force.

Chappitre XL.



**A**PRES auoir donné l'intelligence aux Veneurs  
des iugementz et cognoissances du Cerf, et comme  
ilz se doyuent gouverner en leur estat: i'ay sembla-  
blement voulu donner a entendre aux piqueurs, le  
moyen de prendre le Cerf a force, tant par le dire des  
bons et anciens Veneurs, que comme par experience l'au-

rois peu cognoistre. Et par ce qu'aujourdhuy il y ha tant d'hommes portans la trompe, de laquelle ilz ne se sçauent ayder, faisant plus de tort aux Chiens que de plaisir, d'autant qu'ilz n'ayment et n'entendent le mestier, et aussi que ie ueoy les Princes et Seigneurs qui n'y prennent pas grand plaisir, ayans les yeux bandez des richesses mondaines, pensans par icelles rendre leur nom et corps immortelz, qui est la perte de l'ame, et abbreuiation de la vie, principal bien du corps (aussi ne les ueoit on plus viure et regner si longuement, ne de tel plaisir qu'ilz faisoient ancienement du temps qu'on entendoit resonner les trompes par les forestz, avec nombre de bouteilles et flacons) il me sembloit chose vaine et inutile declairer ces matieres icy, n'eust esté l'esperance que i'ay aux adolescens, qui me cause mettre par escript et articuler tous les secretz de la Venerie.

Premierement, il faut que les piqueurs sachent qu'il y ha difference de parler aux Chiens entre la chasse du Cerf, et celle du Sanglier: par ce que le Cerf fuyt et s'esloigne d'eux quand ilz le chassent, ne se fiant qu'en ses iambes, et ne se deffend iamais s'il n'est forcé, a ceste cause faut parler aux Chiens en hautains et resioüyssans cris, tant de la bouche que de la trompe. Mais aux Sangliers et autres bestes mordantes, il faut faire le contraire, d'autant que ce sont bestes pesantes, qui ne

peuvent fuir ne s'esloigner des Chiens, se fians en leurs dentz et deffenses. A telz animaux il est requis de parler aux Chiens en crys et sons de trompes rudes et furieux, afin de les faire incontinent fuir. Et se faut tenir tousiours pres des Chiens, menant grand bruyt, de peur qu'ilz les tuent ou blessent. Quant aux Cerfz et autres bestes legeres, les piqueurs doyvent tousiours suivre les Chiens par la menée ou ilz vont, sans s'escarter ne croiser, de peur de lancer le change, et pour releuer les deffaux, n'approchant de la meute de plus pres que de cinquante pas, principalement au partir du des-couple, et des Chiens fraichement relayez: car si le Cerf faisoit des ruzes ou bouruaries, et que les piqueurs pressassent les Chiens, ilz romproyent les erres ou voyes du Cerf, et seroyent outrepasser les Chiens, qui seroit une grand' faute. Mais si les piqueurs voyoient que le Cerf eust couru une heure ou plus, et qu'il dressast, en s'esloignant de sa meute, pour se forpaïser, les Chiens estans bien ameutez sur les erres, alors pourront approcher de plus pres qu'auparavant, en sonnans de la trompe trois motz a chascune fois. Plus, faut entendre que quand le Cerf se veoit chassé des Chiens, il se deffait d'eux, et leur donne le change en plusieurs manieres, car il va chercher les bestes a leurs reposees, et les boute et fait valoir deuant eux, puis se iette sur le ventre en leur liêt, et laisse passer les Chiens outre, lesquelz n'en peuvent auoir le vent ne sentiment,

à cause qu'il met les quatre piedz soubz son ventre, et aspire son haleine en la fraischeur et humidité de la terre: tellement que i'ay veu plusieurs-fois les Chiens passer à un pas pres de luy sans en avoir le vent, ne le sentir aucunement. Et ha ceste malice de nature qu'il cognoist que les Chiens ont plus grand sentiment de son haleine, et de ses piedz, qu'ilz n'ont du reste de son corps. Et estant ainsi, il attendra les piqueurs à faire marcher les cheuaux sur luy premier que de partir.

Qui est la raison pourquoy ilz doyuent tousiours briser aux entrées des fortz, par ou le Cerf passera, à fin que s'il donnoit le change, de retourner incontinent chercher ses dernieres erres et brisées, par-ce qu'ilz ne pourront faillir de le relancer, en retournant là avec le Limier, ou avec les vieux Chiens sages de la meute, ausquelz ilz se doyuent fier. Car volontiers Chiens bien dressez, et qui gardent le change, si le Cerf se lance et bonte deuant eux, ilz ne sonneront mot: mais s'il y auoyt quelques ieunes Chiens folz, ilz efforceront leurs voix, et renouuelleront le change. Il faut bien qu'en telles choses les piqueurs soyent sages, et qu'ilz ne s'arrestent point aux ieunes Chiens, s'ilz n'entendent les vieux par-my eux. Et s'ilz sont deux piqueurs ensemble, l'un les doyt aller menacer et rompre, l'autre les doyt appeller au lieu ou s'est faict le deffault, et fouler fort, en les appellant et resioüyssant iusques à ce qu'il

ayt relancé son Cerf. Et s'il ouyroit quelqu'un de ses vieux Chiens sages qui sonnast, faut qu'il aille a luy, et mettre l'œil a terre, pour reueoir si c'est son Cerf. S'il cognoist que ce soit luy, faut qu'il sonne trois motz de sa trompe, en criant et nommant le Chien, Voylecy aller, Il dit vray, Voylecy aller le Cerf. Les autres piqueurs doyuent menacer les Chiens, et les faire aller a luy. Et a ceste heure la pourront renoueller les erres, ou le relancer. Plus : le Cerf donne le change en vne autre maniere, car soudain qu'il veoyt que les Chiens le chassent, et qu'il ne se peut deffaire d'eux, il va de fort en fort chercher les bestes, et les met debout, s'accompagnant avec elles, et les emmene et fait fuyr avec luy, sans les vouloir laisser, aucunes-fois l'espace d'une heure ou plus, puis s'il se veoit suivy et mal mené, il les abandonnera, et fera sa ruze volontiers en quelque grand chemin ou ruyseau, lesquels il suyura longuement, tant qu'il aura la force. Puis quand il se verra esloigné et forlongé des Chiens, fera de grandes ruzes pour se deffaire d'eux, se iettant sur le ventre en quelque lieu sur la terre, ou bien en l'eau, cachant ses piedz soubz luy, en aspirant et prenant son haleine contre la terre, comme i'ay dit cy dessus : si c'est en l'eau, il aspirera semblablement en icelle, tellement que de tout son corps ne paroistra seulement que le bout du nez, en sorte que les Chiens passeront sur luy auant qu'en auoir sentiment.



Quand les piqueurs verront toutes ces choses ilz doyuent regarder , quand le Cerf sera accompagné , et qu'il fuyra avec des bestes , aux bons Chiens de la meute , et plus seurs pour le change , lesquelz chasseront en crainte , ce que les ieunes ne feront pas , et ne se doyuent amuser a eux , mais bien aux vieux , ausquelz ilz se doyuent tousiours fier , en les faisant chasser en crainte , se tenans pres d'eux pour leur secourir et aider , ayans la main pleine de brisées , lesquelles ilz doyuent ietter en terre par tout ou ilz verront du Cerf. Et si de fortune les Chiens tombent en defaut , ou bien qu'ilz vissent qu'ilz se departissent en deux ou troys meutes , ilz pourront presumer en eux-mesmes que le change se separe , et que le Cerf l'abandonne. Alors s'ilz voyoient quelques uns des ieunes Chiens folz qui dressassent , et que les vieux sages n'y fussent point , ilz ne s'y doyuent pas fier , mais faut qu'ilz regardent en quel lieu les bons et seurs dresseront , et aller a eux , mettant l'œil en terre. Et s'ilz cognoissent que ce soit leur droit qui soit separé du change , faut qu'ilz iettent leurs brisées en sonnant de la trompe , en criant , Voylecy fuyant , Il dit vray , en nommant les Chiens qui dresseront , et amener a eux. Plus , faut entendre que les Chiens ne courent pas si bien dedans les chemins , et n'y ont pas si grand sentiment comme ilz ont ailleurs , pour beaucoup de raisons : qui sont , que dedans les voyes et chemins toutes

especes d'animaux y passent incessamment, qui mettent la terre en poudre avec les piedz, de telle sorte que si les Chiens y mettent les nazeaux pour assentir, la poudre entre dedans, qui les estouppe, et oste le sentiment, et aussi la vehemente chaleur du Soleil qui donne incessamment dessus, oste l'humidité et fraischeur, desechant la poudre, de telle sorte, que là ou le Cerf passe, la poudre coule, et couure soudainement la marche du pied là ou touche l'ongle, qui est tout le sentiment que les Chiens peuvent auoir dedans les voyes et chemins, d'autant qu'il n'y ha ne bois ni herbes ou le Cerf puisse toucher des iambes ne du corps, et y ha tant d'autres raisons, que ie laisse a cause de bresueté, qui empeschent le sentiment des Chiens es Chemins. En telz lieux les Cerfz ont la malice de faire leurs ruzes et houruariz, ou bien suyuent longuement ces grans chemins pour se deffaire des Chiens, ayans ceste finesse et cognoissance donnée de nature, qu'ilz pensent que les Chiens n'ayent pas là si grand sentiment qu'ailleurs. Par la pouuons cognoistre que nature donne a chascun cognoissance de son contraire, et se sauuer.

Quand les piqueurs se trouueront a telz endroitz en deffaut, doiuent mettre l'œil en terre pour ueoir si le Cerf ha point fait de ruzes et houruariz. Et si d'auanture ilz voyoient qu'il fust allé et venu sur luy, ilz doyuent crier a leurs Chiens, Voilecy houruary, et

deffaire la ruze a l'œil, et leur ayder tousiours iusques a ce qu'ilz ayent trouué la sortie des erres par ou il entre dedans le fort, en les faisant requester par les costez des voyes et chemins, et non par le dedans, car ilz y auront beaucoup plus de sentiment, et ne leur sur-alleront pas si tost qu'ilz feroient dedans les chemins, par ce qu'il y ha des herbes, des boys, et autres choses qui gardent la fraischeur et humidité de la terre, et aussi que le Cerf y touche des iambes et du corps, tellement que les Chiens en peuuent auoir plus grand sentiment. Et faut que les piqueurs iettent des brisées par tout ou ilz verront, faisant requester leurs Chiens, en les resioüyssant, et secourant le mieux qu'ilz pourront. Et si quelqu'un des Chiens droisse, doyuent aller a luy et regarder que c'est: puis s'ilz veoyent que ce soit le droit, ilz sonneront et amenteront les autres, en nommant le Chien, ha Cleraud, ou ha Mirault, comme i'ay dit cy dessus.

Aussi il aduiet aucunesfois que les Cerfs passent au trauers des brulis, là ou les Chiens n'en peuuent auoir sentiment, par ce que la senteur du feu est plus grande que celle du Cerf: en telz endroitz les piqueurs doiuent regarder quand le Cerf entre dedans, de quel costé il ha la teste tournée, et pousser tousiours leurs Chiens outre, sans s'arrester, puis quand ilz seront passez outre les brulis, faut qu'ilz facent requester leurs Chiens, en parlant a eux, et n'est possible

qu'ilz ne les redressent ainsi , ou bien en prenant leurs cernes au tour , par les fraischeurs. Plus s'il aduient qu'un Cerf se forpaisast dedans les campagnes , et que ce fust entre le midy , et les troys heures , si les piqueurs voyoient que les Chiens fussent hors d'haleine , ilz ne les doyuent pas presser , mais les resioüyr seulement le plus qu'ilz pourront. Et s'ilz voyoient que les bons ne sonnaßent et n'appellaßent point sur les erres , et qu'ilz ne fissent seulement que branler la queue , ilz ne s'en doyuent pas estonner , car ilz pourroyent faire cela a cause de la grand' chaleur , ou bien seroyent hors d'haleine . Pour telle chose ne doyuent laisser a les suyure tant qu'ilz pourront aller , sans les presser , comme i'ay dit : puis s'ilz cognoissent que les Chiens ne puissent plus aller , faut qu'ilz iettent une brisée aux dernieres erres qu'ilz auront veües , et mener les Chiens rafraischir en quelque village , en leur donnant du pain et de l'eau : ou bien se mettre soubz quelque arbre attendant la grand' chaleur a passer , et sonner de la trompe par fois , pour appeller les valetz de Limiers . et autres aydes. Puis quand ilz verront qu'il sera sur les trois heures , doiuent aller a leur brisée reprendre leurs dernieres voyes ou erres. Et s'il y ha un valet de Limier avec eux , faut qu'il se mette deuant avec son Chien , en le resioüyssant et parlant a luy , sans auoir crainte de le faire sonner et appeller sur les erres , car les autres Chiens de la meute l'oyans sonner et appeller,

appeller , pourront redreſſer leurs deffaux. Ainſi doi-  
uent-ils aller tretens requeſtans et pourchaffans iuf-  
ques a ce qu'ils l'ayent relancé. Il faut encores entendre  
qu'alors que le Cerf eſt las et mal mené , ſon dernier re-  
fuge eſt a l'eau , et deſcend communement plus toſt a  
val le cours des rivières , qu'il ne monte en contre-  
mont , et principalement ſi le cours en eſt roide. Auſſi  
qu'il ha bien ceſte cognoiſſance , que les Chiens auroient  
plus grand ſentiment de luy en montant contre l'eau ,  
qu'ils n'auroient pas en deſcendant , d'autant que le  
cours leur emporteroit touſiours la ſenteur , et auſſi qu'il  
travaille beaucoup plus a nager contre l'eau qu'il ne fait  
pas de deſcendre a val. Et devez ſçavoir que ſi un Cerf  
ha couru longuement , et qu'il vienne a rencontrer une  
rivière , il ſe mettra dedans , nageant par le milieu d'i-  
celle , et ſe donnera garde le plus qu'il pourra de toucher  
aux branches , ou autres choſes , qui ſeront des deux  
coſtez de l'eau , de peur que les Chiens y prennent ſenti-  
ment de luy : ſuyvant longuement la rivière ſans sor-  
tir de dedans , ſ'il ne trouve quelque tronche de boys  
au trauers , ou autre choſe , qui l'empêche de paſſer ,  
alors il eſt contraint d'en ſortir. Il faut qu'en telz lieux  
les piqueurs y ſoyent ſages , et qu'ils iettent une bri-  
ſée a l'entrée de l'eau , regardant de quel coſté le Cerf  
aura la teſte tournée : ce qu'ils pourront cognoiſtre  
et veoir par les fuytes , ou a leurs Chiens , leſquelz ils  
doivent faire entrer et nager en l'eau , qui en pourront

prendre sentiment aux ioncz et herbes qui seront dedans , ou bien eux-mesmes le pourront cognoistre aux lieux les plus sommes de la riuere ou le Cerf auroit passé, qui pourroit auoir troublé l'eau en passant , ou tourné les herbes, et autres choses. Lors qu'ilz auront certains iugementz de quelle part de la riuere le Cerf va , ilz doiuent appeller leurs Chiens hors d'icelle, de peur qu'ilz se gastent et refroidissent : et s'ilz sont trois piqueurs ensemble , deux se doiuent mettre aux deux costez de la riuere , l'autre s'en doit aller gagner le deuant, au long du costé que le Cerf aura la teste tournée , pour veoir s'il le verra nageant , ou autrement. Les deux qui seront demourrez aux costez de la riuere , doiuent faire requester leurs Chiens de chascun son costé, et assez loing de l'eau , car ilz auront plus grand sentiment a vingt ou a trente pas pres , qu'ilz n'auroient pas sur le bord d'icelle. La raison est , quand le Cerf sort de l'eau il en est tout couuert et chargé , parce que le poil qui est creux se remplit d'eau , et alors qu'il sort , il se secouë volontiers, et la fait tomber le long des iam-bes en la forme du pied , tellement que les erres sont si elauées et mouillées que les Chiens n'en pourroyent auoir aucun sentiment. Mais a dix ou douze pas loing du bord , ilz en pourront reprendre et assentir plus aisément, par ce que l'eau sera tombée. Toutesfois les piqueurs se doyuent tousiours tenir pres de la riuere , car aucunes-fois le Cerf se cache tout dedans l'eau , comme

i'ay dit cy dessus, et pourroit souuent demeurer en quelque brosse de ioncs ou de saules, de telle sorte qu'ilz le laisseroyent derriere eux, et quand ilz seroyent outrepassez, il pourroit sortir de l'eau, et s'en retourner sur les erres par ou il seroit venu: car communement il ha ceste malice de laisser passer les Chiens et piqueurs, puis quand il les veoit passez, se desrobbe d'eux, et s'en retourne par ou il est venu. Mais telles choses n'arriuent pas souuent, si ce n'estoit que les riuieres fussent couuertes de boys, et pres des forestz. A ceste cause il est requis qu'il y ayt quelqu'un des piqueurs ayant tousiours l'œil en l'eau, et que les autres facent requester leurs Chiens a douze pas pres, et faut qu'ilz aillent tous ensemble, ainsi tout du long, iusques a ce qu'ilz ayent trouué la sortie, et comme i'ay dit cy dessus, s'ilz trouuent quelque tronce de boys ou escluse de moulin, doyuent bien regarder aux boutz: car communement les Cerfs saillent plus tost en telz endroitz qu'ailleurs, et principalement quand ilz se forpaissent, d'autant qu'ilz suivent plus longuement les eaux, se voyans forpaisez, qu'autrement: aussi qu'ilz n'ont plus de fiance en leurs iambes, ne de fortz pour leur cacher, dont alors sont contraintz de suyure les eaux. Plus, faut entendre qu'il y ha deux manieres de ventz, que nous appellons Galerne et Hautain, autrement nommez vent de Nort, et de Midy, lesquelz le Cerf craint grandement, car quand il sort des forestz et qu'il



se fortpaise par les campagnes, si l'un d'iceux ventz regne, il ne fuyt iamais la teste tournée dedans, mais fait au contraire, car il luy tourne le cul, et fuyt a val. Ce qu'il fait pour beaucoup de raisons, dont la premiere est, que le vent de Galerne est arde et froid, desechant grandement, et ccluy d'Hautain est chaut et corrompu, pource qu'il passe soubz la region du Soleil, lequel le putrefie et corrompt a cause de sa chaleur. Et si d'avanture le Cerf fuyoit la gueule dedans l'un d'iceux ventz, il l'altereroit, et luy desecheroit grandement la gueule, et la langue: et aussi que ces ventz sont communement grandz et tempestueux: et s'il fuyoit la teste dedans, ses cors feroient voile, qui luy porteroit grande nuyssance a courir. Et le fait encores pour une autre raison, c'est qu'il ha bien cognoissance que s'il fuyoit dedans le vent, les Chiens auroient le sentiment de luy, sans mettre le nez a terre, et aussi qu'il veut avoir tousiours l'ouyr de la voix des Chiens. Combien que Phebus die que les Cerfz fuyent communement a val tous les ventz, si est-ce que i'ay veu le contraire par experience, principalement quand le vent de Mer regne, lequel est humide, ilz vont plus tost le nez dedans, qu'autrement. Mais quant au vent de Galerne et Hautain, que i'ay mentionnez cy dessus, il est certain qu'ilz sont crains et redoutez des Cerfz, et de tous autres animaux, mesmes des Chiens, lesquels ne veulent chasser quand ilz regnent. Outre, faut entendre



faut entendre que le Cerf se forpaïse pour beaucoup de raisons, principalement en Avril et en May, qu'il ha la teste molle, et en sang : par-ce que si les Chiens le chassent, il n'ose fuyr par les fortz, de peur de heurter et blesser sa teste aux branches, alors est contrainct d'en sortir, et fuyr au pays cler pour s'esloigner d'eux et faire ses ruzes : oubien le Cerf abandonne les fortz pour une autre raison, laquelle est, qu'alors qu'il fuyt dedans le fort il se travaille et lasse a brosser le boys, ne se pouvant esloigner des Chiens, ne faire ses ruzes, d'autant qu'ilz ont plus d'avantage a courir par dessoubz le boys, que n'ha pas le Cerf a saillir, ou a brosser au trauers : a ceste cause il est contrainct de sortir aux fustayes, ou pays cler, là ou il faut que le Piqueurs soyent bien sages : car il donnera plus tost le change en pays foible que fort : parce que les Chiens ont l'espace de leur eslargir, et escarter d'un costé et d'autre, en courant de grande chaleur et vifesse : et alors pourroyent outrepasser les routes, s'ilz estoient pressez des Piqueurs, oubien bouteroyent le change, ce qu'ily ne feroient pas si aysement dedans les fortz, parce qu'ilz suyuient tousiours la route et menée par ou le Cerf va, et ne se peuvent esarter d'un costé ne d'autre, car ilz ont peur de perde les erres par ou le Cerf fuyt. Qui est la cause pourquoy on se doyt plus tost donner garde du change dedans les fustayes, que dedans les tail-

les, dautant que les Chiens le font valoir, et le transportent plus tost en telz lieux qu'aux forestz: aussi que le Cerf se sloigne et fuyt mieux dedans les fustayes, et ha plus grand loysir de chercher le change, et faire ses ruizes et houruariz, que non pas au fort pays. Le Cerf se forpaïse encores en vne autre maniere, c'est quand il se veoit pourchassé et pressé des Chiens, et qu'il cognoist que rien ne luy vaut: a l'heure il sestonne, et pert son esprit, ne sachant plus ou il doyt aller: alors entreprend les campagnes, passant par les villages et autres lieux. En telle chose les Piqueurs se doyuent approcher pres de leurs Chiens, et s'ilz les voyent tomber en deffaut, ne doyuent iamais retourner en arriere pour le deffaire, mais pousser tousiours les Chiens outre: car iamais Cerf mal mené, qui se forpaïse, ne fait de houruary sur luy, mais passe tousiours outre tant qu'il aura force, si ce n'estoit qu'il eust le vent de quelque eau, alors se pourroit destourner pour y aller, autrement non. Il est bien vray que s'il entreprenoit les campagnes, pour les raisons cy dessus mentionnées, sans estre malmené, il pourroit faire des ruizes et houruariz: mais s'il estoit malmené, non: si ce n'estoyt qu'il se voulust ietter sur le ventre, alors pourroit faire quelque petite ruze pour demourer.

Plus, il faut entendre qu'il y ha grande difference de deffaire les ruizes entre les forestz, et les campagnes, parce que dedans les forestz il faut faire les cer-

nes plus près de la menée ou le Cerf aura fait sa ruzé, et les plus estroitz qu'on pourra : d'autant que si les Piqueurs prenoient les cernes grans et larges, ilz pourroyent trouver du change, lequel se feroit valoir deuant les Chiens, qui leur seroit un grand ennuy. Mais aux campagnes, ilz peuuent prendre leurs cernes grans et larges, sans auoir crainte du change, par les fraischeurs et lieux plus commodes pour eux, et ou les Chiens en pourront auoir plus grand sentiment : par-ce que dedans les gueretz, et lieux secz et arides, les Chiens ne cuyderont pas redresser, a cause de la poudre qui est dedans, laquelle leur entreroit es nazeaux, es de la chaleur du Soleil, qui auroit deseché et osté l'humidité de la terre : aussi qu'il n'y ha herbe ny autre chose ou le Cerf eust touché, par ou les Chiens en peussent auoir sentiment. Qui est la cause pourquoy les Piqueurs doyuent prendre leurs cernes par le pays le plus fraiz, et le plus couuert, ou la terre auroit gardé sa fraischeur. Et s'ilz ne le pouuoient redresser au premier cerne, ilz en doyuent faire un autre plus grād, et s'ilz ne le trouuoient sorty ne de l'un ne de l'autre, ilz pourront presumer qu'il sera demeuré en leur encainte, ou bien qu'il aura fait un houruary sur luy.

A l'heure doyuent ramener leurs Chiens au commencement de leur deffaut, et les mettre sur la menée et erres par ou ilz sont venuz, les faisant requester, en parlant a eux, et les resioüyssant, tant de la bou-

autre maniere, c'est qu'il aura la gueule noire et sèche, sans escume, et la langue retirée au dedans. Oubien le pourront cognoistre par le pied, a ses fuytes, car bien souuent il fermera l'ongle, comme s'il alloit d'assurance, puis tout soudain il s'efforcera, et l'ouurira, faisant de grandes glissées, donnant des os en terre le plussouuent, et suyura communément les routes et chemins, sans ruzer que bien peu: que s'il vient a rencontrer quelque haye ou fossé, il yra du long pour cercher une sortie a passer, par-cce qu'il n'aura pas la force et vigueur de saillir, et sauter par dessus. Tous ces signes donneront a cognoistre aux Piqueurs que le Cerf se veut rendre, et qu'il est mal mené.

Je mettray fin a ce present chapitre, priant les Piqueurs et cognoisseurs m'excuser, si i'ay obmis ou delaisé quelque chose, par ce que ie ne puis pas si bien mettre par escrit l'execution de mon esprit, que ie feroys si i'estois a l'œuure, d'autant que l'estat requiert que les Piqueurs y soyent fins, subtilz, et soupsonneux, et qu'ilz se gouuernent selon ce qu'ilz verront deuant eux, presumans la malice et force des Cerfs: ensemble la bonté et vigueur de leurs Chiens, et selon qu'ilz verront faire les ruzes et houruariz, et les lieux ou elles seront faites. Et aussi se doyuent gouuerner, et faire leurs cernes grans ou petis, longs ou estroictz, selon la commodité des lieux, et le temps

*qu'il fera et la saison : car aux chaleurs , et au temps des fleurs , que les herbes ont senteur, les Chiens sur-  
allent plus tost les bestes qu'en autre saison . En tel  
temps et lieux il est besoing de faire les cernes grans , et  
par plusieurs fois, en cherchant les lieux fraiz et com-  
modes pour le sentiment des Chiens : et par ainsi il est  
fort malaisé que le Cerf se desrobe d'un bon Piqueur,  
et penible, si ce n'est par la faute des Chiens . Et en-  
cores que les Chiens abandonnassent le Cerf, a cau-  
se de la nuyt , qui les pourroit surprendre ; ou  
bien qu'ilz fussent las et harassés, si est-ce que le  
Piqueur ne se doyt estonner, mais faut qu'il brise ses  
dernieres voyes ou erres pour le retourner chercher,  
requerir, trouver, et prendre le lendemain.*

Comme il faut que les Piqueurs sonnēt de la Trompe,  
& parlent aux Chiens, pour le Cerf.

Chappitre XL L.



**A**V-IOVR-D'HVY il y ha peu d'hommes qui sachent bien sonner de la trompe, et parler aux Chiens en cris et langages plaisans, comme faisoient les anciens : car a present ie veoy que les Piqueurs ne prennent pas grand plaisir a veoir courir, ne faire chasser et requester les Chiens : mais seulement leur sùst de veoir prendre et mourir vn Cerf, pour auoir la bonne grace de leur maistre, et faire leur profit : et de lors qu'il est lancé, n'en desirent que la

*Curée. Ce que ne faisoient les anciens : lesquelz se delectoyent , et prenoient plaisir a bien parler et conduire les Chiens, comme recite Phebus, qui loüe grandement le duc d'Alañçon, Huet de Nantes , et le sire de Mommorancy : lesquelz estoient ouïs et entendus sur tous autres . Or apres auoir entendu et practiqué quelque peu de leur style de sonner , et maniere de parler , crier, et bucher de la voix : i'ay bien voulu icy en noter et metre par escrit quelque chose selon l'intelligence de mon esprit.*

Comme il faut sonner de la Trompe, & houpper de la voix, pour s'appeller l'un l'autre quand on est a la chasse.

## Chappitre XLII.

**C**ELVY qui voudra, C'estant a la chasse, appeller son compagnon avec sa Trompe doit sonner un mot long ainsi,




Tran.

Les autres luy doyent respondre en mesme son avec leur Trompe , en ceste maniere, comme ainsi,




Tran.

*Et lors qu'ilz auront respondu, il doit redoubler deux foyz de sa Trompe en ceste sorte,*



*Tran Tran.*

*Semblablement celui qui voudra houpper, et appeler son compagnon de la voix, doit houpper un mot bien long, ainsi,*



*Houp.*

*Et s'il respond, il doit respondre en mesme voix longue.*

*Puis celui qui voudra rappeler, redoublera sa voix en houppant en ceste maniere,*



*Houp Houp.*

*Voyla comme les Veneurs et Piqueurs se doyent appeler les uns les autres, tant de la Trompe que de la voix.*

*Et notez que tant pour s'appeler l'un l'autre de la Trompe, que sonner pour Chiens, il en faut sonner du gresle: car en toute chose pour la chasse du Cerf on ne doit point sonner du gros de la Trompe.*

*Comme il faut sonner de la Trompe pour Chiens, & aussi comme il faut parler a eux de la voix quand ilz chassent.*








*Là ira Chiens, là ira, là ira, ha, ha.*  
*Outre ira Chiens, outre ira, outre ira, ha, ha.*

Comme il faut sonner veüe avec la Trompe, & comme  
 il faut parler aux Chiens avec la voix, quand on voit  
 le Cerf a veüe.

*Si les Piqueurs  
 se trouvent au  
 devant de la  
 mente, et qu'ilz*



*Tran, tran, tr. tran, tr. tr. tran.*


*voient le Cerf a veüe, ilz doyuent forhuer et son-  
 ner de la Trompe plusieurs fois, en motz longs ainsi,*

*Semblablement, si les Piqueurs se trouvent au de-  
 vant des Chiens, et qu'ilz voyent le Cerf, ilz le doy-  
 uent laisser passer devant eux, puis forhuer et par-  
 ler aux Chiens ainsi,*




*Thia hilland, thia hilland.*

*Et ne cesseront de forhuer, et crier, insques a ce que  
 les Chiens soyent venus a eux : puis quand ilz seront  
 venuz, le Piqueur les doyt laisser passer, et se mettre  
 a la queue, en criant,*



*Passé le Cerf, passe, passe, passe, passe, ha,*



*ha, hau, ha, hau.*


*Puis quand il sera en l'eau, ou qu'il l'aura passée,  
on doit crier ainsi,*



*Au il bat l'eau (hiès, il bat l'eau, y. il bat l'eau.*

Comme il faut sonner de la Trompe aux deffaux : & la  
maniere de parler de la voix aux Chiens pour le def-  
faut, afin de les appeler a foy, & releuer le deffaut.

*Si on veut faire retourner les Chiens a quelque ruze  
ou bouruari, ou bien qu'on eust laissé le relais, et que  
la mente feust en deffaut, qu'il falust que le Piqueur  
appelaist ses Chiens apres luy pour les ioindre, il faut  
qu'il sonne troys ou quatre foyes : appelant ses Chiens  
apres luy pour les rassembler, en cette sorte,*



*Tran, tran, tran, tran, tran, tran.*

*Paraillement si le Piqueur veut rappeler les Chiens pour les faire retourner a luy, il les doit bucher ainsi avec la voix,*




*Houua a moy theau il fuyt icy.*

*Quand le Cerf se forpaise, le Piqueur doyt sonner de la Trompe deux sons longs en ceste maniere,*



*Tran tran tran tran.*

*Si le Piqueur voyt ses Chiens en deffaut, il doit parler a eux, pour leur faire requester le deffaut et pour les resjouir, ainsi*



*Hau ou est il allé le Cerf : va il là di, appelle ap-*



*pele appelle.*

*Quand les Chiens ont releué le deffaut, il faut parler a eux : et nommer par leur nom ceux qui dresseent et font la pointe du relief, en les nōmant par leur nom,*



*Cy fuyt a Mirand a Briffand a Gerband.*

Comme en doyt crier, & forhuer, & parler aux Chiens,  
quand le Cerf a faict vne ruze : ou quand vn Chien  
se tranfporte.

*Si le Piqueur voyt que le Cerf enst faict vne ruze  
en vn chemin, il doyt sonner de la Trompe vn son long:  
et puis crier et appeler ses Chiens , en la maniere qui  
s'ensuyt,*



*Vauleci hornari le Cerf Vauleci hornari Vauleci  
hornari la voye.*

*Puis si le Piqueur voit que l'un de ses Chiens trans-  
porte le Cerf , et qu'il en voye les fuites , il doyt crier  
en ceste sorte , en iettant vne brisée,*




*Vaulecy fuyant , il dit vray , vaulecy fuyant ,*



*vaulecy fuyant.*

Comme on doit sonner les Abbois de la Trompe, & parler aux Chiens, de la voix, quand le Cerf sera aux Abbois

*Quand le Cerf sera aux Abbois, les Piqueurs doivent sonner de la Trompe six ou sept sons fort vistes et courtz, et le dernier un peu plus long, et les resonner plusieurs foys, comme il sensuit,*



*Tran tr.tr.tr.tr.tr.tr tr.tran, tr.tr.tr.tr.tr.tr.tr.tr.*

*Aussi le Piqueur, quand le Cerf sera aux Abbois, doit parler a ses Chiens en ceste sorte,*



*Hau halle Chiens, halle, halle, halle, halle.*

Comme il faut sonner avec la Trompe la mort du Cerf: & comme a sa mort il faut crier & appeler les Chiens.


*Quand le Cerf sera pris, tous les Piqueurs doivent sonner longuement, par sons longs, en ceste sorte et maniere,*



*Tran, tran, tran, tran, tran.*

*Et ausi*


*Et aussi les Piqueurs doyvent crier et appeler les Chiens a la mort du Cerf, ainsi,*



*A la mort Chiens, a la mort, a la mort.*


Comme il faut sonner la Retraicte avec la Trompe:  
& comme il faut crier & appeler les Chiens  
quand la Chasse est faite.

*Quand la Chasse sera finie, et que les Piqueurs se voudront retirer, il faut sonner de la Trompe troys motz fort longs : puis les redoubler par deux plus briefs, et vn tiers qui sera semblable aux deux premiers sons, comme pourrez voyr noté icy dessoubz.*



*Tran, tran, tran, tran, tran, tran, tran.*

*Semblablement il faut crier et appeler les Chiens a la retraicte, en ceste maniere,*



*Theau Chiens theau hau haute haute thie thie*



*ha ha ha ha ha ha.*

Comme il faut sonner de la Trompe pour faire la Curée:  
 & comme il faut avec la voix forhuer les  
 Chiens a la Curée.

*Quand on appellera les Chiens pour venir a la Curée,  
 il faut sonner avec la Trompe, comme il est icy noté,*



*Tran tran tran tran tran tran tran tran.*

*Et aussi quand le Piqueurs voudront faire la Curée  
 aux Chiens, faut qu'ilz forhuent et crient, iusques a  
 ce qu'ilz soyent tous venuz, en ceste maniere,*



*Theau le hau, theau le hau.*

Comme on doit parler aux Chiens, quand ilz mangent la  
 Curée: & de ce qu'il leur faut faire.

*Quand les Chiens mangeront la Curée, les Pi-  
 queurs les doyuent fraper de la main, en leur faisant  
 chere et les appelant par leur nom, principalement  
 ceux qui ont mieux fait leur deuoir, en criant et par-  
 lant ainsi aux Chiens,*




*Ha Miraud, ha Brifaud, ha Gerband.*




Comme il faut sonner de la Trompe apres la Curée : & comme il faut sonner pour ramener les Chiens au Chenin.

Quand la Curée sera mangée, on doit renuerfer le cuyr du Cerf sur les Chiens, en leur monstrant la teste du Cerf, et sonner de la Trompe ne plus ne moins qu'aux Abboiz, comme pouuez voyr cy dessoubz,



Tran tr.tr.tr.tr.tr.tr.tr.tran, tr.tr.tr.tr.tr.tr.tr.tran.

Puis quand le tout sera fait, et qu'on voudra ramener les Chiens au chenin, on doit sonner deux briefs sons a chacune fois en ceste maniere,



Tran tran tran tran tran tran tran tran.

Voila en brief une partie du style de sonner et crier pour Chiens, lequel les bons Piqueurs doivent sauoir et entendre. Et y pourront augmenter sur chacun article telz motz et termes de parler et crier qu'ilz voudront. J'en eusse mis grand nōbre por escrit, sinon qu'il eust esté long et malaisé a noter. A ceste cause il me suffit d'en escrire les sons et motz les plus cōmuns, pour en donner intelligence aux apprentifz. Et aussi parce qu'il y a beaucoup d'hommes qui n'ont pas la voix a commandement, pour prendre les cris et termes

*de Venerie si hantains, ie m'en suis remis a la description de leur voix : toutesfois que les hantains et plaisans cris sont dédiés pour la chasse du Cerf, et les bas, rudes et furieux pour la chasse du Sanglier: comme de crier Hou, Veles cy aller, Houla houla, et autres rudes langages : mais pour la chasse du Cerf, ilz sont defendus, sur peine de desroger a l'estat de Venerie.*

Comme il faut tuer le Cerf quand il fera aux Abboiz,  
& de ce qu'il faut faire. CHAP. XLIII.



**Q**UAND les Cerfs sont aux Abboiz, ilz sont dangereux, principalement a la saison du Rut, car leur teste est plus veneneuse qu'en autre temps. Et pour ceste raison on dit un commun proverbe, *Au Cerf la bierre*, et *Au Sanglier le Barbier*. Ce qui n'a esté dit pour neant, veu les accidentz qui en sont arrivez, comme lon peut veoyr par exemple. Nous lisons d'un Empereur nomme Basile, lequel avoit gaigné maintes batailles, et fait de grandes prouesses en son regne, et toutes-foys fut vaincu et tué d'un Cerf, le voulant assaillir aux Abboys. O fortune qu tu es variable ! Un Prince ayant fait tant de vaillances entre les hommes, estre vaincu d'une beste. Et y a tant d'autres exemples que ie laisse a cause de brefueté. Mais cestuy cy doyt suffire aux Piqueurs, pour leur faire cognoistre et entendre qu'ilz doyvent aller sagement aux Abboiz du Cerf, comme ie declareray cy apres. Et pource il faut entendre qu'il y ha difference des Abboiz de l'eau, et des Abboiz de la terre : car si le Cerf est en eau profonde, ou le Piqueur ne peust aller a cheual, la premiere chose qu'il doyt faire, c'est de coupler les Chiens, pour beaucoup de raisons : car s'ilz estoient longuement en l'eau, ilz se refroidiroient et gasteroient : aussi si c'estoit en quelques rivières ou estangs larges et grans, ilz seroient en danger de leur noyer : parce qu'un Cerf


malmené ne cuyde pas sortir de l'eau quand il veoit les Chiens et Piqueurs apres luy, et nage volontiers tousiours par le milieu, sans s'approcher de la rive : qui est la cause pourquoy le Piqueur doit prendre ses Chiens, et se cacher, attendant le Cerf a sortir : ce qu'il pourra faire n'oyant point de bruit, oubien il s'approchera de la rive, en lieu ou le Piqueur luy pourra donner un coup d'espée. Et si d'adventure le Cerf sortoit de l'eau, il le doit laisser esloigner assez loing premier que de decoupler ses Chiens : car si le Cerf oyoit si soudainement bruit apres luy, il pourroit encores retourner dedans, et le Piqueur n'auroit pas le loisir ne l'espace de luy donner un coup d'espée. Et s'il voyoit que le Cerf ne voulust sortir de l'eau, il doit envoyer querir un basteau, oubien s'il scait nager, faut qu'il se despoille tout nud, ayant une dague en l'une de ses mains, et se mette a la nage pour l'aller tuer : mais se doit bien donner de garde de l'assaillir, si ce n'est en lieu profond, par ce que si le Cerf prenoit terre, il le pourroit blesser de sa teste : mais en lieu profond il n'a force ne puissance. J'en ay tué en ceste sorte plusieurs-fois, en presence de beaucoup d'hommes : puis les pouissois a la rive en nageant. Autrement si le Cerf tient les Abbois a terre, et qu'il ait sa teste frayée et brunie, le Piqueur doit bien regarder en quel lieu c'est : car si c'est en lieu plain et desouvert, ou il

*n'y ait point de boys , il y est dangereux et mal-aisé a tuer : mais si c'est au long d'une haye, ou en quelque fort de boys, ce pendant qu'il s'amuse aux Chiens , le Piqueur mettra pied a terre, et ira secretement par le derriere des broffes, et le tuera aisement. Et si il aduenoit que le Cerf tournast la teste pour venir a luy, doit soudainement prendre une branche, ou un feuil-lard, et le secouerrudement: lors le Cerf ne faudra aretourner, sans luy faire mal. Le Piqueur le pourra bien tuer encores en une autre maniere. C'est que quand il verra le Cerf aux Abboiz: il doit haller et crier a ses Chiens, et lors qu'il verra qu'il tournera la teste pour s'enfuyr, il doit piquer son cheual, et l'accouër de plus pres qu'il pourra, afin qu'il n'ait pas le loysir, ne le lances de tourner la teste pour le blesser, et ainsi le pourra tuer.*

Comme on doit deffaire le Cerf: & faire  
la Curée aux Chiens.

## CHAPITRE XLIIII.

Liiij



**Q**UAND le Cerf sera pris , tous les Veneurs, et Piqueurs, qui la feront, doyent hucher et sonner la mort, afin de faire assembler les compagnons de la Venerie, et les Chiens. Eux estans assemblez, et que le Roy ou maistre sera arrive, feront fouler le Cerf aux Chiens : ce fait, les doyent recoupler, puis le Veneur qui l'aura destourné, doit prendre son cousteau, et leuer le pied droit, lequel il presentera au Roy en la sorte qu'il est cy dessus pourtrait: puis auant que faire aucune chose, faut qu'ilz coupent de la feuillée, laquelle ilz espandront par terre, et mettront le Cerf dessus, le couchant sur l'eschine, les quatre pieds et le ventre contremont, et faut mettre sa teste soubz ses deux espaulles, comme pourrez veoir par la pourtraiture cy dessus faite. Ce fait, il faut faire une fourchette qui ait l'un des costez plus long que l'autre, comme pourrez veoir par ceste pourtraiture, dedans laquelle fourchette faut mettre tous les menuz droitz qui appartiennent au Roy, ou au Seigneur de la Venerie. Puis auant que de fendre le cuyr du Cerf, la premiere chose qu'on doit leuer, sont les dyntiers, vulgairement appellez les couillons, ausquelz il faut faire un petit pertuis en la peau, pour les mettre a la fourchette. Apres faut qu'il commence a despoillier le Cerf en ceste maniere.

*Premierement*, il doit commencer a le fandre a la gorge suyuant tout le long du ventre, iusques au lieu des d'yniers: puis le doit prendre par le pied dextre de deuant, et enciser la peau tout au tour de la iambe, au dessouz de la ioincture, et la fendre depuis l'encisure iusques au noyau de la poitrine: et en fera autant a chascune des autres iambes, et si faut qu'a celle de derriere les encisures finissent au droit du vit, de chascun costé. Apres faut commencer par les iambes, ou par les poinctes des encisures, a le despoillier. Et quand il sera a l'endroit des costez, faut qu'il leue avec la peau une sorte de chair rouge, que nous appelons le parement, qui vient par dessus la venaison des deux costez du corps. Puis apres que le Cerf sera tout despoillé, fors seulement la teste, les oreilles, la queue et le cul, (lesquelles choses doyuent demourer avec le poil) auant que toucher au corps, le Veneur doit demander du vin, et boire le coup: car autrement, s'il deffaisoit le Cerf sans loyre, la venaison se pourroit tourner et gaster. Le Roy ou Seigneur doyt faire apporter son vin, avec la chaufrette pleine de charbon ruf, et la saulse en une escuelle bien assimentée, comme il est requis: et ainsi cōme il verra deffaire le Cerf au Veneur, doyt prendre ses appetis, et chercher les morceaux friandz, pour les mettre sur la chaufrette, et faire ses carbonnades, en beuuant, riant, et faisant



grand' chere, deuifant des Chiens qui ont le mieux chaffé, pourchaffé, requesté, et reffauté, les faisant venir deuant luy pour voir deffaire le Cerf, car ainfi faisoient les bons et anciens Princes amateurs de la Venerie. Alors le Veneur prendra son cousteau, et commencera a deffaire le Cerf en ceste sorte, eflariffant le cuyr sur la feuillée.

Premierement, faut qu'il leue la langue, et la mette a la fourchette. Apres doit leuer les deux neudz, qui se prennent entre le col et les espaulles: il y en ha deux autres q se prennent aux flancs, et pource en les appelle flancars: tous ces quatre neuds se doynent mettre a la fourchette. Ce fait, faut qu'il leue l'espaulle droite, laquelle appartient au Veneur, qui aura laissé courre, puis leuer l'autre espaulle, qui appartient a tous les autres. Cela fait, faut leuer la hampe, qui appartient au grād Veneur, puis les foulz, qui se prenēt au bout de la hāpe sur la poëtrine du costé du col, ce qui appartient a celui qui ha laissé courre. Apres doit vyder le vêtre, et oster le vit: puis leuer la vene du cuer, et le frāc-boyau et tout chaudement le tourner et nettoyer, et le metre a la fourchette. Apres faut ouurir le cuer, et en oster l'os, et leuer les nombles, qui se prenēt être les cuysses, puis doit leuer les cuysses: et apres faut leuer le cymier depuis le cōmancement des costēz, et de longueur iusq's au bout de la quenē, en eflargissāt sur les cuysses iniques aux ioints, laissant l'os corbin tout franc, en luy

*donnant deux coups de cousteau sur le haut des deux costez, pour monstrier la venaison : et en faut oster du bout de deuers les costez, troys neudz, qu'on appelle Les cinq et quatre, qui appartiennent au grand Veneur. Les nombles, cuyssees et cimier appartiennent au Roy. Apres faut leuer le col, qui appartient au valet de Chiens : puis enleuer les costez, lesquelz appartiennent au Roy : apres leuer l'eschinée, qui appartient au valet de Limier.*

De la Curée des Chiens courans : & premierement des Limiers.

## CHAPITRE XLV.



**L**A CVREE des Limiers se doit faire en ceste sorte. Pemierement, quand on deffera le Cerf, il faut que les Limiers soyent presens a le voir defaire, et qu'ilz soyent tenuz ou attachez en quelques lieux, ou ilz ne se puissent battre et toucher les vns les autres. Puis le Veneur qui l'aura destourné, doit prendre le massacre ou teste du Cerf, et le cueur, pour faire le premier droit a son Limier, pour autant que l'honneur luy appartient. Apres avoir fait le devoir

a son Chien, il donnera la teste a ses compagnons, pour faire pareillement le deuoir a leurs Limiers. Ce fait, s'en vont boire, pendant que les valetz de Chiens acoustrent la curée pour les Chiens courantz, laquelle se peut faire en deux sortes. Dont la premiere est, qu'incontinent que le Cerf est prins, les Piqueurs ayans sonné et amassés les Chiens de la mente pour se trouuer a la mort, ilz doyuent mettre pied a terre, et despoillier soudainement le col du Cerf, ce pendant qu'il est chant : puis luy donner sept ou huyt taillades de cousteau affin que les Chiens puissent auoir la chair plus aysément, et tout chaudement leur faire la Curée du col, et de la ceruelle du Cerf. Et deuez s'auoir que telles Curées chaudes et soudainement faictes, sont meilleures sans comparaison que celles qui se font au logis, et mettent bien plus tost et mieux les Chiens a la chair. Celles qui se font au logis, qu'on doyt nommer Curées froides se font en ceste maniere : Faut prendre du pain, et le decoupper par petis lopins en une poisle, avec du fourmage : puis prendre le sang du Cerf, et en arrouser le pain et fourmage. Alors qu'on verra le tout bien bruny de sang, faudra prendre vne grande potée de laict chant, et arrouser et mesler le tout ensemble. En apres estendre le cuyr en quelque beau lieu sur l'herbe bien nette, et mettre soudainement la Curée dessus : par-ce que si elle de-

meuroit longuement en la poisle, l'arain ou le laict la pourroyent aigrir. Lors que la Curée sera bien estendue sur le cuyr, faut mettre le massacre ou teste au milieu, et remplir une poisle d'eau fresche aupres de la Curée, pour faire boire les Chiens : puis faut mettre le forhu au bout d'un baston, lequel doyt estre bien vuyde et net, de peur qu'il face mal aux Chiens, celui qui le portera s'en doyt aller a cent pas de là. Puis le Roy ou Seigneur, ou celui qui representera sa personne, doyt commander le premier a sonner de la Trompe, et forhuer les Chiens, par autant que l'honneur luy appartient, et alors les Veneurs mettront tous la Trompe a la bouche, pour sonner, forhuer, et resiouyr les Chiens. Le valet de Chiens doyt estre sur le milieu de la curée, avec deux houbaines pour la deffendre, afin que les premiers venuz attendent les derniers.

Et incontinent qu'il les verra tous abboyantz au tour de luy, il se doyt oster, et les laisser mager, en les resiouyssant et faisant chere de la main : puis quand ilz verront que la Curée sera presque mangée, celui qui ha le forhu doyt soner et crier, Ty-ha Hilland. Les valetz de Chiens qui seront a la Curée doyuent menacer les Chiens, et les faire aller a luy, alors il leur monstrera le forhu : puis quand il les verra tous autour de luy, jettera son forhu par le milieu d'eux. Apres qu'ilz l'auront mangé, faudra les ramener sur le cuyr, et sonner de la Trompe en tournant le cuyr sur eux.

Incontinent que la Curée sera faite , principale-  
ment quand elle est froide, il faut metre les Chiens au  
Chenin , car s'ilz travailloyent apres , ilz pourroyent  
rendre leur gorge : mais si la chair est chaude et pure  
ilz ne la cuydent pas rendre . Et quand la Curée se-  
ra faite, les compagnons s'en iront boire .


Fin de la chasse du Cerf.

Qu'il Est Doux  
qu'il est charmant  
le Plaisir qu'on goutte  
En aimant

Constant Delicat & fidelle  
c'est bon Est fait pour l'amour  
c'est pourroit s'obtenir une belle  
De l'roy qui aimoit toujours  
L'aimant Le Reine de Cithare, l'interprétoir  
deux Charmer  
Grand d'un qu'on ne s'ait de plaine  
de la l'roy de la l'roy de la l'roy

# De la Chasse & propriete' du Sanglier.

Chap.<sup>7</sup> XLVI.



**A** PRES avoir descrit de la Venerie du Cerf, selon  
l'intelligence de mon esprit, ie feray seulement  
icy un petit traicté de la chasse et proprieté du Sanglier,  
M

combien qu'il ne doyt pas estre mis au rang des bestes chassées a force de Chiens courantz, mais est le vray gibbier des mastins, et leurs semblables : d'autant que c'est une beste pesante, et de grande senteur, laquelle ne se fie qu'en ses dentz, et deffenses, ne voulant fuyr ne s'esloigner des Chiens, a ceste cause ne peut on cognoistre la bonté et vistesse d'iceux. Aussi a la verité, il me semble que c'est grand dommage de faire courir a une bonne meute de Chiens telles sortes de bestes, pour les raisons qui s'ensuyuent.

Premierement, le Sanglier est le seul animal qui peut tuer et ferir d'un coup, car si les autres especes esgratignent ou mordent, il y ha tousiours moyens de remedier a leur morsure, mais au Sanglier, s'il blesse un Chien de la dent, au coffre du corps, il n'en cuydera iamais eschapper. Et ha ceste malice que s'il veoit une bonne meute de Chiens, qui le chassent de pres, il fuyra dedans le plus grand fort qu'il pourra trouuer, là ou il les pensera tuer a son aise. Ce que i'ay veu par experience plusieurs-fois, et entr'autres d'un Sanglier, qui auoit cinquante Chiens courantz apres luy, lors qu'il les voyoit tous bien amentez et ensemble, il tournoit sa hure deuers eux, et donnoit dedans le milieu de la meute, de telle sorte qu'il tuoyt aucunes-fois six ou sept Chiens d'une venue : et des cinquante Chiens courantz, il n'en fut point ramené dix sains au logis. Et



aussi que si une meute de Chiens est une fois dressée pour le Sanglier, ilz ne veulent plus courir les bestes legieres, par ce qu'ilz ont accoustumé de chasser de pres, et avoir grand sentiment de leur beste: ce qui est du tout contraire aux bestes legieres. Pour ces causes ie veux conclure que tout homme qui veut prendre le Cerf, Cheureul, ou Lieure a force, ne doit point faire courir le Sanglier a ses Chiens. Mais par ce que les hommes sont de diuerses opinions, et cherchent leur plaisir selon la commodité de leurs maisons, ie leur descriray icy la propriété du Sanglier, et comme on le doyt chasser, et le moyen de le tuer avec l'espieu, et l'espée, comme on le pourra veoir par les pourtraitz cy apres mis.

Du naturel & malice du Sanglier.

Chappitre XLVII.

**L**ES Sangliers sont de telle nature que quand ilz naissent et sortent du ventre de la mere, ilz apportent toutes les dentz qu'ilz auront iamais, et ne multiplieront plus leurs dentz sinon en grosseur et longueur. Ilz en ont quatre entre autres, lesquelles se nomment deffenses, dont les deux de dessus ne blessent point, mais seruent seulement d'aguiser celles de dessous, desquelles ilz blessent et tuent. S'il aduient que les Sangliers se creuent les yeux, ilz garissent

M ij

soudainement. Ilz peuvent viure vingt et cinq ou trente ans. En Avril et May ilz sont plus aisez a mettre aux toiles qu'en autre saison : la raison est, qu'ilz dorment plus fort en ces deux mois qu'en autre temps, par ce qu'ilz mangent les herbes fortes, et la gette du boys, qui leur esmouuent le sang, et font monter les fumées au cerueau, ce qui les endort. Aussi que le Printemps leur renouelle le sang, qui est cause de leur grand repos. Les Sangliers vont au rut enuiron le mois de Decembre, et dure leur grande chaleur pres de trois semaines. Et encores que les Layes soyent refroidies, les Sangliers ne bougent de leurs compaignées, qui ne soit enuiron le mois de Ianuier: alors se departent, et vont prendre leur buysson, se recelans aucunes fois dedans leur fort deux ou trois iours sans en sortir, et principalement quand ilz ont ouuert leur fougé, et qu'ilz trouuent la racine de fougere douce. Les Sangliers sortent aucunes fois des forestz, et vont chercher leurs mangeures bien loing, le plus souuent au temps de vandanges, et demeurent là ou le iour les prend, sans regarder le lieu, mais leur suffit seulement de demeurer en quelque gros hallier de ronces, ou d'espines, attendant la nuit a venir. Ilz escoutent l'homme de bien loing, quand ilz sont au dessoubz du vent, mais quand ilz sont au dessus, n'en ont sentiment que bien peu. Les Sangliers viuent de toutes sortes de bledz, fruitz, legumes, comme pommes, poyres, prunelles, faine, gland, et

autres semblables, et de toutes racines, excepté de rabes, et naxeaux. Aussi en Apuril et May ilz mangent la gette du prunier, et du chesne, et toutes bonnes fleurs, qu'ilz peuvent trouver, principalement celle du genest. Ilz vont aux charoignes du Cheval, et non d'autres bestes. Il faut entendre que le Sanglier ha ceste propriété, qu'il ne devient iamais ladre, comme un Porc priné.

Quand les Sangliers sont aux marez, ilz vivent d'anguilles, d'aschetz, et autres choses qu'ilz peuvent trouver. A la coste de la Mer ilz vivent de toutes sortes de coquilles, comme moustes, huytres, et leurs semblables. Leur saison et venaison commence a la my-Septembre, et finist environ le commencement de Decembre, qu'ilz commencent a aller au rut. Communement les Sangliers se font abbayer aux Chiens en leur barge, ou au partir d'icelle, et font plus tost leurs demeures dedans les boys fortz d'espines et ronces, qu'ailleurs. Et quand ilz sont chassez des Chiens, ilz fuyent le fort pays, et couvert, ne se voulant desbucher de leur fort qu'ilz ne sentent la nuit approcher. Et si de fortune, il y ha une compaignée de bestes, et qu'il y en ayt une qui se desbuche par un endroit, toutes les autres la suivront, et sortiront par mesme lieu. Les Sangliers abandonnent plus tost les forestz pour aller au loing chercher des buyssons, que ne font pas les Cerfs: aussi dit-on que le Sanglier n'est qu'un hôte. Et si d'avanture les Sangliers font leur demeure en un buysson, et


qu'ilz soyent venuz de quelque forest loing de là, s'ilz y sont chassés, ilz s'en retourneront sur les mesmes erres par ou ilz sont venuz, et depuis qu'ilz se desbuchent d'un buisson, ilz fuyent tousiours, sans leur arrester, iusques a ce qu'ilz soyent au pays ou ilz ont esté nez, duquel ilz sont venuz: là ou ilz estiment leur sauuegarde, et le refuge de leur force. Ce que i'ay veu par experience d'un Sanglier, qui estoit venu en un buisson, lequel des le lendemain laissé courre deuant les Chiens, et tout soudain desbucha du buisson où ie le lancé, s'en retournant sur ses mesmes erres par où il estoit venu, en une forest, qui estoit a sept lieues loing de là, et par les lieux où il passoit ie voyois les vieilles erres par où il estoit venu. Il est vray que s'il est nourry en un pays, et que les Chiens le chassent, il ne cuyde pas desbucher de son fort aysément, mais bien mettra la hure hors du fort pour s'en cuyder aller, en sentant et prenant le vent de toutes partz, puis s'il oyt quelque chose, il retourne soudainement sur luy, et apres, quelque bruyt que puissent faire les piqueurs ne les Chiens, il ne cuydera pas ressortir par cest endroit, si ce n'est vers le soir: mais s'il estoit une fois sorty ayant entrepris son chemin, il ne laisse pour homme, ne pour bruyt a passer outre. Le masle ne cuyde pas crier quand on le tue, principalement un grand Sanglier, mais la femelle ouy. Quand le Sanglier fuyt deuant les Chiens, il ne fait point de ruzes, d'autant qu'il est pesant, et

que les Chiens le suyuent et chassent de pres. Je trouue dedans le Proprietaire, qu'on cognoist la vieillese du Sanglier a la iambe, a laquelle y ha force petites foussettes ou rides, et autant que la iambe en marque, il doyt auoir d'ans : mais quant a moy ie ne m'arreste qu'aux traces, a la hure, et aux deffenses. Les femelles ne portent qu'une fois l'an. Les Sangliers sont plus hardis, et s'adressent plus tost aux hommes, pour leur courir sus, quand ilz font leur pourchaison de nouzilles, et de faine, qu'ilz ne font pas quand ilz la font de gland, ou d'autres mangeures. Vn ieune Sanglier en son tiers an, ne doyt estre assailly pour prendre a force, car il courra beaucoup plus longuement que ne fera un ieune Cerf port ant six cornettes.

M iij

Des motz & termes qu'on doyt vser  
pour le Sanglier.

Chappitre XLVIII.



**C**OMBIEN qu'en la chasse du Cerf, au chap. 37:  
i'aye parlé quelque peu des motz et termes de  
Venerie, qu'on doit vser pour la chasse du Sang-  
lier, i'ay bien voulu icy en donner aux Veneurs plus  
ample intelligence. Premièrement, si un Ve-  
neur se trouve entre les bons maistres, et qu'on

luy demande que c'est qu'un Sanglier venant a son tiers an, il peut respondre, que c'est une ieune beste qui ha laissées compaignées ceste année, et que jamais Sanglier ne laisse les compaignées qu'il n'ayt passé deux ans. Puis si on luy demande que c'est qu'un Sanglier a son tiers an, peut respondre, que c'est une beste qui ha trois ans accomplis, venant a son quart an: puis si on luy demande que c'est qu'un Sanglier en son quart an, il peut respondre, que c'est une beste qui ha quatre ans accomplis, venant au cinquiesme. Et tout ainsi qu'on dit, Cerf de dix cors courable, au prealable peut on dire, Sanglier en son quart an courable, n'ayant point de reffuz. Puis si on luy demande que c'est qu'un grand vieux Sanglier, il peut dire, que c'est un Sanglier qui ha laissé les compaignées il y ha plus de quatre ans, ou autrement le peut dire Porc entier, ou grand vieux Sanglier. En apres si le Veneur fait son raport, et qu'on luy demande ou le Sanglier ha esté viure la nuit, il peut dire qu'il ha esté faire ses mangeures aux gaignages, qui se prenent pour champs, et autres lieux ou croissent toutes sortes de bledz, comme i'ay dit.

Mais s'il voyoit qu'il eust fait ses boutis dedans des prez ou fraischeurs, il doyt appeller cela vermeiller: comme disant, le Sanglier ha vermeillé en tel lieu. Et si de fortune il auoyt fait sa nuit aux fougues, ou au parc, le Veneur doyt dire qu'il ha fait ses

boutis au parc ou a la fougé: car il faut entendre que toute espee de fruitz qu'il peut manger sans fouger, se doyuent nommer mangeures, et toutes les autres choses, ou il leue la terre avec le nez (autrement appelé boutoier) pour auoir les racines, se doyuent nommer fougé: mais aux lieux frais là ou il ne fait que leuer vn peu la terre avec le bout du boutoier, cela se doyt nommer vermeiller, qui est autant a dire, que chercher les Vers en la terre. Il y ha aussi muloter, qui est quand le Sanglier va chercher les caches et greniers des mulotz, ausquelz ilz ont assemblé le bled, gland, et autres fruitz. Et quand ilz vont aux prez, et autres lieux, paistre l'herbe, telle chose se doyt nommer herbeiller, comme disant, le Sanglier ha herbeillé en telz lieux. Voyla comme le Veneur doyt specifier les termes de la Venerie du Sanglier, en faisant ses rapportz.

Des iugementz que le Veneur doyt sçauoir pour  
cognoistre vn grand Sanglier, & pre-  
mierement du iugement du pied.

#### Chappitre XLIX.

**C**OMMUNEMENT on cognoist les grands vieux Sangliers aux traces, desquelles les formes en doyuent estre grandes et larges, les pinces de la trace de deuant rondes et grosses, les couppantz des costez des traces ussez, sans se monstrier tranchantz, le talon large,



les gardes grosses et ouuertes, desquelles il doyt donner en terre sur le dur par tout ou il marche. Les traces de derriere doyuent marcher au costé, par le dehors de celles de deuant, demonstrent la grosseur des entre-cuysses. Les rides qui sont entre les gardes et le talon, se doiuent former en la terre, en demonstrent l'espeisseur et rudesse du poil, ses alleures grandes et longues. La marche de la trace doyt estre profonde et large, monstrent sa pesanteur.

Du iugement des boutis.

Chappitre L.

**Q**UAND le Sanglier fera des boutis dedans les hayes, pour auoir d'une racine qu'on appelle le Parc, le Veneur pourra cognoistre la grosseur et longueur de sa heure, en regardant la profondeur et largeur des boutis. Aussi il le pourra cognoistre aux fraischeurs, là ou il va faire les boutis pour vermeiller, et en autres lieux.

Le iugement du Souil.

Chappitre LI.

**L**E Veneur pourra cognoistre par le Souil, si c'est un grand Sanglier, en voyant la longueur, et largeur et grandeur d'iceluy Souil: ou bien au partir du Souil le pourra cognoistre aux entrées des fortz, aux fueilles, et aux herbes ou le Souil touchera, par ce qu'alors qu'il en sort il emporte la boüe et fange sur luy, laquelle marque les fueilles en entrant dedans, par lesquelles on peut veoir et iuger sa hauteur et grosseur. Ou bien aduient souuen-

tes fois qu'apres que le Sanglier s'est soüillé, il se va frotter contre un arbre, a laquelle il marque sa hauteur. Et si il ha esté fasché des Chiens, ou qu'il soit despit de quelque chose, il donnera volontiers deux ou trois coups de ses dentz ou deffenses dedans l'arbre, comme si c'estoyent coups de dagues : la ou le Veneur en pourra auoir iugement, tant de sa hauteur, que de la grosseur et largeur des deffenses. Il se peut iuger aussi par la bauge, car communement les grandz Sangliers en leur venaison font leurs bauges profondes en la terre, et au partir d'icelles iettent leur fiente, qui se nomme en terme de Venerie, lesses, lesquelles doyuent estre grosses et longues, demonstrent la largeur du boyau, car tant plus une beste est vieille, et tant plus elle ha le boyau large : combien que le Veneur ne les doyt point apporter a l'assemblée, mais doit suffire de les regarder aux lieux ou il en trouuerna.

La difference d'entre les Sangliers, & les  
Porceaux priuez.

Chappitre LII.

**L**A difference d'entre les Sangliers et Porceaux blancs est telle, que les bestes noires en leurs allures mettent tousiours la trace de derriere dedans celle de deuant, ou bien pres, et appuyent plus de la pinse que du talon, fermant l'ongle de deuant, et donnent communement des gardes en terre, lesquelles ilz eslargissent par dehors, les costez des ongles des traces tranchant

chantz et couppantz la terre : qui est au contraire des Porceaux blancz, car ilz ouurent les ongles de devant, en laissant tout plein de terre entre deux, et sont communement rondz et usez, appuyant plus du talon que de la pinse : aussi qu'aux Porceaux blancs le pied de derriere ne marche point dedans celui de devant, et leurs gardes se fichent toutes droictes en la terre, sans s'escarter, et les costez des ongles ne font que fouler la terre sans la trancher. Aussi que le dessous de la solle des Porcs blancs est plein de chair, qui ne peut pas applanir la forme de la trace, comme fait celle du Sanglier. Il y ha pareillement grand' difference aux bouttes, car une beste noire les fait plus profondz, a cause qu'elle ha la hure plus longue, et quand elle arrive dedans les champs semez, elle suyt volontiers un rayon, nazillant et vermillant tout le long d'un seillon, iusques a ce qu'elle soit au bout : ce que ne font les Porceaux blancs, car ilz ne suyuent pas leur bouttis comme font les Sangliers, mais seulement en font un en un endroit, l'autre plus loing, en trauersant les seillons, sans que leurs bouttis s'entretiennent l'un avec l'autre. Semblablement on les peut cognoistre l'un de l'autre aux gaignages, quand ilz vont au grain, car les Sangliers abbatent le bled tout en rond, la ou les Porceaux blancs ne le font pas.

La difference des Sangliers entre le malle & la femelle.

Chappitre LIII.

**C**OMBIEN que les Veneurs veulent dire qu'il n'y ha iugement ne cognoissance aux bestes de compaignée, qui sont soubz l'eage de deux ans, pour cognoistre les masles d'avec les femelles: si est-ce que i'ay veu plusieurs-fois des cognoisseurs en ces pays de Poitou, qui cognoissoyent le malle d'avec la femelle entre les cochons nez de l'année, suyuant la mere, desquelz ay voulu entendre les raisons, qui sont: Que les masles estantz apres la mere s'escartent communement plus loing que les femelles, et vont naziller et vermeiller a douze ou a quinze pas loing de la mere, par-ce qu'ilz ont plus grand hardiessse que n'ont les femelles: lesquelles font le contraire, car elles suyuent la mere le plus pres qu'elles peuvent, d'autant qu'elles n'ont pas le cucur ne la hardiessse de leur escarter, comme les masles: et le cognoissent encores aux alleures, disans que tout malle eslargist plus les iambes de derriere en marchant, que la femelle, et que communement ilz mettent la trace de derriere sur le bort de celle de deuant par le dehors, a cause des entre-cuysses, et des suytes qui leur font eslargir les iambes de derriere: ce que les femelles ne font pas, car elles sont vuydes entre les cuysses, qui les cause marcher plus estroit, et au dedans des alleures. Aussi le peut on cognoistre aux gardes, car le Sanglier malle les ha communement plus grosses,

cas, et quand ilz l'auroyent un peu eschauffé, il reprendroit son cueur, et ne feroit que tenir les Abboiz, en courant sus a tout ce qu'il verroit deuant luy.

Mais quand il sa voit chargé de Chiens et de Piqueurs d'arriuee, quile pressent un petit, il s'estonne, et perd le cueur, alors est contraint de fuyr et dresser pais. Il faut mettre des relays, mais ce doyuent estre des plus vieux et sages Chiens des meutes, d'autant que si on mettoit les ieunes Chiens vistes et vigoureux aux relaiz, alors que le Sanglier auroit accourcy ses fuytes, illes pourroit tuer en telle furie. Mais si c'estoit quelque Sanglier fuyart, qui eust accoustumé de prendre les campagnes, et tirer pays, on ne luy doyt donner que huyt ou dix Chiens de la meute, et mettre les autres au relays, a l'entrée du pays ou il voudra aller: car telz Sangliers ne cuydent pas tenir les abboiz qu'ilz ne soyent forcez: et quand ilz les tiennent, les Piqueurs y doyuent aller le plus secretement qu'ilz pourront, sans mener bruyt: puis quand ilz seront aupres du lieu ou sera le Sanglier, ilz se doyuent escarter tous autour du lieu ou il est, allans d'une course droit a luy: et n'est possible qu'ilz ne luy donnent un coup d'espee. Et ne faut pas qu'ilz tiennent la main basse, car ilz donneroyent dedans la hure, mais faut qu'ilz leuent la main haute, et donnent les coups d'espee en plongeant, se donnant garde le

Piqueur de donner au Sanglier du costé de son cheual, mais de l'autre costé : car du costé que le Sanglier se sent bleßé, il tourne incontinent la hure, qui seroit cause de quoy il tueroit ou bleßeroit son cheual. Que si il est en pays de plainz, il doit mettre un manteau deuant les iambes de son cheual : puis doit tuer le Sanglier a passades, sans s'arrester. C'est vne chose certainz que si on met des colliers chargez de sonnetes au col des Chiens courantz, quand ilz courent le Sanglier, il ne les tue pas si tost, mais il s'en fuira deuant eux, sans tenir les Abboiz.

I'ay mis icy les pourtraitz, comme il faut tuer le Sanglier a pié et a cheual, en pays foible, et en pays fort.

Passade d'un

Grand Sanglier




*Fin de la chasse du Sanglier.*

N ij

*Grès Sanglier & Sanglier*

# La Chasse du Lieure. ❧



LIEVRE ie suis de petite stature,  
Donnant plaisir aux Nobles & Gentilz :  
D'estre leger & viste de nature,  
Sur toute beste on me donne le pris.



De la propriété du Lieure, & pour cognoistre le  
Masse d'auec la Femelle.

## CHAP. LV.

**E** COMMANCERAY aux vertuZ et propri-  
etez du Lieure, lesquelles sont grandes, selon la  
stature de la beste.

Premierement, le sang du Lieure est grandement  
dissicatif: si vous l'appliquez sur quelque rongne ou  
d'artre, il la desseche et garist. Le Lieure ha vn petit  
os dedans la ioincture des iambes, lequel est souue-  
rainemēt bon pour la Colique-passion. Sa peau bruslée  
et mise en pouldre, est vn souuerain remede pour ar-  
rester le sang d'une playe, en l'appliquant dessus.

Le Lieure nous a monstré l'herbe de la Cicorée sau-  
uage, laquelle est fort bonne aux melancholiques: par  
autant qu'il est l'animal le plus triste et melancholiq  
que nul autre: et pour se guarir de sa tristesse, s'en va  
gister volontiers deffoubz icelle herbe, laquelle les an-  
ciens ont nommée PALATIVM LEPORIS, dit  
Palays du Lieure.

Le Lieure de sa nature cognoist de vingt et quatre  
heures en vingt et quatre heures la mutation du tēps.  
Quand il va au giste, il ne vent point que l'egail ni  
l'eau luy touchent, a ceste cause il suyt les grans che-  
mins et voyes. Et bien souuent la femelle fait de pe-  
tis sentiers, en coupant l'herbe et petites branches a-

uecles dentz. Et par autant qu'il y en ha quelques uns qui sont ladres, qui suyuent les eaux, ceux là ne font point de sentiers, et ne suyuent gueres les chemins mais font leurs ruzes dedans les eaux. Et deuez s'auoir qu'on ne trouue gueres de femelles ladresses, comme on fait des masles : a ceste cause, le Piqueur pourra iuger quel Lieure c'est, et ou il sera gisté, en voyant sa nuit.

Les Lieures vont au rut communément en Januier, Feurier, et Mars, allant chercher les femelles, iusques a sept ou huit lieues loing d'ou ilz sont nez, suyuans les grans chemins : comme ie declareray ci apres.

Le masle attend mieux les Chiens et de plus pres au giste, que ne fait pas la femelle, a cause qu'il se sent plus viste, le corps plus dispos et hardi.

Si au partir du giste le Lieure leue les oreilles, ne faisant point de puissance, et qu'il retronffe la queue sur l'eschine, c'est signe d'un fort et malicieux Lieure. Combien que Phébus die qu'il n'y ha point de iugement entre le masle et la femelle des Lieures, si est ce que ie luy prouueray le contraire. Car le masle ha communement son repaire ou ses crottes plus petites, plus seches, et plus aguillonées au bout, que non pas la femelle, laquelle les fait grosses, rondes, et non si seches que le masle. La raison est, que la femelle ne fait pas tant de pays la nuit, et aussi qu'elle est beaucoup plus


grande: qui est cause qu'elle iette ses crottes plus grosses. Par autre moyen cognoistrez le masle aux Chiens, en deffaisant sa nuit: car il bat plus les grans chemins et carrefours, prenant plus grans pays en lieux descouuers, que la femelle, et fait ses ruzes plus sottes, et de plus grande espace: la femelle les fait plus courtes, et par lieux plus couuers, en tournoyant comme un Connil autour des broffes. Et si la femelle va faire sa nuit dedans les blez vers, elle ne traaverse gueres les seillons mais les suyt de long, et s'arreste aux plus fortes broffes du blé pour viander: ne luy suffisant pas d'en manger son saoul: car elle le coupe, et laisse dans les seillons. Plus on cognoist le masle, en le voyant partir du giste, parce qu'il ha le derriere tout blancheastre, comme s'il auoit esté plumé. Oubien le cognoistrez par les espaulles, lesquelles sont communément ronges, ayant parmy quelques poilz longs. Semblablement le cognoistrez a la teste, laquelle il ha plus courte et plus ioffue que la femelle, le poil et barbe des iouës long, et ha volontiers les oreilles courtes, larges et blancheastres, qui est au contraire de la femelle: car elle ha la teste longue et estroite, et les oreilles grandes: le poil de dessus l'eschine d'un gris tirant sur le noir. Et volontiers quand les Chiens chassent la femelle, elle ne fait que tournoyer autour de son pays, passant sept ou huit fois par un mesme lieu, sans se vouloir iamais forpayser. Le masle fait le contraire, car si les

au-tour de son giste , alors il prend congé de sa Chiens le chassent, et qu'il y fayt fait deux torrs mente , et s'en va aucunes fois trois ou quatre lieues loing sans s'arrester, en quelque pays ou il aura esté au tresfois, duquel il pourroit estre venu : car les Lieures vont aux passages a sept ou huit lieues loing , et les pourrez cognoistre en ceste maniere. Quand vous verreZ que voz Chiens trouueront la nuit d'un Lieure dedans les carrefours ou chemins , et qu'il aura fort ruzé sur quelques petis coustaux secz, sans auoir gueres fait de pays , ne s'estre pourmené dedans les blez , c'est signe que c'est un Lieure qui n'est que venu, lequel se sera arresté au plus haut lieu, pour regarder le pays et le lieu ou il ira faire son giste , et pour se sauuer si les Chiens, ou autres choses le rencontroyent.

Vous le pourrez encores cognoistre en ceste sorte. Communement les Lieures de passage font leur giste au couuert, par autant qu'ilz sont en doubte et crainte : et quand les Chiens les trouuent, ilz font les rompuz, se faisant relancer deux ou trois fois : parce qu'il leur fasche de sortir du fort , ne sachant le pays : mais alors qu'ilz voyent que les Chiens les pressent, ilz prennent les chemins par ou ilz sont venuZ, et s'en retournent en leur pays. Par ainsi si un Lieure se fait relancer deux ou troys fois aupres de son giste , c'est signe que c'est un Lieure de passage, qui pourra emmener les Chiens bien loing.

Des finesſſes & malices des Lieures, que les Piqueurs  
doyuent entendre pour les prendre a force.

## CHAP. LVI.



**I**E veux bien dire la chasse du Lieure estre plus plaisante, et de plus grand esprit, pour les Gentilz-hommes, que de nulle autre beste, d'autant qu'ilz trouvent leur plaisir a toutes heures, et avec petis fraiz, voyant tousiours courir leurs Chiens devant eux : par quoy peuvent iuger, sans prendre grand' peine ne tra-

uail, leſquelz ſont les meilleurs, et mieux chaffantz, requerantz, et forcenantz. Et auſſi que c'eſt grand plaifir de voir l'eſprit de ce petit animal, et des ruzes qu'il fait pour ſe deffaire des Chiens. Et faut que les Piqueurs y ſoyent fins, et d'eſprit, pour entendre ſes ruzes, et malices : ce que j'ay pratique toute ma vie, qui m'a cauſé mettre par eſcrit vne partie des experiences qu'en auroys peu veoir, cognoiſtre, et entendre.

Premierement, le Piqueur qui ſera apres les Chiens, doit regarder au partir du giſte pluſieurs pointz. S'auoir eſt, quel temps il fera : car ſi c'eſt en temps de pluye, le Lieure dreſſe et ſuyt plus les chemins qu'en autre temps, et ſ'il arrive a quelque boys taillis, il n'entre pas dedans, mais ſe relaiſſe au bort, et laiſſe paſſer les Chiens : puis quand ilz ſont outre-paſſez, il ſ'en retourne ſur ſes meſmes pas par ou il ſera venu, au pays ou il aura eſté pouſſé, parce qu'il ne veut pas entrer dedans les fortz, a cauſe l'egail, qui eſt parmi le bois.

A telles ruzes, le Piqueur doit demourer a cent pas pres du bois, par ou le Lieure ſera venu, car il ne faudra point a le voir retourner ſur ſes pas droit a luy : et pourra a l'heure le Piqueur forbuier ſes Chiens, et les rappeler, d'autant qu'il ſeroit mal-aiſé qu'ilz redreſſaſſent telles ruzes, parce qu'ilz ne cuydent pas que le Lieure ſoit retourné ſur luy : auſſi qu'ilz penſeroient que ce fuſt le contrepie. Plus doit bien regarder en quel

ou on trouuerra la giste du Lieure, et de quel vent il s'est caché : car si c'est du vent de Galerne ou Hautain, il ne cuydera pas fuir le nez dedans, mais le cognoistra, ou luy tournera le cul. Aussi que s'il fait sa giste en l'eau, c'est signe qu'il est ladre : a telz Lieures le Piqueur doit prendre garde tout le iour dedans les eaux : car ilz y font volontiers leurs ruzes et fineses. Dauantage, le Piqueur regardera si c'est un masle ou une femelle, et s'il est nourri au pays : ce qu'il pourra cognoistre par ce que i'ay declaré cy dessus : car c'est une chose certaine qu'un Lieure nourry au pays, et principalement la femelle, si le Piqueur regarde le premier pays et cerne qu'il prendra la premiere fois au partir du giste, estant deuant les Chiens, tous les autres qu'il fera tout le iour seront par mesmes lieux, et seront par mesmes passees et musses : si ce n'est, comme i'ay dit, quelque Lieure masle qui fust venu de loing, oubié que les Chiens l'eussent si mal mené et laissé qu'il fust contraint d'abandonner son pays, et se forpaïser : ce qu'ilz font volontiers quand ilz ont esté chassez deux heures sans deffaut. Au commencement que les Chiens chassent les Lieures, ilz ne font que tourner, passant cinq ou six fois par vn lieu, et sur leurs mesmes pas. Et faut entendre que si les Chiens courans faillent a prendre un Lieure un iour, le Piqueur peut bien regarder le pays, et les lieux par ou il aura passé, car si une autrefois il le retrouue, et que les Chiens

le chassent, il passera par mesmes lieux, et fera mesmes ruzes qu'il aura faites le iour qu'il se sera sauvé : et par ce moyen pourra cognoistre sa malice, et le pays ou il vouldra aller, et beaucoup ayder a ses Chiens.

J'ay veu un Lieure si malicieux, que depuis qu'il oyoit la Trompe, il se leuoit du giste, et eust il esté gisté a un quart de lieue de là, et s'en alloit nager en un estang, se relaiissant au milieu d'iceluy sur des ioncs, sans estre aucunement chassé des Chiens : puis a la fin ie descourry sa finesse, car ie m'en allay cacher secretement au lōg de l'estang, pour savoir qu'il deuenoit, lors allay faire decoupler les Chiens là ou ie le pensois trouver, et incontinent qu'il ouit la Trompe, il se leua d'effroy, et s'en vint deuant moy se relaiisser au milieu de l'estang, et pour pierre ou motte que ie luy seusse ietter ne voulut bouger de là : alors ie fu contraint me despouiller pour le faire desloger : et attēdit presque a estre pris avec la main, premier que vouloir bouger : me voyant pres de luy, il se met a la nage, et sortit deuant les Chiens, ou il courut encores l'espace de troys heures, premier que d'estre pris, nageant et faisant toutes ses ruzes dedans les eaux. J'ay veu courir Lieure bien deux heures deuant les Chiens, qui apres auoir couru venoit pousser un autre, et se mettoit en sa giste. J'en ay veu d'autres qui nageoyent deux ou trois estangs, dont le moindre auoit quatre vingtz pas



*pas de large. I'en ay veu d'autres apres avoir esté bien courus l'espace de deux heures, entroient par dessous la porte d'un tect a brebis, et se relaiissoient parmi le bestail. I'en ay veu, quand les Chiens les courroient, qui s'alloient mettre parmi un troupeau de brebis, qui paissoit, par les champs, ne les voulans abandonner ne laisser: dont fu contraint de coupler mes Chiens, et faire toucher les brebis a la Bergere iusques dedans le tect: et alors qu'il vit les maisons, se depart, et s'en va: là ie decouple mes Chiens, et le pris. I'en ay veu d'autres, que quand ilz oyoient les Chiens couranz, se cachoient en terre. I'en ay veu d'autres qui alloient par un costé de haye, et retournoient par l'autre, en sorte qu'il n'i auoit que l'espeisseur de la haye entre les Chiens et le Lieure. J'en ay veu d'autres, quand ilz auoyent couru demye heure, s'en alloient monter dessus une vieille muraille de six piez de haut, et s'alloient relaißer en un pertuis de chauffaut, couuert de lierre.*

*J'en ay veu d'autres qui nagoient une riuere, qui pouuoit auoir huyt pas de large: et la passoient et repassoient en la longueur de deux cens pas, plus de vingt fois deuant moy.*

*A ceste cause, faut que le Piqueur soit caut, et fin, pour chasser le Lieure: car il est certain que si les Chiens sauent bien prendre le Lieure a force, ilz pourront courrir toutes bestes: et est le vray principe et commencement pour les dreser et affiner le nez.*

Puis quand on les veut dresser pour le Cerf, ilz abandonnent aysément le Lieure, parce que la venaison du Cerf est plus friande que celle du Lieure, et plus desirée des Chiens couranz: aussi que le Cerf ha plus grand vent et sentiment. Les Lieures ne vivent que sept ans pour le plus, et principalement les masles, Ilz ont ceste malice, que si le masle et la femelle sont accompagnez ensemble en un pays, iamaïs n'y laisseront demourer autres Lieures estranges, s'ilz peuvent, si ce n'estoyent ceux qu'ilz ont engendrez. Et pource dit on: Tant plus on chasse en un pays, et plus on y trouue de Lieures: parce que ceux des autres pays y viennent.

Comme on doit dresser les ieunes Chiens pour le Lieure.

#### CHAP. LVII.

REMIEREMENT, a la chasse du Lieure, il **P**est requis qu'il n'y ayt que deux ou trois Piqueurs, pour le plus: dont faut qu'il y en ait un qui menace les Chiens qui demoureront derriere: les autres les doyuent faire chasser et requester: car s'ilz estoyent grand nombre de Piqueurs qui parlassent aux Chiens, ilz romproyent les erres du Lieure, ou bien estonneroyent les Chiens aux deffaux: parce que le Lieure fait tant de ruzes que les Chiens ne sauent aucunes fois ou ilz en sont: et ne font que leuer la teste, pour demander secours a leur maistre: lequel alors doit prendre ses cer nes et enceintes autour du deffaut, en les resiouissant:

ce qu'il ne sauroit faire s'il estoit foulé des Piqueurs. Celuy qui dresse et fait chasser les Chiens, doit porter une grande gibbeciere de toile, pleine de friandises pour leur donner, afin qu'ilz le cognoissent : car les Chiens veulent sur tout cognoistre leur maistre, sa voix, et sa Trompe : et lors qu'il les forbuera, il cognoistra qu'ilz viendront plustost a sa voix qu'a celle d'un autre : laissant toutes choses pour venir a luy : aussi ne les doit il iamais forbuern'appeler en faute.

Et s'il aduient qu'il veille faire retourner ou venir les Chiens a luy, pour les faire entrer en quelque taillis ou fort, il les doit appeler en ceste sorte,



Hourua a moy the-hau.

En sonnant de la Trompe un son bien long, comme ainsi,



Tran.

Puis quand les Chiens seront tous arrivez a luy, il doit regarder quelque belle mussé ou passée, pour les faire entrer dedans le taillis : a laquelle mussé il doit ietter une poignée de petites friandises de sa gibbeciere, en frappant de sa gaule, et criant ainsi,



Aguerecy aguerecy hau il ha passé icy.

Et faut entendre qu'on ne doit iamais sonner en queste le gresle de la Trompe, mais bien le gros tant qu'on voudra, si ce n'estoit que le Piqueur voulust appeler ses Chiens a luy : oubien qu'il les voulust faire retourner d'un pais pour aller en un autre, comme i'ay dit dessus : alors pourroit sonner un mot long, tout seul, du gresle de la Trompe. Et quand les Chiens seroient venus a luy, il ne faut pas qu'il s'oublie de leurietter quelques petites friandises, afin de ne se moquer point d'eux. Car lors qu'il sonnera le gresle, il faut que ses Chiens entendent que le Lieure est debout, et que leur maistre les appelle ou forhue, par autant que s'il sonnoit le gresle en la queste, les Chiens n'entendroyent et ne congnoistroyent la disfeence d'entre la queste et le forhu.

Il faut icy noter deux secretz, dont le premier est : Que si le Piqueur ha une ieune meute de Chiens a dresser, il doyt regarder le pays ou il leur fera les premieres curées, et de quoy : car selon les lieux ou ilz seront dressez au commencement, et selon les bestes qu'on leur voudra faire courir, et de quoy on leur fera curée, il leur en souviendra tousiours. A ceste cause, si au commencement qu'on dresse de ieunes Chiens, on leur accoustume d'esire descouplez et dressez aux plaines, s'ilz y poussent des Lieures, et qu'ilz y ayent plaisir, toute leur vie il leur en souviendra et alors

Et alors qu'on les descouplera dedans les boys, ilz ne feront cas d'y quester, mais iront chercher les plaines et champs, ou ilz auront accoustumé d'auoir plaisir, et trouuer les Lieures. Ne plus ni moins en feront ilz aux bocages, si au commencement ilz y sont dressez, et qu'ilz y ayent heu plaisir, pensant y trouuer tousiours leur gibbier. Et par ainsi il est besoing de droisser les Chiens dedans le pays ou lon se veut tenir: car Chiens courantz qui sont nourris aux plaines ne peuvent accoustumer les bocages: ne plus ne moins que ceux qui sont nourris aux bocages ne peuvent accoustumer les plaines. L'autre secret est, qu'il ne faut iamais droisser, n'accoustumer les Chiens a chasser les matinées, a cause de la rousée, et fraischeur de la terre: d'autant que si vous leur accoustumez telles fraischeurs et humiditez, et qu'apres vous les vouluſſiez mener a la chasse sur le haut du iour, et qu'ilz sentissent la chaleur du Soleil, et la rousée tombée, ou quelque petit vent arre, ilz ne voudroyent chasser ne quester, mais s'en iroyent chercher les ombres pour se cacher. Et par ainsi il est besoing d'accoustumer et droisser les Chiens sur le haut du iour, et non aux matinées. La droite saison pour commencer a droisser ieunes Chiens, est en Septembre, Octobre, et Novembre: par-ce que le temps est temperé, et que les chaleurs ne sont trop vehementes, et aussi que les ieunes Lieures sont sotz, et n'ont point de corps, ne sachant faire encores leurs

ruzes et malices, et se sont relancer plusieurs fois devant les Chiens, lesquelz y prennent fort grand plaisir, et se dressent mieux qu'ilz ne seroyent pas s'ilz fuy-oient, et s'esloignoyent d'eux.

Il est tout certain que les Lieures ont plus grande senteur, et sont mieux couruz des Chiens quand ilz viandent et paissent les bledz vertz, qu'en toutes autres saisons de l'année. Toutesfois il y en ha qui de nature ont plus grand senteur les uns que les autres, et qui sont plus desirez des Chiens, comme les grans Lieures de boys, et ceux qui sont ladres, lesquelz se tiennent pres des eaux. Mais les petis Lieures rouges, qui sont du genre des Connilz, n'ont pas si grand sentiment, et ne sont pas tant desirez des Chiens courantz que les autres. Ceux qui viandent sur les pelonzes ou petis coustaux, d'une herbe qui se nomme Serpolet, ou Poliot, sont communement fortz Lieures, et courent longuement. Aussi il y ha des Lieures plus malicieus les uns que les autres, et principalement les femelles, car elles font leurs ruzes plus courtes, et plus souvent que ne font pas les masles, ce que les Chiens n'ayment pas : par-ce qu'il fasche a Chiens vigoureux et de cuer de tournoyer si souvent, d'autant qu'ilz desirent une beste qui fuye devant eux, pour courir a leur force. A telz Lieures qui ruzent si souvent, il est requis de faire les cernes grans, a fin

d'endorre toutes leurs ruzes , et n'en trouver que la sortie : ce faisant on abbrege bien leur force , et les contraint on de ne ruzer plus. Il y en ha aussi qui fuyent les chemins et voyes, desquelz les Chiens ne peuvent avoir sentiment , a cause qu'il n'y ha branche, herbe , n'aucune humidité ou ilz touchassent du corps, par ou les Chiens en peussent assentir , ainsi qu'ilz feroient silz estoient en autres lieux conuertz , comme boys, bledz, et autres fraischeurs. Et pour-ce quand le piqueur trouuerra telz Lieures, et qu'il verra le deffaut de ses Chiens en un chemin, il les doyt pousser outre tout le long du chemin , les suyuantz tousiours insques a ce que les Chiens en trouuent la sortie, ou bien qu'il ayt trouué une petite valée ou fraischeur par le milieu du chemin , ou les Chiens en peussent avoir sentiment. Et luy-mesmes doyt mettre pied a terre, regardant en la poudre, ou autres lieux, pour en reuoir par pied, ce qu'il cognoistra aysément , car la forme du pied du Lieure est aigue, et faicte a la semblance d'une pointe de cousteau, ayant ses petis ongles fichez tous droitz en terre, qui marqueront tout au tour, venant tousiours en appointissant : d'autant que iamais le Lieure, quand il fuyt, n'ouure les ongles , comme font les bestes puantes, mais tient tousiours sa patte serrée , en forme d'une pointe de couteau. Il y ha aussi certains pays et saisons ou les Chiens n'ont aucun sentiment des Lieures : comme



en Hyuer, au pays des plaines, ou les terres sont grasses, et fortes : par-ce que le Lieure ha la patte pleine de poil, et quand il fuyt, la terre qui est grasse se prent de contre, laquelle il emporte avec le pied, qui couure et oste tout le sentiment, que les Chiens en pourroyent auoir. Et aussi qu'aux plaines il n'y ha ne branches ni herbes ou il peust toucher du corps, non plus que dedans les chemins. D'auantage, il faut entendre qu'il y ha aussi certains moys esquelz les Chiens n'ont point de sentiment, comme a la saison du Printemps, a cause de la vehemente odeur et senteur des fleurs, qui outrepassse celle du Lieure. Semblablement, faut se donner garde de mener les Chiens a la chasse, quand la terre est gelée, car ilz se dessoleroient les piedz, et perdroyent les ongles : qui est au contraire des Lieures, qui courent mieux en ce temps la, qu'en autre, a cause qu'ilz ont les piedz fourrez. Il faut parler aux Chiens quand ilz chassent, en mesmes termes qu'on parle a la chasse du Cerf, fors aux forbuiz, car en lieu de crier, Thia Hillaud, il faut crier, Vaulecy aller : et mesmes sons de trompe, excepté en la queste, auant que le Lieure soyt bouté, car on ne doyt sonner que le gros, comme i'ay dit cy dessus.

Vous deuez entendre ce secret, qui est, que quand on dressera des Chiens courantz, on ne leur doyt iamaiz donner curée avec les Leuriers : par-ce que si




*on accoustume de faire prendre les Lieures aux Leuriers deuant les Chiens courantz, depuis qu'on crira et forbuera, les Chiens courantz ne feront que leuer la teste, pensant tousiours veoir le Lieure deuant les Leuriers, sans vouloir mettre le nez en terre, ne faire semblant de quester ne de chasser. Mais les droytes curées qu'on doyt donner a ieunes Chiens, doyuent estre avec vieux Chiens courantz, sages, lesquelz les dresseront, et apprendront a faire leurs cernes.*

*O iij*

En quel temps & saison on doyt chasser le Lieure pour  
le prendre a force. Et comme il le faut faire  
quester, requerir, & lancer aux  
Chiens.

Chappitre LVIII.



**L**A DROITE venerie et saison pour prendre  
le Lieure a force avec les Chiens courantz, commen-  
ce a la my-Septembre, et finist a la my-Avril, a cau-  
se des fleurs, et vehementes chaleurs, qui commencent

à regner, qui oste aux Chiens le sentiment du Lieure. Dont en Septembre les piqueurs doyuent commander a donner curée a leurs Chiens, et les renouveler : car en ce temps la les Lieures sont ieunes et foibles, comme i'ay dit, et ainsi que la saison se passe, leur force et vertu s'augmente. Ne plus ne moins est il des Chiens, car tant plus ilz courent, et ont de curées, et plus sont ilz meilleurs et vigoureux : et aussi que l'Hyuer s'approche, qui augmente les fraischeurs. Et lors que les Chiens ont passé deux ans, on les peut champayer, et mener a la chasse trois fois la semaine, car ilz en valent mieux.

Quand le Seigneur voudra aller a la chasse, le valet de Chiens doyt regarder le temps et la saison ou il sera, a fin d'aller chercher le Lieure aux gaignages, selon qu'ilz seront en celuy temps, comme aux menus bledz, auoynes, prez, et autres lieux ausquelz il doyt descoupler ses Chiens. Puis s'il y ha quelques Chiens qui viennent a rencontrer de la nuit du Lieure, le piqueur se doyt arrester tout court, et les laisser faire. Et alors qu'il verra qu'ilz commanceront a leur assembler, et eschauffer tous ensemble, il les doyt resiouyr en parolles ioyeuses, et nommer ceux qu'il verra qui seront le mieux, comme disant, Hau Gerband, Hau Myraud, ou est il allé ?

Il est tout certain que les Chiens ont plus grand sentiment au viandy du Lieure, qu'ilz n'ont pas quand il

en sort, pour aller en son giste, combien qu'il s'en aille de meilleur temps. La raison est, quand un Lieure est aux champs, et qu'il viande, il s'assied volontiers, et touche du corps a terre: aussi qu'il passe plusieurs-fois par un lieu, et en passant, et prenant son viandy, il donne senteur aux herbes de son haleine, ou bien y laisse ses crottes ou repaire: qui est l'occasion pourquoy les Chiens y ont plus grand sentiment qu'ilz n'ont pas quand il en sort, par-ce que quand il sort de son viandy pour aller au giste, il suyt volontiers les grans chemins, routes, ou sentiers, y faisant ses ruzes et malices, en bondissant et allant le plus legerement qu'il peut. A ceste cause, quand le piqueur verra que ses Chiens aurent deffait la nuit du Lieure au viandy, et qu'ilz commenceront a trouver la sortie par ou il dresse pour aller a son giste, ce qu'il fait communement, par quelques petis sentiers ou chemins, il les doyt laisser faire, et aller tout bellement apres eux, sans se haster: et s'il veoit que ses Chiens tombent en deffaut, c'est signe que le Lieure ha fait une ruze, et qu'il est allé et venu sur luy. Alors doyt crier, Hau ou est il allé, Horua a moy Theau, sans bouger du lieu ou il sera, car s'il approchoit pres d'eux, il les feroyt outre-passer les erres du Lieure, et là les doyt faire requester, en les regardant faire, et les resioüyssant de la bouche. Et s'il aduenoit que ses Chiens ne peussent deffaire les ruzes dedans les

routes ou chemins , il doyt prendre ses cernes au tour de là par les fraischeurs, et lieux plus commodes pour le nez de ses Chiens, par ce que s'il trouue la sortie des ruÿes que le Lieure pourroit aucir faictes dedans les chemins, pour entrer en quelque taillis ou fort , alors ses Chiens le pourront aller querir aysément, et luy-mesmes doit battre les broffes avec la gaule pour leur ayder a le bouter. Et s'il aduient qu'il trouue quelque vieux giste , il doit mettre la main a la gibbeciere, et ietter quelque friandise dedans, et appeller tous ses Chiens a luy, en criant, Ha guerecy, Theau voy le liët. Et faut noter que le piqueur doit auoir un loppin de lart grillé, enueloppé en sa gibbeciere , de-quoy il doit froter le bout de sa gaule, car par la pourra accoustumer ses Chiens a venir sentir le bout d'icelle. Et alors qu'il les voudra faire passer a une muſſe , il n'aura qu'a mettre le bout de sa gaule en terre, et les appeller, ilz ne faudront a venir incontinent, se batans a qui passera le premier. Et si d'auanture les Chiens ne trouuoient le Lieure sorty de ses cernes, le piqueur doit ramener tout bellement ses Chiens au lieu ou aura esté son deffaut, et regarder de quel costé le Lieure auoit la teste tournée quand il est entré dedans le chemin : et s'il l'auoit tournée aual, il doit appeller ses Chiens , et les faire queſter des deux costez fort longuement : car aucunes fois les Lieures suivent les chemins , pour faire leurs ruÿes , plus d'un grand quart de lieüe, sans en vouloir sortir. En telz lieux les

Chiens n'en peuvent avoir sentiment, a cause de la poussiere, et autres raisons que j'ay dites cy dessus, et les Lieures demeurent souvent sur le bord des chemins, ou bien pres de là, a ceste cause celuy qui menera les Chiens les doit faire quester aux costez. Et si tous ces cernes ne pouvoyent encores redresser les Chiens, le piqueur peut bien penser que le Lieure ha fait un huruary sur luy, et pourra rappeler ses Chiens de là ou il vient, en foullant et battant tout autour, en prenant ses cernes plus grans: et n'est possible que les Chiens ne redressent les erres, ou qu'ilz ne le boutent: toutesfois qu'ilz passeront bien souvent dessus quelques Lieures, premier qu'ilz vueillent sortir de la giste, ou bien se laisseront prendre dedans. Combien que ie louë grandement de veoir deffaire la nuit du Lieure aux Chiens, et l'aller querir et pousser en la giste, si est-ce qu'il me semble que c'est une chose trop longue, et de peu de plaisir, par autant qu'ilz ne font que balancer et troller. Mais seroit beaucoup plus court, et de plus grand plaisir, de le trouver et chercher en la maniere qui s'ensuyt.

Quand trois bons piqueurs seront ensemble, et qu'ilz verront que les Chiens rencontreront de la nuit d'un Lieure, en quelques bledz, ou autres gaignages, ilz doivent regarder la saison où ilz seront, et quel temps il fera, car si c'est au Printemps ou Esté, les Lieures ne se gistent pas au fort, a cause des Fourmis, et autres

*Barbotz*, et des *Serpens* et *Laisardz*, qui les chassent des fortz, alors sont contrainctz de leur gister dedans les bledz, guerez, et lieux foibles. En Hyuer ilz font le contraire, car ilz se gisent en quelques gros balliers ou fortz, principalement quand les ventz de *Galerne* et *Hautain* regnent, lesquelz ilz craignent grandement. Or donc selon le temps et les lieux où ilz verront que les *Lieures* seront au giste, ilz y doivent appeller leurs *Chiens*, et battre tout de rang, et en accoustrant les *Chiens* a telles questes, ilz trouueront plus de *Lieures*, et auront plus de plaisir, que non pas de leur apprendre a deffaire la nuit. Et pourront dresser leurs *Chiens* de telle sorte, qu'en frappant un coup de gaule sur les broffes, les *Chiens* se battront a qui entrera le premier, comme font les *Chiens* d'oyseaux a la remise des *Perdrix*.

Quand le *Lieure* sera lancé et bouté, le piqueur s'en doit aller sur les voyes, et appeller tous ses *Chiens* en forbuant, et sonnant de la trompe, sans bouger du lieu où il sera, iusques a ce que ses *Chiens* ayent tous passé deuant luy. Puis quand il les verra tous outre-passez, et amutez sur les erres du *Lieure*, il les doyt suyre tout bellement sans approcher d'eux, ne les presser, et sans gueres crier, ne sonner de la trompe, par ce qu'au commencement que les *Chiens* l'ont bouté, la chaleur les transporte volontiers, et si le piqueur les pressoit, il les eschaufferoit encores d'auantage, qui



seroit cause qu'ilz outrepasseroient les erres. Mais quand ilz ont couru l'espace d'une heure, et qu'ilz sont bien eschauffez sur les fuytes, il pourra approcher de ses Chiens, par-autant qu'ilz auront perdu la chaleur, et qu'ilz commanceront a courir sagement. Et sur tout, il doyt regarder les premieres ruzes et malices que fera le Lieure, comme i'ay dit cy deuant, et se gouverner tout le iour par la: car toutes les autres qu'il fera sembleront a icelles. Et selon les ruzes qu'il verra, et le pays ou il sera, il doit faire ses cernes, grans ou petits, longs ou estroitz, en cherchant les lieux les plus commodes, et plus fraiz pour le nez de ses Chiens.

Il y ha deux façons de prendre le Lieure a force, qui sont, que les uns le prenent sans forbuier, mais suyuient seulement les Chiens par ou ilz vont, sans abbreger les ruzes. Et me semble que ceste prise est la plus honorable, d'autant qu'on cognoist la bonté, force, et vigueur des Chiens.

Les autres le prenent autrement, car depuis qu'ilz ont veu faire le premier cerne a un Lieure, et qu'ilz ont heu cognoissance du pays qu'il tient en ses fuytes, ilz vont gaigner les deuantz pour le veoir a veüe, et en cest endroit forbuent leurs Chiens, abbregeans les ruzes. Et quand les Chiens sont dressez en ceste sorte, ilz sont de si bonne creance, qu'ilz laissent leur droit pour aller au forbu, qui est cause que les Lieures ne courent que bien peu deuant eux. Et certes qui veut faire  
grande



*grande execution de prendre Lieures, ie louë grandement les Chiens qui prennent de grans cernes en leurs deffaux : toutes-fois que pour bien veoir chasser, il n'est que Chiens qui suyuent le droit. Mais pour abbreger les Lieures, ie donne la loüange a ceux qui prennent les grans cernes, par ce qu'ilz enueloppent dedans, toutes les ružes et malices des Lieures.*

*J'eusse descript plus amplement le moyen de bien hal-  
ler les Chiens, mais d'autant que i'en ay donné intelli-  
gence, tant en la venerie du Cerf, qu'aux chappitres  
cy deuant, traitans des malices et ružes des Lieures:  
par lesquelz chappitres les piqueurs peuuent cognoistre  
entierement les secretz et moyens de s'y gouverner, et  
aussi qu'il y ha tant de bons maistres qui entendent  
l'estat, ie me suis deporté d'en faire plus ample recit.*

Comme on doyt faire la curée du Lieure aux Chiens.

## Chappitre LIX.



**Q**UAND le Lieure sera pris , il faut que le valet de Chiens coupe de petites gaules ou houlfines bien deliées a un arbre , puis prendra le Lieure , et le portera en quelque beau lieu , sus de l'herbe la plus nette qu'il pourra trouver. Alors le piqueur descendra de Cheual , qui sonnera la mort du Lieure , pour appeller tous ses Chiens. Ce fait , le valet de Chiens defendra

la curée des Chiens, avec ses gaules, lesquelz abboyront tout au tour de luy. Le piqueur sonnera tousiours, comme dessus, en frottant ses Chiens avec la main, leur monstrant le Lieure, en disant, Va le mort. Puis le prendra et l'ouurira, apres le despoüillera deuant eux, en luy ostant le pas, le poulmon, et la peau, lesquelz il encruchera en quelque arbre, de peur que les Chiens en mangent, par ce qu'ilz leur sont fort contraires, tellement qu'ilz en tombent malades. Quand le Lieure sera despoüillé et ouuert, le piqueur prendra le pain, fromage, et autres friandises, lesquelles il mettra dedans le corps du Lieure, afin de les arrouzer et brunir de sang. Puis prendra le Lieure, duquel otera les espaulles et la teste, qu'il mettra en sa gibbeciere, pour donner a quelqu'un de ses ieunes Chiens, lequel n'aura osé approcher de la curée. Alors le valet de Chiens aura sa corde toute preste pour bien attacher le Lieure par quatre ou cinq lieux, afin de faire tirer ses Chiens, et qu'un n'emporte pas tout: puis le cachera, et s'en ira a cent pas de là porter son forbu. Ce pendant le piqueur estendra sa curée de fromage, et autres friandises, bruyes du sang du Lieure, sur l'herbe nette, et la defendra des Chiens avec sa gaule. Cela fait, il commencera a sonner pour Chiens, et leur laissera manger la curée, en les resioüyssant, et frottant les costez, sonnans incessamment pour Chiens. Quand la curée sera presque acheuée, le valet de Chiens qui sera, comme dit

*est, a cent pas loing du piqueur, doit forhuer ses Chiens avec la trompe : soudain le piqueur les menacera, et fessera avec la gaule, en criant, Escoute a luy valet. Alors le valet de Chiens leur monstrera le Lieure, le tenant le plus haut qu'il pourra avec les mains: et doyt tenir sa corde par un bout, a laquelle le Lieure sera attaché par l'autre bout. Puis quand il verra ses Chiens tous au tour de luy, il iettera son Lieure au milieu d'eux, et leur laissera manger, apres les doyt mener boire auant que les coupler. Et encores pour bien faire, les faut ramener au logis tous descouplez, a fin de les laisser paistre, par ce qu'ilz sont subiectz a estre malades quand ilz ont mangé de la chair de Lieure: puis doit auoir du pain, pour leur donner apres la curée, s'ilz en veulent manger, de peur qu'ilz ayent mal au cueur, et qu'ilz rendent leur gorge.*

*★ Fin de la chasse du Lieure.*

faire entrer. Et se faut bien donner garde au commencement qu'on les droisse de les rudoyer, ne que les Tesson ou Regnardz les blessent en terre, par autant que s'ilz y estoient battus ou outragez, ilz n'y voudroient plus retourner. A ceste cause on ne doyt iamais faire entrer les Bassetz es terres où il y ayt de vieux Tesson ou Regnardz, que premier ilz ne soient dressez, et qu'ilz n'ayent leur an accomply.

Encores faut-il mettre tousiours un vieux Basset devant eux, qui endurera la fureur des Tesson. Vous pouvez droisser les Bassetz et mettre a la chair, en plusieurs manieres, dont la premiere est, qu'en la saison que les Regnardz et Tesson ont leurs petis, il faut prendre tous les vieux Bassetz, et les laisser aller en terre: puis alors qu'ilz commenceront a abboyer, on doyt tenir tous les ieunes au pres des pertuys, un a un, de peur qu'ilz se battent, et leur faire esconter les abboiz. Apres que les vieux Regnardz ou Tesson seront pris, et qu'il n'y aura plus que les petis, faut prendre tous les vieux Bassetz, et les coupler, puis laisser aller les ieunes, les hardissant en terre, en criant, Coule a luy Basset, Coule a luy, hou, prenez, prenez. Et alors qu'ilz tiendront quelque ieune Tesson ou Regnardeau, il leur faut laisser estrangler dedans la tranchée ou pertuys, se prenant bien garde que la terre ne tombe sur eux, de peur qu'elle leur nuysse. Ce fait faudra porter tous les petit Tesson ou Regnardeaux au logis, et en


faire fricasser les foyes et le sang, avec du fourmage, et de la gresse, puis leur en faire curée, en leur monstrant la teste de leur gibbier. Après que les Bassetz auront mangé la curée, ou bien au par-avant, il les faut laver d'eau tiede, avec du saon, pour faire tomber la terre, qui sera mesée entre le poil et la peau, car autrement ilz pourroyent deuenir galleux, d'une galle qui seroit fort difficile a guarir. On les peut encores droisser en une autre maniere, sçauoir est: Il faut faire prendre de vieux Regnardz ou Tessons tous vifz, par les vieux Bassetz, et avec des tenailles propices a ce faire, comme pourriez vcoir en pourtraicture cy apres, les prendre, et leur couper toute la maschouere de dessoubz, là ou sont fichez les grans crochetz, et ne toucher point a celle de dessus, par autant qu'elle monstrera tousiours la fureur de la beste, sans pouuoir blesser ne faire mal. Après faut faire faire des terres en un pré, lesquelles doyuent estre assez larges, a fin que les Bassetz ayent espace de leur tourner et virer, et entrer deux tout de fient, puis couvrir les terres d'ais, et de gazon. Cela fait, on doyt mettre le Teson dedans, et lascher tous les Bassetz ieunes et vieux, leur donnant courage, et les enhardissant comme l'art le requiert. Et quand ilz auront assez abbayé, faut frapper sept ou huit coups de besche au costé, pour leur donner hardiesse quand on beschera. Puis faudra leuer les ais a l'endroit ou sera le Teson, et le prendre avec

*les tenailles , en le tuant deuant eux, ou bien le faire estrangler a quelque Leurier , pour leur en faire curée. Et faut auoir du fourmage en vne pochette, pour leur ietter soudainement, sur leur gibbier quand il sera mort. Et si d'auanture on ne vouloit rompre la maschouère de desoubz du Teson, il luy faut couper tous les crochetz, et toutes les maistresses dentz, de peur qu'il morde, et face mal.*

P ij

VENERIE PAR  
Du naturel & complexion des Re-  
gnardz & Blereaux.

Chap LXI.



**T**OUT ainsi qu'il y ha deux especes de Bassetz,  
il y ha semblablement deux especes de Tessons, et  
de Regnardz, sçauoir est des Tessons, de Porchins  
et de Chenins : et des Regnardz, de grans, et de petis  
Goupilz. Combien que plusieurs veulent dire que les  
Tessons sont tous d'une mesme sorte, et qu'il n'y ha



point de difference entre les Porchins et Chenins, si est-ce que ie leur prouueray le contraire, tant par la couleur et façon des bestes, que par leur naturel.

Le naturel des Porchins est tel, qu'au sortir de leurs terres ilz font volontiers leur fiante : et ne la font iamais qu'ilz ne fassent un petit pertuis avec le bout du nez, ou bien avec l'ongle, puis fiantent dedans, ce que ne font pas les Chenins, et font les Porchins plus communement leurs cauernes dedans le sable, et autres terres aisées a mouuoir, qu'ilz ne font pas ailleurs, et en lieux descouuertz, pour auoir la chaleur du Soleil, dormans incessamment : aussi y prennent ilz plus de gresse que les Chenins. Quant au pelage, les Porchins sont plus blancheastres, et ont le poil de dessus le nez, et de dessous la gorge beaucoup plus blanc que n'ont pas les Chenins, et si le corsage en est un peu plus grand, la teste et le nez plus gros : combien qu'il y ha peu d'apparence si on n'y regarde de bien pres. Le naturel des autres, qu'on appelle Chenins, est tel, et les cognoistra on en ceste maniere. C'est qu'ilz vont aux pourchatz plus loing que les autres, faisant leur fiante au loing, de telle façon que celle des Regnardz. Ilz se tiennent volontiers dedans les fortes terres, ou dedans les rochiers, faisant leurs fosses et cauernes plus profondes et estroictes que non pas les Porchins : toutes-fois qu'il n'y ha pas tant de

meres ne de carefours qu'en celles des Porchins, d'autant qu'ilz ne peuvent pas mouvoir les terres fortes et rochiers, comme les autres font le sable, et les terres mouvantes. Ces deux especes ne se tiennent point ensemble, et a peine les pourra-on trouver a une lieue pres l'une de l'autre. Les Chiens de terre craignent bien plus les Chenins que les Porchins, car ilz sont plus mauvais, et plus puant. On les pourra encores cognoistre au pelage, lequel est tel. Les Chenins ont la gorge, le nez, et les oreilles iaunastres, comme la gorge d'une Martre, et sont beaucoup plus noirs, et plus haut sur iambes que les autres. Les deux especes vivent de toutes chairs, et mesmes vont aux charcngnes. Ilz font grand dommage aux garennes, et principalement aux petis lapreaux, qui sont dedans les raboulieres: car ilz percent droit dessus la rabouliere, la où le Regnard suyt du long. Je leur ay veu prendre devant moy les petis cochons de laiët, lesquelz ilz trainoyent tous vifz en leur terrier. C'est une chose certaine qu'ilz en sont plus friandz que de toutes autres chairs, car si on passe un carnage de Porceau par dessus leurs terriers, ilz ne fandront iamais de sortir pour y aller. Ilz vivent de toutes sortes de gibbiers, comme oyes, pouletz, et leurs semblables: ie le sçay par experience, car i'en ay nourry de primez iusques en l'eage de quatre ans: ilz sont plaisans et de bonne nature, sans mordre ne faire aucun mal, ne faisant que iouer avec les petis

*Chiens, et dormir la reste du temps: et quand ie les appelloys, ilz venoyent a moy comme Chiens, me suyuant la part ou i'alloys. Ilz sont fort froidureux, et si on les laisse en quelque chambre ou il y ayt du feu, ilz s'en yront coucher dedans, et se brusleront les piedz, lesquelz sont fort difficiles a guarir. Ilz se nourrissent de pain, de petis osseletz, fourmage, fruitage, raisins, barbotz: somme ilz mangent de tout ce qu'on leur veut donner. Quand il nege, ou fait autre fort temps, ilz ne sortent point hors de leurs cauernes, aucunes-fois de deux ou troys iours, ce que i'ay veu par experience: quand la nege estoit tombée deuant leur pertuys, ie ne trouuois point qu'ilz fussent sortys, et y suis allé par deux matins ensuyuans, et au dernier les trouuay sortis ou ilz alloient pourchasser leur vie. C'est plaisir de leur veoir amasser le bourre, comme paille, fougere, fueilles, et autres choses, ilz asssemblent tout en un monceau, puis auec les quatre iambes et la teste en portent et traynent autant en un coup en leurs cauernes, qu'un homme en scauroit porter d'un bras soubz son aisselle. Ilz ont ceste malice, qu'alors qu'ilz se voyent abboyez des Bassetz, ilz ferment les pertuys de leurs cauernes apres eux, de peur que les Bassetz les suyuent. Et si on les fait abboyer deux ou trois foys dedans les terres, ilz remuent leur mesnage, et s'en vont en un autre lieu. Ilz viuent longuement, et quand ilz sont bien vieux, les uns deuenent auengles, qui ne peuuent sortir de leurs fosses: si se*

sont les masles, les femelles les nourrissent, et si se sont les femelles, les masles sont le semblable. Ilz meurent aussi de d'artres qui leur viennent par tout sur la peau, comme lon veoit venir aux Chiens : qui est la raison pourquoy on doyt laver les Bassetz, comme i'ay dit cy dessus, par-ce que la terre engendre les dartres. J'ay veu toutes ces choses cy dessus mentionnées par experience.

Les Tessons sont de dure vie, car i'ay veu plusieurs fois de bons et fortz Leuriers apres les Tessons, qui les mordoyent si asprement qu'ilz faisoient sortir leurs tripes hors du ventre, encores se deffendoyent, et ne vouloyent pas mourir. C'est une chose certaine que les Tessons craignent le nez grandement, aussi ne leur scauroit on donner si petit coup de baston dessus qu'ilz ne meurent soudainement.


Quant a la chasse des Regnardz, il y ha peu de plaisir, principalement en la terre, par-ce que depuis qu'ilz sentent les Bassetz qui les abboyent, ilz bouclent, et sortent soudainement dehors, excepté en la saison que les femelles ont leurs petis lesquelz ilz ne veulent abandonner. Ilz font volontiers leurs terriers en lieux malaysez a bescher, comme dedans des Rochiers, ou soubz quelques arbres, et n'ont qu'une mere, qui va fort loing, laquelle est fort estroicte.

Quand les Bassetz ont une fois acculé les Regnardz, ilz se deffendent quelque peu, mais ce n'est pas de telle

vigueur et hardiesse que les Tesons, et n'ont la morsure si dangereuse. Si en prend une Regnarde en la saison qu'elle est en amours, et qu'on luy coupe la nature, et le boyau qui la tient, avec ce les petis roignons, qui sont cause de l'engendrement, qui est ce que les chatreux ostent aux Chienes quand ilz les sennent, puis mettre le tout, couppé par petis loppins, en quelque petit pot, tout chaudement, et prendre du Galbanum, et le mettre dedans, en meslant tout ensemble, et couvrir le pot, de peur que le tout s'esuente, cela se pourra garder toute l'année, qui servira alors qu'on voudra faire quelque trainée pour faire venir les Regnardz, en prenant du cuyr ou coïanne de lard, la mettant sur le gril, puis quand elle sera bien grillée, et toute chaude, il la faut tremper dedans le pot ou est la nature de la Regnarde, et le Galbanum, et en faire toutes les trainées: alors vous verrez que les Regnardz vous suivront par tout. Mais il faut que celui qui fera la trainée, frotte la semelle de ses souliers de bouze de Vache, de peur qu'ilz ayent le vent de ses piedz. Voyla comme il faut faire venir les Regnardz pour les prendre au pege, et pour les tuer au soir avec l'arbaleste. C'est une chose certaine, que si on frotte un Basset de souffre, ou d'huyle de cade, et qu'on le face entrer en des terres, ou il y ayt des Regnardz ou Tesons, ilz se remueront de là, sans y retourner de deux ou trois moys.

Comme il faut bescher, & prendre les Regnardz &  
Tessons, & des instrumentz qu'il faut a-  
voir pour ce faire.

Chappitre LXII.




**T**OVS Seigneurs qui voudront exercer la chasse  
des Chiens de terre, il faut qu'ilz soyent equippez  
et garnis des choses qui s'ensuyuent. Premièrement,  
d'une demye douzaine de forts hommes, pour bescher,  
d'une demye douzaine de bons Chiens de terre, pour le  
moins,

moins, qui ayent chascun un collier au col, large de troys doigtz, et garny de sonnettes, pour l'entrée des terres, a fin que les Tesson s'acculent plus tost, et aussi que les colliers les garderont d'estre blessez. Et a l'heure qu'on verra les Tesson acculez, ou que les Bassetz soyent las, et hors d'haleine, ou bien que les sonnettes fussent pleines de terre, il faudra prendre les Bassetz, et leur oster les colliers : mais au commencement ilz servent grandement, d'autant que le Tesson s'en accule plus tost. Plus, pour revenir au propos, le Seigneur doyt avoir sa petite charrette, là ou il sera dedans, avec la fillette, aagée de seize a dix et sept ans, laquelle luy frotera la teste par les chemins. Il doyt avoir demy douzaine de mantes, pour ietter contre terre, a fin d'esconter l'abboy des Bassetz : ou bien pourra porter un liët plein de vent, lequel on pourra faire en ceste maniere. Il faut coudre des peaux ensemble en carré, et de la grandeur d'une paillace, et que les coustures en soyent aussi subtiles que celles d'une bale : puis quand tout sera bien cousu tout autour, il faudra mettre a un des coings un petit buffet, en façon de celuy d'une bale ou d'une cornemuse, qui se ferme de luy-mesmes quand le vent sera dedans, puis l'emplir avec une seringue, ou avec un bon soufflet, fait a la semblance de celuy d'un Orfebure. Toutes les chevilles et paux de la charrette doyvent estre garnis de flacons et bouteilles, et doyt avoir au bout de la charrete un cof-



fre de boys, plein de coqs d'Inde froidz, iambons, langues de Beuf, et autres bons harnois de gueule. Et si c'est en temps d'Hyuer, il pourra faire porter son petit pavillon, et faire du feu dedans pour se chauffer, ou bien donner un coup en robe a la nymphe. Les instrumentz pour bescher, doyuent estre premierement, des tarieres, de deux sortes de pietes: sçavoir est, de larges et d'estroites, un coupant fait en façon d'une piete, lequel doyt estre acéré pour couper les racines, une besche fort large, pour tirer la terre, une racle pour ouvrir les meres et gouletz, de laquelle on tire la terre hors, des tenailles pour arracher et tirer les Tessonns des pertuis, des paelles de fer et de boys, des sacz pour mettre les Tessonns vifz dedans, une paille ou autre vaisseau pour faire boire les petis Chiens. Et faut que le Seigneur marche en bataille de ceste façon, équipé de tous les ferrementz cy dessus mentionnez, a fin d'aller donner l'assaut aux gros Tessonns et Vulpins en leur fort, et rompre leurs chasmates, plocu, paraspetz, et les avoir par mine et contre-mine, iusques au centre de la terre, pour en avoir les peaux a faire des carcans pour les arbalestiers de Gascogne. I'ay pourtrait cy apres la forme et façon de chascun des ferrementz.





*Paele de fer, pour bescher.*

*Racle, pour nettoyer les meres et pertuys.*

*Coupant acéré; pour couper les racines.*

*Paele de boys, pour ietter la terre.*

*Q*

Comme on doyt lascher les Bassetz selon les  
terres qu'on veoit. Et ce qu'on doyt faire  
pour bescher & miner les  
Teffons.

Chappitre LXIII.



**I**L FAUT icy entendre, que premier que las-  
cher les Bassetz, on doyt regarder les terres quelles el-  
les sont, et le lieu ou elles sont situées, et là ou sont.

les acculz, car autrement on feroit tout au rebours de la chafse, d'autant que si les terres estoient en pante de coustaux, il est requis de mettre les Bassetz par le deffoubz, deuers la vallée, a fin d'acculer les Tesons sur le haut du coustant, là ou les terres ne sont pas si profondes, pour les bescher plus aysément. Autrement, si les terres estoient en une motte, et qu'elles fussent toutes rondes, la motte estant assise en lieu plat, il faut mettre les Bassetz aux pertuis qui sont les plus hautz, sur la sommité de la motte. Mais premier que de les lascher en telles terres, on doyt frapper vingt ou trente coups de la teste des pietes sur le haut des terres, a fin de faire desloger les Tesons du milieu d'icelles, pour les faire descendre aux acculz, qui sont au bas de la motte. On doyt tousiours lascher a l'entrée deux ou trois Bassetz, a fin qu'en leur fureur ilz puissent desbranler et departir les Tesons, qui seront ensemble, et les chasser aux acculz. Ilz ont une malice de se faire abboyer aux carreffours, et tiennent fort en telz lieux contre les Bassetz. A l'heure qu'on veoit qu'ilz sont aux abboiz en telz endroitz, il est requis frapper deux ou trois coups de piete, et s'ilz ne veulent desloger pour telle chose, il faut soudainement mettre la tariere ronde pour les descouvrir. Et alors qu'on verra qu'ilz seront a l'accul on ne doyt pas percer au droit d'eux, mais faut percer au droit de la voix du Basset, pour autant que si on perçoit droit sur eux, ilz retourneroyent

dedans les grandes terres , et forceroient le Basset , a ceste cause il faut percer , comme i'ay dit , au droit de la voix du Basset , avec la tariere ronde , car elle enleue sa terre sans qu'elle tombe dedans : puis soudainement mettre la tariere plate dedans le pertuis du rond , a fin qu'il ferme la mere tout au trauers , de peur que le Teson reculast sur le Chien. Et si il est possible d'enfermer le Chien par le derriere de la tariere , il seroit fort bon , car si c'estoit par le deuant , les Tesons le pourroyent battre et rudoyer : par-ce qu'aucunes-fois il s'en trouue en un accul six ou sept , qui pourroyent battre et rebuter le Chien. Quand la mere est fermée de la tariere plate , il faut faire soudainement la tranchée avec les pietes et paelles , a fin d'auoir espace pour ranger un homme dedans : et a l'heure laisser entrer les Bassetz en la tranchée , et les faire abboyer en ce lieu là ou on ueoit batailles et asaux de toutes façons. Il se faut donner garde que les Tesons ne se couurent de terre , ce qu'ilz font volontiers quand ilz sont acculez , tellement que les Bassetz sont aucunes-fois dessus , et ne scauent ou ilz sont allez. Puis quand on ha descouvert leur chasmate et fort , il faut auoir les tenailles pour les arracher : mais il y ha mistere a les prendre , par-ce que si on ne les prent qu'au corps , ilz mordent et blessent les Chiens quand on les tire dehors , toutes-fois on les peut prendre en ceste sorte : il faut ouurir les tenailles , et leur en

mettre la moytié en la gueule, l'autre moytié par le deffoubz de la machoïere, puis serrer les tenailles, et vous le tiendrez par les maschoïeres de deffoubz, car si vous le preniez par la maschoïere de dessus du costé du nez, il mourroit soudainement. Et alors que le tiendrez avec les tenailles, il le faut tirer et mettre dedans le sac, puis le porter en quelque court ou iardin renfermé de murailles, et le laisser aller, mettant les petits Bassetz apres: quand il sera eschauffé, il viendra assaillir les hommes comme fait un Sanglier. Et a telle chasse il est requis d'estre botté, car plusieurs-fois il m'ont emporté le lopin de la chauffe, et la chair qui estoit par deffoubz. F'eusse traicté plus amplement de ceste chasse, mais par-ce que peu d'hommes y prennent plaisir, i'en ay escript succinctement.

★ Fin de la Venerie.

Q iij



# Receptes pour guarir les CHIENS DE PLUSIEURS MALADIES.



**L**ES Chiens sont subiectz a plusieurs maladies, mais la plus grande de toutes, c'est la rage, dont il y en a sept especes. La premiere est appellée la rage chaude, et desesperée, laquelle ne se peut guarir,  
Q. iij

par-ce qu'elle est tant ennemye du sang, qu'incontinent que le venin est meslé par-my, il le brusle et infecte soudainement: et alors que la ceruelle sent les fumées de ce venin, elle se torment de telle façon que soudain elle fait desesperer et travailler le corps de ces pauvres animaux, comme on peut veoir par experience. On cognoist les Chiens qui ont ceste espee de rage en plusieurs sortes. Premièrement, quand ilz courent, ilz leuent la queue toute droite, ce qu'ilz ne font pas en toutes les autres rages. Ilz courent sus a tout ce qu'ilz trouvent deuant eux, tant aux bestes d'aumaille, qu'autres, sans regarder par ou ilz passent, soit au trauers des riuieres ou estangs: et si ont la gueule fort noire, et sans escume. De ceste espee de rage, ilz ne courent que troys ou quatre iours pour le plus, a cause du mal et travail que leur donne ceste maladie. Quand ilz ne peuvent plus aller, ilz hurlent une façon d'hurllement tout casse, et rance, non pas naturel, comme s'ilz estoient sains. Toutes les bestes qu'ilz morderont, tant Chiens qu'autres animaux, s'il en sort du sang, ilz enrageront sans aucun remede.

La seconde espee de rage, se nomme rage courante, laquelle est semblablement incurable, mais la morsure n'en est pas si veneneuse ne dangereuse enuers les autres animaux, que de l'autre, par-ce qu'elle ne tient pas incessamment. Et quand vn Chien est enragé de ceste espee de rage, le premier Chien qu'il mort



au commencement du iour, emporte tout son venin, et sera en danger d'enrager : mais tous les autres qu'il mordra apres la reste du iour, ne cuyderont pas enrager. Quand ilz ont telle rage, il ne courent a bestes, ne a hommes, qu'aux Chiens, et s'en vont escoutans pour oüyr les abboiſ des autres Chiens, a fin de les aller desbrayer et mordre. Ilz suyuent les grans chemins, et mettent la queue entre les iambes, trotans comme fait un Regnard : ilz peuuent viure neuf mois pour le plus. Ces deux especes de rage, sont les plus dangereuses de toutes les autres. Et quand les Chiens veulent enrager de ces deux especes, on le cognoist en ceste sorte. Premièrement, ilz ne mangent que bien peu. Ilz sentent les autres Chiens, et apres les auoir sentis, ilz les mordent en les cherissant, et demenant la queue. Ilz font de grans souspirs en soufflant du nez : ilz ont un regard de trauers, et triste : ilz courent les mousches et papillons. Et y ha assez d'autres signes fort apparens, que ie laisse a cause de breueté. Quand on ueoit telz signes, il les faut oster d'avec les autres, et les enfermer, car leur haleine pourroit infecter, et faire enrager les autres Chiens, par ce que telles maladies se prennent entr'eux, comme la peste entre les hommes.

Les autres cinq especes de rage ne sont pas si dangereuses de beaucoup, car les Chiens n'en courent, et n'en mordent point, dont ie les pense plus tost maladies

que rage : combien que Phebus et plusieurs autres, ont nommé toutes les sept especes, rages incurables, si est-ce que i'ay guaray des Chiens de rage de cinq especes cy dessoubz mentionnées avec les Receptes que mettray en apres par escript. Ces cinq especes de maladie ou rage, se nomment en ceste sorte.

La premiere s'appelle rage mue, laquelle tient dedans le sang, et la cognoistrez en ceste façon. Les Chiens qui l'ont ne veulent point manger, et ont tousiours la gueule ouuerte, mettans la patte dedans, comme silz estoient enossez, et se cachent volontiers en lieu frais, et humide.

La seconde rage s'appelle la rage tombante, par ce qu'alors que les Chiens l'ont, silz sont debout, et qu'ilz cuydent marcher, ilz tombent par terre, comme silz auoyent le mal de saint Iehan : ceste rage les tient en la teste.

La tiercerage s'appelle flastrée, par ce que le mal est dedans les boyaux, qui les fait retirer de telle sorte qu'ilz sont si platx qu'on les perceroit avec une aiguille.

La quarte s'appelle la rage endormie, laquelle vient d'un espece de petis vers, qui leur viennent dedans l'orifice de l'estomach, et sont engendrez d'une corruption

d'humeurs, dont les vapeurs et fumées leur montent au cerueau, qui les fait dormir incessamment, ainsi meurent en dormant.

La cinquiésme et dernière espee de rage s'appelle *reumatique*, par ce qu'alors qu'elle tient les Chiens, la teste leur enfle grosse, et ont les yeux iaunes, de la couleur d'un pied de Milan.

Quand les Chiens sont malades de ces maladies, ilz ne cuydent pas manger, et vivent huyt ou neuf iours sans faire aucun mal, puis meurent de faim. Car il faut entendre que le Chien ha ceste nature, qu'alors qu'il sent mal au dedans du corps (i'entens des maladies qui leur suruiennent sans estre blesez) ilz ne mangent iamais qu'ilz ne soyent guaris. Et par exemple le pouuez veoir, quand quelque Chien est malade, et qu'on luy donne de la gresse, il ne la mange que premier il ne soit allé paistre de l'herbe, et qu'il n'ayt rendu sa gorge, et soit guarý.

Il y ha plusieurs hommes qui ont voulu dire que le ver qui vient soubz la langue du Chien, est la cause de le faire enrager, ce que ie leur nie: combien qu'on dye que le Chien ne court pas si tost en ceste maladie, quand il ha le ver osté de la langue. Ie m'en rapporte a ce qui en est.

Ces maladies prennent entre les Chiens pour s'halener et frequenter les uns avec les autres. Et est besoing, si quelque Chien ha ces maladies en un chenin, d'oster

tous les autres , et les remuer en un autre lieu : car, comme i'ay dit cy dessus , telles maladies se prennent entre les Chiens comme la peste entre les hommes.

Les receptes pour guarir des cinq especes de rage.

Et premierement de la rage mue.

**Q**UAND un Chien aura la rage mue , pour le guarir il faut prendre le poix de quatre escuz du iust de la racine d'une herbe nommée *Spatula putrida*, dicte *Passerage*, laquelle ha la fueille comme *Fris*, toutesfois qu'elle est un peu plus noire : et mettre ce iust en un petit pot plombé , puis prendre le poix de quatre escuz du iust des fueilles d'une herbe nommée l'herbe du Cru, autrement *Helebore noir*, puis le poix de quatre escuz du iust de l'herbe de la Rue. Si les herbes ne rendoyent iust , faut prendre la decoction d'icelles. Et quand tous les iustz seront ensemble , il faut mettre autant de vin blanc comme de iust de Rue. Puis faudra passer tous les iustz des herbes , et le vin blanc, en un beau linge net , et mettre tout en un verre. Ce fait , faut prendre deux dragmes de *Scamonée* , sans estre preparée , et la mesler par-my tous les iustz : puis prendre le Chien avec une seruiette , et luy ouvrir la gueule , en luy mettant dedans une oüillette, ou entonnoir , ou une corne de Beuf percée , et luy faire aualler le tout , en luy tenant un peu la teste leuée, de peur qu'il rende,

rende sa gorge. Apres luy auoir baillé ceste medecine, on le doit saigner avec vn cousteau, comme lon saigne les Cheuaux, en la gueule: sçauoir est, aux denteleures, qui sont en la maschouïere de dessus au palais, qui est par le dedans de la gueule, et luy coupper deux ou trois denteleures, a fin qu'il saigne plus fort. Puis mettrez reposer le Chien sur la paille, et il guarira. Vous noterez, que l'herbe, que le vulgaire appelle corne de Cerf, ou dent de Chien, est souueraine pour toute rage, si on fait boire au Chien huit dragmes du iust d'icelle herbe, avec vn peu de sel.

Recepte pour la rage tombante, qui  
procede du cerueau.

**I**L faut prendre le poix de quatre escuz du iust de la fueille ou graine d'une herbe qu'on nomme Peonia, en François Peaune, i'entens de celle qui porte graine. Puis prendre le poix de quatre escuz du iust de la racine d'une herbe nommée Bryonia, en François du Parc, laquelle herbe vient dedans les hayes, et ha la racine grosse comme la iambe d'un homme. Puis prendre le poix de quatre escuz du iust d'une herbe qu'on nomme Croisette, en Latin Cruciata, puis prendre quatre dragmes Destafiacre bien broyé, et en poudre, et le mesler avec tous les iustz des dessusdites herbes, et faire boire le iust au Chien, comme dessus. Cila fait, il luy

*faut fendre les oreilles pour le faire saigner, ou bien le saigner de deux veines qui viennent par le dedans des espaules des iambes de devant, qu'on appelle pour les Chevaux, les arcs. Et si d'avanture on voyoit que la medecine fist peu d'operation pour la premiere fois, il la faut reiterer.*

Recepte pour la rage endormie, laquelle  
procède de vers.

**P**R E N E Z le poix de six escuz du iust d'Absinthe, et le poix de deux escuz d'Aloe en poudre, le poix de deux escuz de poudre de corne de Cerf brulée, avec deux dragmes d'une drogue nommée Agaric, puis mesler les iusts, et les poudres ensemble. Et si vous voyez qu'il y ayt faute de iust, et que les poudres fussent trop espoisses, pour faire aualler au Chien, il y faut mettre du vin blanc jusques au poix de quatre ou six escuz, puis faire aualler le tout au Chien, comme dessus.

Recepte pour la rage reumatique, laquelle  
vient en iaunisse.

**I**L faut prendre le poix de six escuz du iust ou decoction de la racine de Fenoil, le poix de quatre escuz du iust ou decoction de Guy, qui croist

deàans les Aubepins, le poix de quatre escuꝝ du iust ou decoction de Lierre, le poix de quatre escuꝝ de poudre ou marc de la racine de Polipode, qui croist dedans les chesnes, et mettre le tout en un petit poilon, et le faire boüillir avec du vin blanc, puis quand il sera refroidy un peu, il le faut soudain faire aualler au Chien, comme dessus.

Recepte pour la rage flastrée.

**Q**VANT a la rage flastrée, qui tient dans les boyaux, et plusieurs autres maladies, comme gouttes, estrusfleures, refroidissemens, et toutes autres maladies engendrées de froides causes, elles se guarissent par baings et estumes, dont la recepte s'ensuyt.

Recepte des baings pour guarir les Chiens  
des maladies venues de froides  
des causes.

**I**L faut prendre deux grandes poisses, tenantes chascune six seaux, esquelles vous mettrez en chascune d'icelles dix iointées de chascune espece des herbes qui s'ensuyuent. Sçavoir est, dix iointées d'une herbe nommée Armoise, dix iointées de Romarin, dix iointées de Sauge menue, dix iointées de

racines ou fueilles de Guymauues blanches, dix iointées de racines ou fueilles d'Hyebles, dix iointées de fueilles ou racines de Fenoil, dix iointées de Marachemin blanc, ou de Melisse, dix iointées de Rue, dix iointées d'Enulacampana, sçauoir est fueille et racine, dix iointées de Lapaces, dix iointées de Buglosse, et de Melilot: et mettre le tout dedans les susdictes poiles, lesquelles faut emplir de deux partz d'eau, et le tiers de vin, et faire le tout bouillir ensemble, iusques a ce qu'il soit consommé du tiers, puis quand les herbes seront bien cuytes, il faut prendre les poiles, et ietter toutes les herbes et leur decoction en une pippe, en laquelle faut mettre quatre seaux de bonne et forte lie de vin: puis prendre lesdites poiles, et les remettre sur le feu comme elles estoyent au par-auant, les emplissans le tiers vin et eau, comme dessus: apres faut auoir un sac neuf, et aller chercher des fourmieres et gros fourmis rouges, lesquelz faut prendre avec les œufz, et toutes leurs coques, puis les mettre bouillir et consommer dedans lesdites poiles, avec trois ou quatre picotins de sel: et quand le tout sera bien consommé iusques a la tierce partie, et que l'eau sera bien grasse, il faut verser le tout dedans la pippe où ha esté versée la premiere decoction, et laisser reposer toutes les choses susdictes ensemble, iusques a ce que le tout soit un peu plus chaut que tiede: et a l'heure mettez les Chiens malades dedans, les faisans baigner l'espace d'une  
bonne



bonne heure, sans sortir. Mais il se faut donner garde d'eux, en les tenant, de peur qu'ilz se noyent, ou euanoüissent dedans la pippe. Puis apres les faudra mettre en quelque lieu bien chaudement, là ou ilz ne prennent point de vent, de peur qu'ilz se morfondent et refroidissent, et les faut baigner par quatre ou cinq iours ensuyuans, en faisant rechauffer l'eau, car ceste premiere decoction pourra seruir pour tous les baings. Et auant que de mettre les Chiens malades, la premiere fois, dedans le baing, il les faut purger en ceste sorte.

Recepte pour purger les Chiens auant que les  
mettre dedans le baing.

**P**REN EZ vne once et demye de Casse, bien mundée, deux dragmes et demye d'Estasiacre en poudre, et deux dragmes et demye de Scamonée preparée dedans du vin-aigre blanc, avec quatre onces d'huyle d'olines: et destrempez le tout ensemble, en le faisant vn peu chauffer sur le feu, puis le faictes aualler au Chien vers le soir, sans luy donner a manger, et le lendemain le mettrez dedans le baing a ieun.

R

Baing pour lauer les Chiens, quand ilz ont esté  
mords de Chiens enragez, de peur  
qu'ilz enragent.

**Q**UAND les Chiens sont mordz ou desbrayez  
de Chiens enragez, il faut incontinent remplir  
une pippe d'eau, puis prendre quatre boisseaux de sel,  
et les ietter dedans, en meslant fort le sel avec un ba-  
ston, pour le faire fondre soudainement : et quand il sera  
fondu, faut mettre le Chien dedans, et le plonger tout,  
sans qu'il paroisse rien, par neuf fois : puis quand il se-  
ra bien lauë, faut le laisser aller, cela l'empeschera d'en-  
rager.

Autre recepte par motz preseruantz de la rage.

**J'**AY appris une recepte d'un gentil-homme en Bre-  
tagne, lequel faisoit de petis escripteaux, ou n'y auoit  
seulement que deux lignes, lesquelles il mettoit en une  
omelette d'œufz, puis les faisoit aualler aux Chiens, qui  
auoyent esté mordz de Chiens enragez, et y auoit de-  
dans l'escripteau, Y RAM QVI RAM CA-  
FRAM CAFRATREM CAFRATROS-  
QVE. Lesquelz motz disoit estre singuliers pour em-  
pescher les Chiens de la rage, mais quant a moy ie n'y  
adiouste pas foy.

Des maladies de la galle, des dartres, gratelles,  
& rongnes des Chiens.

**I**L y ha quatre especes de galles, sçauoir est la galle rouge et menüe, qui enfle les iambes des Chiens. La galle dartrée, laquelle vient large comme la paume de la main, qui enleue le cuyr des Chiens. La galle commune, appelée rongne. La galle noire, qui est soubz le cuyr, laquelle fait tomber tout le poil. Desquelles galles, la rouge est la pire, et plus mal aisée a guarir, par ce qu'elle est engendrée de morfondeures, que les Chiens prennent l'hyuer en passant les eaux, et a coucher en lieux humides, sans estre chauffez, ne sechez: ou bien leur vient pour estre nourris aux boucheries a manger le sang des Beufz et Vaches, qui leur eschauffe le corps. Telles especes de galles se doyuent guarir en ceste sorte. Il faut premierement purger le Chien de la medecine que i'ay mise cy dessus pour le baing: puis le lendemain luy tirer enuiron deux onces de sang, d'une veine qui est entre la corde du iarret et l'os de la iambe, puis a deux iours de la, on le doyt frotter d'un onguent fait selon la recepte qui s'ensuyt

Recepte pour faire guarir les Chiens de la galle,  
des dartres, gratelles, & rongnes.

**I**L faut prendre trois liures d'huyle de noix, une liure et demye d'huyle de cade, deux liures de

vieux oingt, trois liures de miel commun, de vin-aigre une liure et demye: le tout bien boüilly ensemble, iusques a la consommation de la moytié dudit vin-aigre. Puis y adiousterez de la poix ou geme, et poix-resine, de chascune espece deux liures et demye, de cyre neufue demye liure. Et ferez fondre le tout ensemble, en le mouuant tousiours avec un baston de palme ou de canne. Et quand le tout sera fondu, il y faut mettre les poudres qui s'ensuyuent, étant le tout hors du feu: et premier, une liure et demye de souffre, deux liures de coperoze recuyte, douze onces de verdet, en mouuant tousiours le tout iusques a ce qu'il soit froid. Cest onguent peut guarir toutes especes de galles, tant fortes soyent elles, et faut premier que de frotter les Chiens de cest onguent, les laver avec de l'eau et du sel, pour leur mondifier le cuyr: puis mener les Chiens aupres d'un grand feu, et les frotter, et enfondre bien cest onguent: cela fait, les attacher aupres du feu, avec une chaine de fer, et les laisser suer là l'espace d'une bonne heure et demye, en leur donnant de l'eau a boire tout leur saoul. En apres les faut nourrir de bons potages, et de chair de mouton, boüillie avec quelque peu de soufre, pour leur rechauffer le corps, et avec de bonnes herbes, en leur continuant l'espace de huit iours.

## Autre Recepte pour les dartres.

**L**A galle dartreuse prouient a aucuns Chiens, de nature ou de race, ou bien de vieillesse: laquelle galle se peut guarir en ceste sorte: Il faut premierement prendre le Chien, et oster le poil des endroitz où sont les dartres, puis faut auoir du lexis, du vin-aigre, et du sel, et le frotter fort, iusques a ce que les dartres saignent, puis quand elles saigneront, faut prendre d'un onguent, dont la recepte s'ensuyt. Prenez une liure d'un onguent, appellé Unguentum enulatum, demye liure d'un autre onguent, appellé Pomphiligos, deux liures d'huyle de noix, poix ou gomme une liure, une liure d'huyle de cade, demye liure de suye, demie liure de soufre, demye liure de vitriol vert, litarge d'or quatre onces, ceruise quatre onces, verdet quatre onces, alun de glaz six onces: le tout bien en poudre, boüilly et incorporé ensemble, avec demye liure de vin-aigre. Et sera un onguent propice pour la maladie susdicte, en frottant les Chiens, comme dessus.

## Recepte pour la rongne commune.

**L**A rongne commune prouient aucunes-fois par faute que les Chiens n'ont point d'eau nette pour boire a leur heure, et en souffrent, ou bien prent pour coucher salement, comme es lieux où

sont les Porceaux, ou sur de la paille sale où auroyent couché d'autres Chiens galleux, ou bien vient ceste galle de morfondure. Telles galles sont aisées à guarir, sans les frotter de drogues, mais seulement du iust ou decoction d'herbes, dont la recepte s'ensuyt.

Prenez deux iointées de Cresson sauvage, autrement appelé Erne, et deux iointées d'Enulacampagna, vulgairement appelée Leaune, des feuilles ou racines de Lapace, de la racine de Roerbe, de chascune deux iointées, et des racines de Frodilles, pesant la quantité de deux liures: puis piler toutes ces herbes et racines, et les faire bien boiillir avec du vin-aigre, et un peu de lexis. Apres que tout aura bien boiilly, faut passer la decoction ou bien le iust d'icelles herbes et racines, et adionster par-my lesditz iust ou decoction, deux liures de Saumon commun, et le faire fondre dedans: puis quand il sera fondu, lon en frottera et lavera les Chiens par quatre ou cinq matins ensuyuans, et ilz guariront. Les receptes sont veritables, car ie les ay esprounées.

Recepte pour guarir les Chiens des loupes.

**I**L survient aucunes-fois aux Chiens des loupes, et pour bien les guarir, il faut regarder les lieux où elles sont, d'autant que si elles estoient en endroitz sur le corps du Chien où il y eust abundance de venes

ou arteres, elles seroyent fort difficiles a oster en telz endroitz. Celuy qui les osteras se doyt gouverner en ceste maniere.

Il faut premierement entendre qu'il y ha deux manieres de les guarir, l'une par incision, et l'autre par recepte, comme ie declaireray cy apres. Celuy qui voudra user d'incision, doyt regarder combien il y ha de venes qui entrent dedans ou dessus la louppe, puis faut qu'il ayt une aiguille, laquelle doit auoir la pointe carrée, et un peu courbée, et l'enfilera de bon filet, en passant son aiguille par dessoubz la vene, et la tirera: quand le filet sera par le dessoubz, il le nouera par dessus la vene, en l'estraignant le plus qu'il pourra, puis coupera le filet, et laissera la vene bien liée, et en fera autant a toutes les autres venes qui seront dedans la louppe, de peur qu'elles rendent du sang quand il fera son incision. Et alors qu'il verra toutes les venes bien liées, il prendra son razouër, et cernera la louppe tout au tour, laissant la liure de venes par le dehors de son inciseure: car il faudra que les venes soyent liées au commencement des racines de la louppe, puis couppera et enleuera sa louppe, et tout incontinent prendra un fer chaud pour cauterizer les petites fibres et arteres. Puis il fera son premier appareil de sang de Dragon, de moyeux d'œufz, de la poudre de linge bruslé, broyé avec du vin-aigre: et faut emmuseler le Chien de peur qu'il arrache le filet, qui tient les

R iij

*venes attachées. Et faut panser le Chien tous les iours, avec du lard fondu en l'eau, meslé avec du Pomphili-gos, battu en un mortier de plomb: mais il se faut bien prendre garde que les venes ne saignent.*

Autre recepte a ce mesme approuuée.

**I**L FAVT prendre trois grosses espines noires, alors qu'elles seront toutes vertes, et fraichement cueillies, faictes les tremper vingt et quatre heures dedans le sang des fleurs des femmes, puis les gressez toutes trois de ce venin: et les piquez dedans le milieu de la louppe, tant qu'elles y pourront entrer: et si d'avanture elles n'y pouvoient entrer, il faut faire ouverture avec un poinçon, ou une grosse espingle, et ficher les espines dedans, sans les bouger qu'elles ne tombent d'elles-mesmes, ce fait les loupes mourront peu de temps apres.

Recepte pour faire mourir les puces, poulz,  
& vermines des Chiens, &  
les nettoyer.

**I**L faut prendre deux iointées de fueilles de Ber-ne, et deux iointées de fueilles de Lapace, et deux iointées de Mente, lesquelles herbes ferez boüillir en lexif de sarment, et adiousterez par my deux onces



*Destafiacre en poudre: puis quand le tout aura boüilly, faut passer les herbes subtilement, et prendre la decoction, en laquelle adiousterẽz deux onces de Sauon, avec une once de Safran, et une ioinctée de Sel, et meslerez le tout ensemble, et en lauerez le Chien.*

*Recepte pour faire mourir, & tomber les vers.*

**I**L faut prendre des escorces ou eschalles de noix, autrement appellées Tam, et les pilez bien fort, estans bien macerées et trempées, les mettez en un pot, avec une chopine de vin-aigre par dessus, et les laisserez tremper enuiron deux heures. Ce fait, ferez boüillir au feu, deux ou troys ondes, voẽz drogues susdictes: puis les passerez en un beau linge blanc, et en mettez la decoction en un pot, en y adioustant les poudres qui s'ensuyuent: sçauoir est, une once d'aloé eupatic, une once de corne de Cerf bruslée, une once de poix-resine, en brassant toutes les poudres par-my la decoction. En apres prendre le Chien, et avec la pointe d'un cousteau faire tomber quatre ou cinq vers, et mettre le iust dedans, et ilz tomberont et mourront soudainement.

*Autre recepte a ce mesmes.*

**I**L faut prendre du fiel de Beuf, de la poix-resine en poudre, aloé en poudre, chaux-vine en poudre, souffre-vif en poudre, et destrempez le tout dedans le fiel, en fai-

*sant comme dessus, et les vers tomberont et mourront.*

*J'eusse bien mis par escript les receptes des Anciens, lequelz mettoient le poil des Chiens nom-per dedans un Fresne, ou Cormier, mais telles choses abusent les hommes :*

Recepte pour les Chiens mordz de Serpens,  
& Viperes.

**P**RENEZ une poignée d'herbe nommée la Croisette, ou Cruciata, une poignée de Rue, une poignée de la fueille d'un arbrisseau nommé Cassis, autrement poyure d'Hespaigne, une poignée de l'herbe de Boillon blanc, autrement appelée Blonde, une poignée de Genetz, une poignée de Miente : et pilez fort toutes les herbes susdictes, puis quand elles seront bien pilées et conquaßées, il faut prendre un verre de vin blanc, et faire le tout boüillir, un onde seulement, en un petit pot plombé, et en prendre le iust ou decoction, avecq' le poix d'un escu de Theriacle meslé par-my : puis prendre le Chien, et luy en faire aualler un plein verre, et luy en lauer la morsure, mettant une fueille de boüillon blanc par dessus, liée d'une branche de genetz, et il guarira.

Recepte pour faire guarir les Chiens de la morsure  
des Sangliers, & bestes mordantes.

**L**ES Chiens sont souvent blesez des Sangliers en plusieurs parties de leurs corps, et selon les lieux et

endroitꝫ ou ilz seront bleſſez, il ſe faut gouverner pour les panſer : car ſi c'eſt au ventre, et que les trippes leur tombent, ſans eſtre offenſées ne rompues, le valet de Chiens doyt ſoudainement prendre le Chien, et luy remettre les trippes bien doucement dedans le ventre, avec le bout des doigtꝫ, en la maniere que fait un châtreux quand il ſene les Chienes, puis couper une petite laiſche ou plataine de lard, et la mettre au dedans du ventre, au droit du pertuys, et faut qu'il ayt un carrellet tout preſt, et coudre la peau par deſſus : mais faut entendre qu'a tous les pointz qu'il fera, il doyt noier ſon filet, car autrement ſ'il n'eſtoit noié, et que le filet pourriſt en un des pointꝫ, tous les autres ſe laiſſeroient aller, et par ainſi il eſt requis de noier et couper le filet a chaſcun point. Autant en pourra il faire par toutes les bleſſures, qui ſeront aux autres lieux, y mettant toujours un lardon, et coudre comme deſſus, entretenant toujours la playe graſſe de lard, ou de greſſe ſeulement : parce que le Chien ſe guarira plus toſt de ſa langue, ſ'il ſe peut licher, que de tous les onguentz dequoy on le ſçauroit frotter. L'aiguille doyt eſtre carrée vers la pointe, et ronde depuis le milieu inſques au chas ou pertuys: telles ſortes d'aiguilles ſe nomment carrelletz, deſquelles les Barbiers uſent. Les valetz de Chiens ne doyuent point aller a la chaſſe du Sanglier qu'ilz ne ſoyent garnis de telles aiguilles, avec du lard pour mettre dedans les playes.

Recepte pour les Chiens qui ont esté rompuz & foulez des Sangliers, sans estre bleffez.

**I**L aduient aucunes fois que les Sangliers foulent les Chiens du bout de la hure, sans les bleffer, comme aux endroitz des costes, aux hanches et lieux nerueux. Si de fortune ilz auoyent, quelque chose demoly ou rompu, on les doyt faire habiller: mais s'ilz n'estoyent, que foulez, on doyt faire vne emplastre avec les drogues qui s'ensuyuent.

Prenez de la racine d'une herbe appellée Symphiton, vulgairement Consolide, emplastre de Melilot, poix ou geme, et huyle rosat, autant pesant des vns que des autres, lesquelles dictes drogues vous meslerez toutes ensemble, et ferez vne grande emplastre sur de la toile, puis vous coupperez le poil au droit du lieu ou sera la douleur du Chien, et y appliquerez voestre emplastre, la plus chaulde qu'il la pourra endurer, et il guarira.

Recepte pour les Chiens qui ont des vers dedans le corps, lesquels ne peuuent vuyder.

**I**L aduient aucunes-fois que les Chiens ont de grans vers, qui leur sortent du fondement, lequelz ilz ne peuuent vuyder. A telles maladies faut faire la recepte qui s'ensuyt. Prenez du inst d'Absince, le poix de deux dragmes, deux dragmes d'Aloé eupatic, deux dragmes  
Destasiacre

*Destafiacre, et une dragme de corne de Cerf bruslée, une dragme de soufre, le tout pilé et incorporé ensemble, avec de l'huyle de noix, iusques a la valeur de demy verre, et faictes aualler toutes les choses susdittes au Chien, et il guarira soudainement.*

Restraintif pour les Chiens aggrauéz.

**Q**UAND les Chiens sont aggrauéz et deffolez, on leur doyt faire les restrainctifz en ceste maniere.

Prenez une douzaine de iaunes d'œufz, lesquelz vous batterez avec quatre onces du iust ou decoction d'une herbe qui vient sur les rochers, appelée Pilo-zelle, vulgairement Oreille de Chat, ou bien avec du iust ou decoction de pommes de Grenades, bouillies avec du vin-aigre, et en deffaut desdictes choses pourrez prendre le vinaigre tout simple: puis quand les œufz seront bien battus, vous y adiousterez de la suye bien subtilement broyée en poudre, et meslerez le tout ensemble, et en froterez les piedz des Chiens, les enueloppans avec du linge. Ce fait, laisserez reposer les Chiens tout le long du iour et de la nuit, et ilz guariront.

Recepte pour faire mourir les chancres, qui viennent aux oreilles des Chiens.

**P**R E N E Z du Sauon le poix d'un escu, d'huyle de Tartre, le poix d'un escu, de Sel armoniac, le poix d'un escu, du Soufre et Verdet, le tout soyt incorporé en-

*semble avec du vin-aigre blanc, et de l'eau forte, et en frottez par neuf matins le chancre.*

Recepte pour garder les Chiennes d'entrer en chaleur.

**D**ONNEZ a manger a une Chienne, avant qu'elle ayt porté des Cheaux, par l'espace de neuf matins, par chascun matin, neuf grains de poiure, et elle n'entrera iamais en chaleur. Et les luy ferez a-ualler avec du fourmage, ou autre chose.

Recepte pour faire pisser les Chiens.

**I**L aduient aucunes-fois que les Chiens ne peuuent pisser, ou par effortz qu'ilz ont faitz, ou par chaleur de reins. A telles maladies faut faire la recepte qui s'ensuyt.

Prenez une poignée de fueilles de Guymauues, autant de fueilles ou grenes d'une herbe nommée Archanguange, laquelle se trouue communement par les vignes, racines de Fenoil, racines de Ronces, autant pesant des vnes comme des autres, et ferez le tout bouillir ensemble avec du vin blanc, iusques a la consommation de la tierce partie, puis le ferez boire et aualler au Chien, et il pissera, et sera guarý.

Recepte pour les Chiens qui ont mal  
dedans les oreilles.

**P R E N E Z** du verius, et le mettez en une escuelle, puis le faictes un peu chauffer, et adiousterez dedans de l'eau de la fueille et fleur d'un arbrisseau, vulgairement appellé Troesne, ou de l'eau de la fleur de Cheure-fueil, qui croist par-my les hayes, avec du miel, aussi gros comme le bout du doigt, lequel meslerez par-my les eaux. Et mettrez toutes lesdictes choses dedans l'oreille du Chien, en le mouuant tousiours, puis luy ferez pendre l'oreille pour faire tomber ce qu'aurez mis dedans. Cela fait, vous prendrez de l'huyle Lorin, laquelle ferez chauffer, et la mettrez dedans l'oreille, en l'estouppant avec du cotton trempé en icelle huyle: luy faisant toutes lesdictes choses par cinq ou six matins, et il guarira: mais il faut prendre garde qu'il ne se gratte.

Recepte approuuée pour faire mourir tous  
chancres, dartres, & ficz.

**I L** faut prendre une dragme de Sublimé en poudre, et la mettre en un mortier de plomb, avec le iust et dedans d'un Citron, sans l'escorce: et quand le tout sera bien broyé, il y faut mettre dedans un peu de vin-aigre, et d'eau, puis prendre d'Alun le poix d'un escu, et autant de Saon: lesquelz broyrez et meslerez avecq' les autres choses dessus-dictes. Et faictes boiillir le tout

en un petit pot, iusques a la consommation du tiers, puis appliquerez vostredite decoction sur les dartres et chancres, qui seront sur la peau, et aux oreilles. Mais aux chancres qui sont sur la chair viue, comme au dedans de la peau du vit, il faut faire bouillir le Sublimé, et en ietter la premiere eau, a fin qu'elle ne soyt si corrosiue, en faisant comme dessus.

### Receptes pour les playes des Chiens.

**L**E iust de la fucille de Chou rouge est le souuerain baume pour les playes des Chiens, car si un Chien est blecé, en appliquant le iust du Chou rouge sur la playe, il la consolidera soudainement: la raison est, que la chair du Chien est chaude et sèche, et le chou de sa nature, est chaud et humide.

J'eusse mis plusieurs autres receptes, mais craignant qu'on les trouuast ennuyeuses, i'ay seulement escript et mis les principales, et plus necessaires.

★ Fin des Receptes.



## L'Adolescence de Iaques

DV FOVILLOVX, ESCVTER,

*Seigneur dudit lieu, en Gastines,**c cinquante dudit lieu en gastines  
pays de Poitou.**Pendant que Le noble François***P**ENDANT le temps que le noble François  
Faisoit ployer la France soubz ses loix,*Tendre orfenin, sortant de la tétine,**Transporté fuz dehors de ma Gastine**Dans un pays de boys et de rochers,**Lieu bien hanté de Cerfs et de Sangliers:**En servitude en ce lieu fu long-temps,**Et a Lynieres, ou ne perdy mon temps:**Ains euitant sans cesse la paresse**A ce plaisir exerçay ma ieunesse,**Qui est commun aux Princes et Seigneurs,**Comme auoyent fait tous mes predecesseurs:**Car volontiers nostre Genealogie**Les Filles ayme, Armes, et Venerie.**Or fus-ie esclave enuiron de quinze ans**N'ayant encore emotion et sens.*

Quand i'en vingt ans, il me print une envie  
 M'émanciper, vivre a ma fantaisie.  
 Comme un Sangler a trois ans se depart,  
 L'homme a vingt ans se met aussi a part.

De bon matin m'en allay de ce lieu,  
 N'oubliant rien, sinon a dire Adieu :  
 Prends mon Limier, m'envois a l'adventure,  
 Et ma bouteille attache a ma ceinture.  
 Tant cheminay per forestz et bocages  
 Que rencontray du Cerf dans les gagnages,  
 A la Bourdaine alors il viandoit,  
 La iette aussi dans la taille eruçoit :  
 Puis il s'en va tout le long d'un chemin  
 Faisant sa ruze a l'egail du matin.

Après, sy tant de mon Chien Tire-fort  
 Que le randi d'assurance en son fort :  
 Ou le brisay pour prendre les devantz,  
 A son reffay de mon Chien heu les ventz.

Je le trouuay d'une enceinte sorti,  
 Et d'une Bische il s'estoit departi :  
 Le frappe a route, et me metz sur les voys,  
 Du Chien, de moy, eussiez ouy la voix,  
 Sus, voyleci, allez, vay auant :  
 Par la fumée il s'en va de bon temps :

Voyleci par les portées,  
 Voyleci per les foulées.  
 Voyleci aller le Cerf,  
 Voyleci aller le Cerf,  
 A route a luy valet  
 Sus apres luy valet.

Par les Forestz maint escot ressonnoyt  
 Par la faueur d'Echo qui respondoyt.

Or venoit-il ce gentil vent de Mer,  
 Qui me rendoyt le corps et pied leger,  
 Et si sentoyz la fleur de l'Aubespine  
 Que ce doux vent apportoit de Gastine.  
 Apres mon Cerf me mis par les campagnes,  
 Ou le brisé au pied de deux montaignes.

Dessus un tronc, regardant ma bouteille,  
 Prenant repos, une heure ie sommeille.  
 On oyot là le vent cytharizer  
 Qui me dorroit un aguillon d'aymer:  
 Comme des voix doucettes et menues,  
 Et me sembloit qu'elles venoyent des nues.

Je m'esueillay, et rebrenant mes voys  
 Je rencontray le Cerf sortant des boys:  
 Tant le suivy par rochiers et espines,  
 Que le randy aux forestz de Gastines:  
 Et le voyant d'entrée viander,

*Par là iugeay qu'il denoit demourer,  
Ou le brisay aux genestz de verdure,  
Enle laissant reposer a nature.*

*Quand ie senti du genest les douceurs  
Soudain m'endors dedans ces douces fleurs:  
En sommeillant oüy sus vn rocher  
Un chant divin, qui me vint allecher:  
De m'approcher ie ne craigny mes peines,  
A fin d'ouyr ces gentiles Serenes,  
Qui de chansons doucement entonnées  
Resioüyssioient montaignes et valées.*

*Quand i' auisay ce gay troupeau assis  
Sus vn rocher, veoir paistre ses brebis,  
Chascune ayant dessus son beau tetin  
Gentilement la quenouille de lin:  
Il me sembla apres ce mien reueil,  
Voyant leur face, auiser le Soleil.  
I'en choisys vne ou mon cueur eut desir  
Soudainement de prendre son plaisir.*

*Or faisoit il une pluye doucette,  
Qui luy rendoit la couleur vermeillette.  
La ell'estoyt en vn lieu a souhayt,  
Plein tout autour de fleurs de Serpoulet:  
Chantant, ainsi a qui chanteroit mieux*

*Vn chant*

*M'approchant pres pour mieux les regarder  
Soudain fuz prins de l'aiguillon d'aymer,  
Voyant la gaye et mignonne Bergere  
Ayant le teint, et la couleur si clere:  
Car point n'auoit de fart ne de ciuette,  
Mais tout ainsi que Nature la faicte.*

*Point de touretz n'auoyt a son sommeil  
Fors seulement la clairté du Soleil:  
Elle n'estoyt point cherement enfermée,  
Ains aux fureurs des ventz abandonnée.  
Point ell' n'auoyt ambre, musc, ne odeurs,  
Sa douce haleine seruoit de senteurs.  
Point ne portoit fleur, benioüyn, gnacelle,  
Onques parfums ell' ne porta sur elle:  
Mais elle alloit quand le temps estoyt gay  
Entre les fleurs et rousées de May.  
Point ne portoit gans de Chamoyz mitaines,  
Ains en tout temps ha descouuert ses veines.  
Ne portoit point de calçons ne patins,  
L'esgail lauoit ses piedz tous les matins.  
Point ne trompoit le monde en ses cheueux,  
Mais les siens vraz luy tomboyent sur les yeux.  
Pour se coeffer ne luy faut point d'empoys,  
De miroüier, ne de teste de boys:  
N'auoyt carquans, velours, ne chapperons,  
Qu'un couurechef tout plié a grillons:*

*N*i bucz encor' de soye violette,  
*Q*u'un godillon de simple laine verte.  
Elle n'auoyt au lieu de faux manchons  
*Q*u'un linge blanc, sur ses petis bras blondz,  
*N*i iazerans, anneaux, ne braceletz,  
Sur son gent corps et ses tetins refaitz.  
D'eau de mourron, de fibue ne saline  
Ne se fardoit, fors que de claire eau viue:  
Eau de gougourde a elle point ne touche,  
Pour adoucir son visage et sa bouche.  
Point ne portoyt de ce liege femelle  
Pour amoindrir son seing et sa mammelle.  
Uasquine nulle, ou aucun peligon  
Elle ne portoit, ce n'estoyt sa facon.  
Point ne prenoit vin blanc pour se baigner,  
*N*e drogue encor' pour son corps aliger:  
Mais s'en alloyt esbatre sur l'herbette  
Dedans les prez au long de la Viette.  
*N*ourrie estoit non delicatement,  
Les elementz estoient son aliment,  
Car le Soleil qui rend par tout splendeur  
La contentoyt, et nourrissoit son cueur,  
En luy rendant le deuoir de nature,  
Contente estoit de telle nourriture,  
Et sa beauté en rien n'amoindriffoit,  
Mais au contraire en beauté reluysoit,  
*Q*ui me rendoyt un amoureux desir

*D'un iour me veoir pres d'elle a mon plaisir.  
 Quand ie l'eu veüe a mon gré longuement,  
 Mon cueur d'un feu fut espris vivement,  
 Apperceuant la beauté du visage,  
 Et son parler qui sentoyt son ramage.*

*Or i'estois là caché pres d'un rocher,  
 Et ne m'osoys de plus pres approcher,  
 Car mon esprit estoyt en grand' pensée  
 Si droit a ell' m'en irois d'arrivée.  
 Mon cueur me dit, ne te haste d'aller,  
 Elle pourra de ce roch deu aller :  
 Lors approcher te pourras a l'embrée,  
 Et a ton gré veoir toute l'assemblée :  
 Ce que i'ay fait, ayant la patience  
 En attendant l'heure de iouïssance.*

*Bien tost apres comme estois en propos  
 Veoir la Bergere, tout vint bien a propos :  
 Au Ciel oüy grand' tempeste et tonnerre,  
 Soudain ie vy la Nymphé sur la pierre,  
 Chantant un chant si haut et amoureux  
 Qu'esclercir fist le Soleil et les Cieux.  
 Mon cueur alors commença l'ouuerture,  
 Le sang esmeu domina sur nature.*

*Me hazardé pour aller droit a elle,  
 Mais elle eut peur la gentille pucelle,*

Et de droit s'en va ou estoient ses compaignes :  
 Puis ie descens tout au pied des montaignes,  
 En grand' tristesse environ de troys iours  
 Je fu ainsi sans d'elle avoir secours.

Au bout du temps oüy une musette  
 Dedans un pré sur la menüe herbette :  
 Vers le rocher ie tourne le visage  
 Si ie verrois les brebis au gagnage.

Lors i'aduisé la gentille fillette, *J'aiu La fillette*  
 Qui escoutoit le son de la musette : *Brouette Prou*  
 Vous eussiez veu chascune s'approcher *Herbette*  
 De ce sonneur : il commence a marcher,  
 Toujours sonnant doucement les attire,  
 Mene la danse, et apres se retire,  
 Prenant plaisir veoir faire petis saulx  
 Aux gais Bergiers, dançans bransles nouueaux  
 Sur la Viette, riniere de renom,  
 Qui en Gastine ha sur toutes le nom :  
 Ou font seiour les Serenes facondes,  
 Et de leur chant resioiussent les ondes.

D'oüy le chant ie fuz tant resioüy  
 Qu'incontinent mis tristesse en oubly :  
 Tant fuz ioyeux d'entendre leur musique  
 Que fis clameur du pays magnifique.



Noble pays, qui sur toute la France  
 AueZ produit des filles d'excellence,  
 On ne sçauroit en aucun ieu de pris  
 Autres trouuer qui emportent le pris:  
 Soit a chanter et danser par mesure:  
 Car ces dons la procedent de Nature.

Ie voy les Rois et Princes estrangers  
 Estre apprentifz de voz branles legers.

Or ne desplaïse au Tybre, ni au Rosne,  
 Ni au grand Nil, ni aussi a la Saune,  
 Fleues qui ont par l'uniuers grand bruyt,  
 Car la Viette apporte plus beau fruyt:  
 D'un Simois et Xanthe de renom  
 Nostre Viette ha surmonté le nom:  
 Digne d'auoir ses sources immortelles,  
 Puis que ses eaux nourrissent les pucelles.

Or chanteZ donc, et dansez les fillettes,  
 Voſtre doux chant excède les musettes.  
 Chere Gastine, auant la mort me donne  
 Le coup du dart, qu'ingrat ie t'abandonne.

Donques i'estoy muſé dans des espines  
 Pour contempler leur faſon et leurs mines:  
 Au coing du roch, au bout de la prairie,  
 Eſtois tout coy pour veoir la bergerie.

Là se prenoit entr'eux tant de soulas,  
Tant a danser qu'inuenter autr'esbas,  
Qu'il n'est possible aux vians curieux  
Plus en auoir sans le transport des cieux:

Pendant le temps qu'estois en ce plaisir  
Voyant la Nymphé où estoit mon desir,  
Vous conteray au long de point en point,  
Qu'il m'arrîua, dont fuz en piteux point.  
Ma robe estoit de bonnes peaux de Loups,  
Qui me venoit assez mal a propous,  
Car un faux Loup raut une Brebis:  
Lors les Bergiers firent de si hauts cris  
Que i'en frayeur, et du lieu me despars,  
Voicy venir mastins de toutes partz,  
Courans au bruyt, et m'ont tranché chemin,  
M'ont attrappé, chascun prend son lopin  
De mon habit, et l'ont mis a l'enuers:  
J'aduisay lors mes genoux descouuertz,  
Dont m'escrié a haute pleine teste,  
Voyant ma robe ilz me prenoient pour beste.  
Maint'aiguillette arrachent de l'eschine,  
Qui me causoit faire piteuse mine:  
Mais Dieu voulut que la douce fillette  
Oÿt mon cry, et court toute seulette,  
Et me voyant tout rompu, vint descendre,  
Prent sa quenouille, et ayde a me deffendre:  
En elle alors mon cueur fut imprimé,

Et bien ioyeux d'estre ainsi deliuré,  
 D'elle m'approche, et pres d'elle rangé  
 Je me sentis de beaucoup soulagé:  
 Car le doux vent de sa souëfue haleine  
 M'amoindrissoit de mes playes la peine.  
 En sousspirant commence a l'embrasser,  
 Et doucement son visage baiser,  
 Vous merciant la gentile fillette  
 Dont vous m'avez esté amye parfaite.  
 En cheminant tenois sa blanche main,  
 Parlant a moy d'un cueur doux et humain:

En me disant, y sceu priqueu marrie  
 De vostre enneu, et gronde fascherie,  
 Jgle vouz - ant pardingue soit grand mau,  
 Que fusiant morts le Chiens qui sont ytau.  
 So vou plaiset de venir chez mon pere  
 Y vou donray do vin a bonne chere.

Je luy resscns ma dceue et grand' amye  
 De bien bon cueur humblement vous mercie,  
 Et pour autant que i'ay fort bon vouloir  
 De vous aymer, et vostre grace auoir,  
 Je vous supply de prendre ce pendant  
 Du bon du cueur ce mien petit present.

Sur ces propos iettay sur la verdure  
 Deux beaux anneaux lavez d'une ceinture:

Elle commence adonc a soy cliner,  
Et les anneaux en son blanc seing serrer.

Il estoit temps d'emmener ses aigneaux,  
Car desia lors s'en alloyent a troupeaux  
De tous costez ses compaignes, si bien  
Que n'eusmes point de plus parler moyen.  
Prenant congé me presenta la main,  
Me promettant revenir lendemain.

Sur cest a-Dieu de moy s'est separée,  
Où la cogneu du dart d'amour frappée,  
Car s'en allant, souvent tournoit sa face,  
En me disant d'une si bonne grace:  
S'ra tou demoin enuiron de dix houre,  
Ne faillé pas de vous trouver a l'heure,  
E da bon ser, adé, adé vou dy,  
Or a-Dieu donc la belle fille aussi.

Lors attendant l'heure de la promesse,  
Par les bosquetz me pourmenois sans cesse,  
En escoutant le doux chant des oyseaux,  
Qui resonnoyent a l'entour des ruyseaux:  
Ou ie songeoyz es mignardises vaines  
Qu'incessamment font les Dames mondaines,  
Pour decevoir leurs mariz et amys  
Du deceptif langage d'Amadis,  
Ne monstrant rien de leurs corps que la langue,  
Langue

Jeune Dame et de la belle Daurille

Langue d'aspic, pour dresser leur harangue,  
 Et leur fournaise aussi puante que soufre,  
 Maudit soit il qui dira bien du gouffre:  
 Mais les troupeaux des Bergeres vians  
 Au clair Soleil, et aux cieux reluyfans,  
 Sont a aymer, tant pour leur doux langage,  
 Que leur Banquet de fruit et de laictage,  
 Entretienat une beauté certain,  
 Et de leur bouche alenant douce alenc.

Lors quand ie vy qu'il estoit pres de l'heure,  
 M'en allé voir des Brebis la demeure,  
 Sur un coutant en un petit pasty,  
 Pres d'un rocher, la Bergere attendy.

Tantost l'ouy ses Brebis erodans.  
 Qui de sa voix faisoit de plaisans chantz:  
 Car la coustume est ainsi en Gastines,  
 Quand vont aux champs, de hucher leurs voysines  
 Par mesme chant que metz cy en musique,  
 Rendant ioyeux tout cueur melancolique.

Comme les Bergeres erodent leurs Brebis.




*Et o lon valet, o lon valet, lon valet, de re lo.*




*Lon valet, lon valet, lon valet, la la a a let.*



Le chant & huchement des Bergeres.



*On, on, on, on, onp, on, on, on, on, onp.*



Responſe de la Bergere compagne.



On, ou ou, ou ou ou ou, oup ou oup.

Je participe à M. Le Gendre

Jeune La Chasse et les attraites



# ❧ COMPLAINTE

D V C E R F, A M O N S I E V R,

*du Foüilloux, par Guilla-*  
*me Bouchet.*

SI pour sauuer des Chiens ma vie fugitiue  
 A l'homme ie me rendz, & de mon gré le fuyue:  
 Si a luy i'ay recours, afin de m'esloigner  
 Des Limiers, que ie sens a ma mort s'acharner:  
 Pourquoy, seigneur Foüilloux, est-ce que tu les cornes?  
 Si a l'homme me rendz, en rabaisant mes cornes,  
 Pourquoy luy apprens-tu, avec mille instrumens,  
 Tendre toiles & retz, pour me mettre dedans?  
 Pourquoy l'enseigne-tu, est-ce a fin qu'il me prene,  
 Ou pour soudain mourir dans les retz il me mene?  
 Mes larmes, & mon poil, mes cors tousiours croissans  
 Luy profitent assez, sans qu'or auant mes ans  
 Mes forces par ses mains me foyent du tout rauies:  
 Car ma corne guerist autant de maladie  
 Que de fois on la voyt sur le haut de mon front  
 Renaistre, tous les ans faisant vn nouveau tronc.  
 Lon en chasse, bien tost, la douleur qui vironne  
 Dans le cerueau esmeu, & ses espritz estonne:  
 Si estant bien pilée vne dragme on en boyt  
 Lon en purgel l'humeur, & le trop qui croissoit.  
 Aux talons escorchez on fait la peau reprendre,  
 on fait mourir les cors qui veulent loing s'estendre.  
 e mal long & tardif de l'humeur trop puissant

T ij

Par ma corne est guery, rendant le corps poissant.  
 Quand l'humeur froid ou chaut l'un sur l'autre maistrise,  
 Ma force & ma vertu empesche l'entreprise.  
 De la femme on retient l'amarry & les fleurs,  
 Si peu elle se purge, ou trop, servant aux deux.  
 Guerist le mal des yeux, quand d'une obscure nue,  
 Croissant, il veut voyler & veut filler la veuë.  
 La rate lon remet, qui espend par le corps  
 Vne iaune poison, appaise les effortz  
 De l'humeur chaut & froid, qui enragement blece  
 Lestendres nerfz des dentz, l'humeur tombant sans cesse.  
 De la froide colique on sent fuyr les ventz  
 Alongeans les boyauz avec mille tourmentz.  
 Si quelqu'un s'est bruslé, ma corne mise en poudre  
 Le soulage ausi tost, & sa peau faict refoudre.  
 Elle soulage ausi vn homme empoisonné  
 Que l'auare heritier, las, aura bouconné,  
 Et resiste au venin: desechant elle tue  
 Tous les vers formillans d'une chair corrompue.  
 Mais quoy ? Je chante en vain de ma corne l'honneur,  
 Et l'honneur qui me nuist. Je sens desia la peur  
 Me mettre vne aïlle au pied, afin que ie me cache  
 Par le couuert des boiz, ou ma vie l'arrache  
 Des dentz des gros Clabaux, me talonnans de pres.  
 Le cor emplist le ciel, ie veoy desia les retz,  
 Et ie veoy le Veneur qui la fleche dressée  
 Mesure en encochant mon flanc a sa visée:  
 Et afin qu'il ne faille a me rendre aux abboiz,  
 Je veoy bien le Fouïlloux, la crainte de noz boiz,  
 Luy remerquer au doigt mes traces & ma couche,

Afin que feurement il me fuyue & me touche:  
Comme dedans la trompe il doyt le fon hauffer  
Quand il veut en fuyant aux dogues m'efflancer,  
Et corner, a la fin, la prise pour m'occire,  
Et ce qui s'en enfuyt, las, que ie ne puis dire.  
Peut estre qu'il pretend trouuer dedans mon corps  
Des remedes autant comme dedans mes cors:  
Car vſant de ma moelle, on appaiſe les peines  
Quand le ventre eſt preſſé de ſes plus fortes geines:  
Et par ma moelle encor & mon ſuiſ ſont remis  
Les membres & les nerfz, quand ilz ſont refroidis.  
Soyt que mon eſtomach pour medecine apporte  
Des pierres, empeschans que la femme n'auorte.  
Ou ſoyt que ma nature a vn lit de Venus  
Eſchauffe les maryz trop coüardz & recreuz.  
Ou bien que dans mon cueur vn petit os on treuve  
Qui engarde trembler ceux qui en ſont eſpreuue.  
Soyt que ma tendre chair on preſente aux repas  
Des Roys & des ſeigneurs, entre les premiers platz:  
Si qu'en mangeant ſouuent, peu a peu lon conſume  
Des fiebres la chaleur, qui aux veines s'allume:  
Et qui plus eſt, ma chair faiſt prolonger les ans,  
Qui poiſent ſur le chef des hommes vieilliffans.  
Mais homme mal-heureux, ſi mon eage te paſſe,  
Veux-tu que contre Dieu le tien allonger face?  
Faut-il, en me mangeant, celuy la auier  
Qui par ma dure mort veut ſa vie allonger?  
Si tous ces grans biens la viennent de mon dommage,  
Mort ce ſoyt, ie ne vy plus d'vn eage:  
les beſtes pourſuy donc

Par quelles nul profit, mais dommage te font.  
 Qmon, puisse estre ainsi, que des Dieux la puissance  
 Autant que toy a nous, te face de nuisance,  
 Et plus iustes encor, qu'ilz t'enuoyent souuent  
 La guerre, la famine, & la peste suyuant :  
 Affin que retenu en ce mal-heur contraire  
 Tu ne nous veuille plus, ou nous puisse meffaire.  
 Mais si tu demourois en tes maux courageux,  
 Despitant la puissance, & le courroux des Dieux,  
 Puisse-tu rencontrer Diane Cynthiene  
 Toute nue baigner dedans quelque fontaine :  
 Et ainsi qu'Acteon, comme moy Cerf tourné,  
 Bramer deuant ton Chien dessus toy attiné,  
 Qui succera ton sang, iusqu'atant que lon pense  
 Ceste peine cruelle efgaller ton offence.

FIN.











La D<sup>na</sup> m<sup>te</sup> p<sup>re</sup>sent<sup>e</sup> p<sup>re</sup>sent<sup>e</sup>

En l'us<sup>te</sup> J<sup>u</sup>ven<sup>te</sup>

